

# मुक्ति के मार्ग

लूका के लिखलो शुभ-संदेश

The Way to Salvation  
The Good News Written by Luke  
*Angika*

©Bible Society of India

In association with  
Nav Bharat Mission

नव भारत मिशन  
पोस्ट बाक्स नं. - 1  
पोस्ट+जिला- पूर्णियाँ  
उत्तर बिहार

*Published by:*  
The Bible Society of India  
206 Mahatma Gandhi Road  
Bangaluru-560001

## दू-शब्द

आपने के हाथ में प्रस्तुत “शुभ-संदेश पुस्तिका” के शीर्षक “लूका रचित शुभ-संदेश” छेकै, जे कि परमेश्वर के पवित्र-शास्त्र “बाइबिल” सँ लेलो गेलो छै। “बाइबिल” शब्द युनानी भाषा के “बिब्लिया” शब्द सँ अयलो छै, जेकरो माने होय छै: “किताब सिनी”। समुच्चे बाइबिल में 66 किताब छै, जे दू भागो में बँटलो छै – “नया नियम” आरु “पुरनका नियम”। पूरा बाइबिल कँ परमेश्वर के आत्मा के अगुवाई में लिखलो गेलो छै। प्रस्तुत पुस्तिका “नया नियम” के तेसरो किताब के रूप में छै।

“लूका रचित शुभ-संदेश” के लिखै वाला एक गैर-यहूदी जाति के आदमी छेलै, जेकरो नाम “लूका” छेलै, जे पैहने प्रभु यीशु मसीह के खास दूत पौलुस के संग जग्घो-जग्घो घुमलो छेलै। वें एगो ज्ञानी आदमी छेलै, जे परमेश्वर के आत्मा के अगुवाई में ई किताब कँ लिखलकै।

प्रभु यीशु मसीह के जनम ऊ समाज में होलो छेलै, जे समाज के लोग सिनी यहूदी धर्म कँ मानै छेलै। यहूदी धर्म के लेली एक्के परमेश्वर छेलै आरु ओकरा सिनी लेली एक्के मंदिर छेलै, जे यरुशलेम नाम के शहर में छेलै। ऊ समय में यहूदी लोग सिनी रोमी शासन के अधीन में छेलै। यीशु के जनम के बहुत्ते साल पैहने कुछ लोग छेलै, जे सिनी परमेश्वर के भविष्यवक्ता छेलै। परमेश्वर के ऊ भविष्यवक्ता सिनी ई बातो के भविष्यवाणी करलको छेलै कि एगो समय अयतै जखनी परमेश्वर ई संसार में एगो मुक्तिदाता कँ भेजतै, जे सभ्भे मनुष्य जाति के पाप सँ

मुक्ति देतै। जखनी प्रभु यीशु ऊ लोग सिनी के बीच्यो में जिन्दा छेलै, तखनी बहुत्ते यहूदी लोग सिनी ई बातो कें मानै लेली तैयार नै होलै कि यीशुवे परमेश्वर के भेजलो मुक्तिदाता मसीहा छेकै। यहूदी लोग सिनी तँ खाली ई बातो के इंतजार करी रहलो छेलै, कि एक दिन कोय मसीह बनी कें अयतै, जे ओकरा सिनी कें रोमी शासन के अत्याचार सँ छुटकारा दिलैतै।

मूल रूप सँ युनानी भाषा में लिखलो ई किताब “लूका रचित शुभ-संदेश” एक चिट्ठी के रूप में थियुफिलुस नाम के एगो सम्मानित आदमी कें संबोधित करी कें लिखलो गेलो छै (1:3-4)। मूल रूप सँ खाली यहूदी जाति के लोगो सिनी लेलीयै नै, बल्कि पूरे मानव जाति के लोग सिनी कें ध्यान में राखी कें लिखलो गेलो ई किताब में प्रभु यीशु मसीह के जनम सँ ले करी कें क्रूस पर हुनको मौत तलक आरु हुनको दुबारा जी उठै सँ ले करी कें आकाश में हुनको दुबारा शरीर समेत उठाय लेलो जाय तलक के घटना के पूरा ब्यौरा देलो गेलो छै।


परमेश्वर के आत्मा के अगुवाई में लिखै सँ पैहने लूका दोसरो लोग सिनी कें लिखलो प्रभु यीशु के जीवनकथा कें गहराई सँ अध्ययन करलकै, जे लोग सिनी हुनको जीवन कें आपनो आँखी सँ देखलको छेलै। लूका ई चाहलकै कि खाली थियुफिलुसे नै, बल्कि ओकरो साथहै दोसरो लोग सिनी सत्य के बारे में पक्का तौर पर जानी लिये, जेकरो शिक्षा ओकरा सिनी कें देलो गेलो छेलै। लूका के उद्देश्य ई छेलै, कि पूरे दुनियाँ के लोगो सिनी लेली प्रभु यीशु मसीह के जीवन के बारे में पूरा ब्यौरा सुरुहै सँ जाँच-पड़ताल करी कें सिलसिलेवार ढंग सँ लिखलो जाय, ताकी ओकरा सिनी के विश्वास आरूहौ पक्का होय जाय।

ई पुस्तिका में लूका नऽ प्रभु यीशु मसीह के ऊ सभ्भे काम कें विस्तार सँ लिखलको छै, जे हुनी अछूत लोग, गरीब-गुरुवा लोग, बीमार लोग आरु अधर्मी लोग सिनी के बीच्यो में करलको छेलै। परमेश्वर के एकलौता बेटा प्रभु यीशु मसीह समुच्चे मानव जाति के लेली मुक्तिदाता बनी करी कें ई दुनियाँ में अयलै, ई बातो कें बहुत्ते स्पष्ट तरीका सँ बतैलो गेलो छै।

“लूका रचित शुभ-संदेश” मूल रूप सँ युनानी भाषा में लिखलो गेलो छै। लेकिन एकरो अनुवाद आरूहो भाषा में करलो गेलो छै। अंगिका भाषा में जे अनुवाद आपने सिनी कँ हाथ में छै, एकरा करै कँ मकसद ई छै, कि ई भाषा बोलै वाला लोग सिनी भी परमेश्वर के वचन कँ आपनो भाषा में समझे सकै। ई अनुवाद बहुते ही सरल, स्पष्ट आरू प्रभावी तरीका सँ करलो गेलो छै, जे अंगिका भाषी समाज के सोच-विचार के परिवेश सँ मेलो खाय छै। एकरो साथहै कुछ-कुछ कठिन शब्द सिनी कँ आरू भी आसानी सँ समझै वास्तें जग्घो-जग्घो पन्ना कँ नीचा में “फुटनोट” के रूप में ओकरो माने देलो गेलो छै आरू एकरो अलावे पुस्तिका कँ अंत में एगो “शब्द-परिचय” भी देलो गेलो छै। शब्द-परिचय में कुछ खास-खास कठिन शब्द सिनी कँ विस्तार सँ समझैलो गेलो छै। जैसे कि शैतान, मसीह, परमेश्वर के आत्मा आदि।

हमरा सिनी के यहें विश्वास आरू प्रार्थना छै, कि जखनी अंगिका भाषी समाज के लोग सिनी परमेश्वर के संदेश कँ आपनो दिलो के भाषा में पढ़तै, तँ प्रभु के जिन्दा वचन हुनका सिनी के दिलो सँ बात करतै। एकरो बदला में ऊहो सिनी प्रभु यीशु मसीहा के देलो मुक्ति कँ आपनो जीवन में ग्रहण करतै आरू अनंत काल वास्तें स्वर्ग में जग्घो पयतै।

परमेश्वर आपनो जिन्दा वचन सँ अंगिका भाषी सभ्भे लोगो कँ आशीर्वाद दिये।



# लूका रचित शुभ-संदेश

---

परिचय: लूका के चिट्ठी थियुफिलुस के नाम

**1** 1-2 परम आदरणीय थियुफिलुस, हे महानुभाव, जैसे कि आपने जानै छियै कि बहुते लोग हमरा सिनी के बीचो में घटलो घटना के ब्यौरा लिखै के कोशिश करलको छै। ई सभ्भे बात हमरा सिनी तलक ऊ लोग सिनी सँ पहुँचलै, जे सिनी ओकरा आपनो आँखी सँ देखने छेलै आरु जे सिनी हमरा सिनी वास्ते परमेश्वरो के शुभ-संदेश के प्रचारहौ करलकै।<sup>3</sup> हमहूँ सभ्भे बातो के जाँच-पड़ताल सुरुहै सँ करने छियै, यह लेली हमरा ई उचित लागलै कि हममें आपने वास्ते सभ्भे बातो के एक तरफो सँ ब्यौरा लिखियै,<sup>4</sup> ताकि आपने ई जाने सकियै, कि आपने जे सुनने छियै, ऊ एकदम्मे सच्चा आरु अटल छै।

यूहन्ना के जनम के भविष्यवाणी

5 वहे समय में जखनी राजा हेरोदेस यहूदिया नाम के राज्य पर शासन करै छेलै, वैन्टां जकरयाह नाम के एगो पुरिहित छेलै, जे पुरोहिताय करै वाला अबियाह\* पुरोहित दल के छेलै। जकरयाह के घरवाली इलीशिबा

---

1:5 अबियाह पुरोहित दल: पुरोहित सिनी के 24 दल छेलै। वें सिनी बारी-बारी सँ साल में दू बेर एक-एक सप्ताह वास्ते यरुशलेम के मंदिर में पुरोहित वाला काम करै छेलै।

छेलै। ऊ दोनो हारुन के वंश के छेलै।<sup>6</sup> ऊ दोनो परमेश्वरो के नजरी में धर्मी छेलै, कैहनेकि प्रभु के सभ्भे आज्ञा आरु विधि-विधान कँ सच्चाई सँ पालन करै छेलै।<sup>7</sup> फेनू भी ओकरो कोय बाल-बच्चा नै छेलै, कैहनेकि इलीशिबा बाँझ छेलै आरु दोनो बूढ़ा-बूढ़ी होय गेलो छेलै।

**8-9** एक दाफी जकरयाह के दल मंदिर में पुरोहिताय के काम करी रहलो छेलै। तँ पुरोहित सिनी के परम्परा\* मोताबिक पर्ची डाली कँ जकरयाह कँ चुनलो गेलै कि वें परमेश्वरो के मंदिर\* के अंदर पवित्र स्थान में जाय कँ धूप जलाबै।<sup>10</sup> परम्परा के मोताबिक धूप जलाबै के समय सभ्भे लोग बाहरे प्रार्थना करै छेलै।<sup>11</sup> वहे समय जकरयाह जखनी मंदिरे में छेलै, कि अनचोके धूप-वेदी के दहिना तरफ प्रभु के एगो स्वर्गदूत परगट होलै।<sup>12</sup> जकरयाह स्वर्गदूत कँ देखी घबराय कँ भयभीत होय गेलै।<sup>13</sup> एकरा पर स्वर्गदूत ओकरा कहलकै, “जकरयाह मत डरें! हम्मैं तोरा ई बताबै लेली अयलो छियौ, कि परमेश्वर तोरो प्रार्थना कँ सुनी लेलकौ। तोरो घरवाली इलीशिबा बेटा कँ जनम देतौ, तोंय ओकरो नाम यूहन्ना राखिहें।<sup>14</sup> ओकरो जनम सँ तोरा बड़्डी आनंद मिलतौ आरु लोगो सिनी तोरो संग आनंदित होतौ,<sup>15</sup> कैहनेकि वें प्रभु के नजरी में महान होतै, वें अंगूर के रस आरु मदिरा कैहियौ नै पीतै। वें आपनो माय के पेट्है सँ परमेश्वरो के आत्मा सँ भरलो-पूरलो होतै।<sup>16</sup> वें इसराएल\* के वंश में सँ बहुते लोगो कँ आपनो प्रभु के तरफ लौटैते,\* जे परमेश्वर

---

**1:8-9** भोर आरु साँझ कँ एगो पुरिहित मंदिर में जाय कँ धूप के वेदी पर धूप जलाबै छेलै। पुरोहित सिनी बहुते छेलै, यहे वास्तें ई खास काम करै लेली एगो पुरिहित कँ पर्ची डाली कँ चुनलो जाय छेलै। **1:8-9** वहे समय में यहूदी जाति के लोगो सिनी वास्तें एक्के मंदिर छेलै, जे यरुशलेम नामक शहर में छेलै। **1:16** बहत्ते समय पैहने अब्राहम नाम के एगो महापुरुष छेलै, जेकरो पोता के नाम याकूब छेलै। **1:16** बहुते साल पैहले इसराएल के वंशज सिनी ई वादा करलको छेलै, कि वें सिनी परमेश्वरें के आराधना करतै। लेकिन समय गुजरला के साथ वें सिनी आपनो वादा कँ भूली गेलै आरु आपनो परमेश्वर सँ भटकी गेलै।

छिकै।<sup>17</sup> ओकरा में परमेश्वर के भविष्यवक्ता एलियाह के जैसनो आत्मा आरु शक्ति होतै। ऊ लोग सिनी कॅ प्रभु के आगमन लेली तैयार करतै। ऊ माय-बाप आरु ओकरो बाल-बच्चा सिनी के बीद्यो में मेल-मिलाप करैतै, आरु आज्ञा नै मानै वाला लोग सिनी कॅ ई समझैते कि परमेश्वर के आज्ञा मानना केतना भला छै आरु ई तरहें लोग सिनी कॅ प्रभु वास्तें तैयार करतै।”<sup>18</sup> एकरा पर जकरयाह स्वर्गदूत सँ कहलकै, “ई बातो पर हम्में कैसें विश्वास करियै? कैहनेकि हम्में आरु हमरो घरवाली दोनों बूढ़ा-बूढ़ी होय गेलो छियै।”<sup>19</sup> स्वर्गदूत कहलकै “हम्में जिब्राएल छियै, जे परमेश्वरो के सामना में रहै छियै। परमेश्वरें हमरा भेजने छै, कि तोरा ई शुभ-समाचार बतैयौ।<sup>20</sup> हमरो वचन जरुरे निश्चित समय पर पूरा होतै, लकिन तोंय हमरो बातो पर विश्वास नै करलहें, यहै लेली तोंय ऊ बेटा के जनम हुवै तलक बौका रहभैं।”

**21** ई दौरान लोग सिनी जकरयाह के मंदिर सँ बाहर आबै के रास्ता देखै छेलै। ओकरा सिनी के अचरज होय रहलो छेलै, कि जकयाह के एतना देरी कैहनें होय रहलो छै।<sup>22</sup> जबे जकरयाह बाहर अयलै, तँ बोले नै सकलै। लोग सिनी ओकरो इशारा सँ समझी लेलकै कि ओकरा मंदिर में कोनो दर्शन मिललो होतै।<sup>23</sup> जकरयाह मंदिर में रही कॅ आपनो सेवा के बाँकी कुछ दिन पूरा करलकै। तेकरोऽ बाद ऊ आपनो घर चल्लो गेलै।<sup>24</sup> कुच्छु दिनों के बाद ओकरो घरवाली इलीशिबा के देह भारी होलै आरु ऊ पाँच महीना तलक कहीं बाहर नै निकललै।<sup>25</sup> इलीशिबा कहलकै कि “परमेश्वर केतना दयालु छै! हुनी हमरो बाँझ हुवै के अपमान कॅ दूर करी देलकै।”

### प्रभु यीशु के जनम के घोषणा

**26-27** जखनी इलीशिबा के छठा महीना चली रहलो छेलै, तबे परमेश्वर नऽ जिब्राएल स्वर्गदूत कॅ गलील राज्य के नासरत नगर में मरियम नाम के एगो कुँवारी लड़की लिगां भेजलकै। वहे मरियम के

छेका यूसुफ नाम आदमी सँ भेलो छेलै, जे राजा दाऊद के वंश के छेलै।<sup>28</sup> स्वर्गदूत मरियम के नजदीक आबी कँ नमस्कार करलकै आरु कहलकै, “हे मरियम, परमेश्वरो के कृपा तोरा पर भेलो छै आरु हुनको आशीर्वाद तोरा साथ में छै।”<sup>29</sup> मरियम ई वचन सुनी कँ बहुते ब्याकुल होय गेलै आरु सोचे लागलै कि स्वर्गदूत के कहै के माने की हुवे सकै छै? <sup>30</sup> स्वर्गदूत ओकरा सँ कहलकै, “हे मरियम, नै डरें! परमेश्वरो के कृपा तोरा पर भेलो छै। <sup>31</sup> सुनें, अपने गर्भवती होबै आरु एगो बेटा कँ जनम देबै। अपने हुनको नाम ‘यीशु’ राखबै। <sup>32</sup> हुनी महान होतै आरु परम-परमेश्वरो के बेटा कहलैते। प्रभु परमेश्वर हुनकर पुरखा राजा दाऊद\* के राज-पाट हुनका सौंपी देतै। <sup>33</sup> हुनी हमेशा लेली इसराएल\* के वंशज पर राज करतै आरु हुनको राज्य के कहियौ अंत नै होतै।”

**34** एकरा पर मरियम स्वर्गदूत सँ कहलकै, “लेकिन हमरा सँ बेटा कैसें जनम लिये सकै छै? हममें तँ कुँवारिये छियै!” <sup>35</sup> जबाब में स्वर्गदूत कहलकै, “अपने पर परम-परमेश्वर के आत्मा उतरतै आरु हुनको पवित्र शक्ति सँ जे बच्चा के जनम होतै, ऊ पवित्र होतै आरु परमेश्वरो के पुत्र कहलैतै। <sup>36</sup> एतन्हें नै! यहो सुनी लियै कि अपने के सम्बन्धी इलिशिबो एगो बेटा कँ जनम देतै। ओकरा लोग सिनी बाँझ कहै छेलै आरु ऊ बूढ़ी होय गेलो छेलै, लेकिन छऽ महीना पैहिनहें ऊ गर्भवती भेलो छै, <sup>37</sup> कैहनेकि परमेश्वर लेली कोनो बात असंभव नै छै।”

**38** एकरा पर मरियम कहलकै, “देखियै, हममें प्रभु के दासी छियै आरु प्रभु जे चाहै छै, ओकरा मानै वास्तें हममें तैयार छियै।” तबे स्वर्गदूत वैन्ठां सँ चल्लो गेलै।

---

1:32 राजा दाऊद ईसराएल के सबसे महान राजा छेलै, जे ई घटना सँ लगभग 1000 साल पैहने राज करलको छेलै। जैसे कि परमेश्वर के भविष्यवक्ता सिनी पैहने बतैलको छेलै, ओकरो अनुसार लोग सिनी इंतजार करै छेलै, कि मुक्तिदाता के जनम राजा दाऊद के वंश में होतै। 1:33 मूल में ‘याकूब’।

### मरियम आरु इलीशिबा के भेंट

39 ओकरो बाद मरियम यात्रा के तैयारी करी कॅ सीधे यहूदिया के पहाड़ी राज्य में मौजूद ऊ नगर में गेलै, जैन्टां जकरयाह आरु इलीशिबा रहै छेलै। 40 ओकरो घर में पहुँची कॅ वें इलीशिबा कॅ नमस्कार करलकै, 41 जैसैं हीं मरियम के नमस्कार सुनलकै, वैसैं हीं इलीशिबा के गर्भ में बच्चा उछली गेलै आरु इलीशिबा परमेश्वर के आत्मा सँ भरपूर होय गेलै 42 आरु वें ऊँच्यो आवाज में कहे लागलै “परमेश्वर सभ्भे महिला में तोरा धन्य बनैले छौ आरु जे बेटा कॅ तोंय जनम देभैं, वहूँ धन्य छै। 43 हमरा लेली ई आदर के बात छियै कि हमरो प्रभु के माय हमरा सँ मिलै वास्तें अयलौ छै! 44 जैसैं ही तोंय आबी कॅ हमरा नमस्कार करलहैं, हमरो पेटो के बच्चा खुशी सँ हिलै-डोले लागलै! 45 तोंय धन्य छैं, कैहनेकि तोंय विश्वास करलहैं कि परमेश्वर जैसनो कहलकै, वैसनें करतै।”

### मरियम द्वारा परमेश्वर के स्तुति गीत

46 आरु तबे मरियम कहै लागलै,  
हमरो मोन करै छै तारीफ...

तारीफ

47-49 हुनी मुक्ति हमरा देलकै,  
हुनी मुक्ति हमरा देलकै, तुच्छ  
आपनो दासी पर हुनी, महान किरपा  
करलकै।

हमरो मोन करै छै तारीफ...

तारीफ

सर्वशक्तिमान प्रभु हमरा लेली महान काम करलकै, पीढ़ी-पीढ़ी के  
लोगो लेली हमरा धन्य बनाय देलकै।

हमरो मोन करै छै तारीफ... तारीफ



सर्वशक्तिमान प्रभु हमरा लेली करलकै बड़का काम, अति पवित्र  
आरु महान छै, हुनको सामर्थी नाम।

हमरो मोन करै छै तारीफ... तारीफ

<sup>50</sup> पीढ़ी-पीढ़ी तलक हुनी आपनो किरपा-दृष्टि राखतै, जे कोय  
हुनको भय मानतै, हुनको भक्ति करतै।

हमरो मोन करै छै तारीफ... तारीफ

**51** हुनी आपनो महान सामर्थ परगट करलकै, घमंडी सोच-विचार  
वाला कॅ हुनी छिन्न-भिन्न करलकै।

हमरो मोन करै छै तारीफ... तारीफ

**52** हुनी बड़का-बड़का लोगो कॅ नीचा करलकै, छोटका-छोटका  
लोगो कॅ हुनी, ऊँचा-ऊँचा उठैलकै।

हमरो मोन करै छै तारीफ... तारीफ

**53** हुनी भूखा-प्यासा लोगो कॅ बढ़ियाँ भोजन करैलकै, आरु मातवरो  
कॅ हुनी खाली हाथ लौटैलकै।

हमरो मोन करै छै तारीफ... तारीफ

**54-55** हुनी हमरा सिनी के पुरखा सँ जे वादा करलकै, वहे रुप में हुनी  
आपनो सेवक इसराएल के मदद करलकै।

हमरो मोन करै छै तारीफ... तारीफ

हुनी अब्राहम आरु ओकरो वंशज पर, दया के नजर करलकै, वहे रुप  
में हुनी आपनो सभ्भे वादा निभैलकै।

हमरो मोन करै छै तारीफ... तारीफ

**56** मरियम लगभग तीन महीना तलक इलीशिबा के संग रहलै आरु  
ओकरो बाद आपनो घर वापस लौटी गेलै।

### यूहन्ना के जनम

**57** इलीशिबा के प्रसव समय पूरा होलै आरु वें एगो बेटा कॅ जनम  
देलकै। <sup>58</sup> पड़ोसिया आरु रिस्तेदार सिनी में ई खबर फैली गेलै, कि

प्रभु ओकरा पर केतना बड़का दया करलको छै आरु वें सिनी ओकरो संग खुशी मनैलकै।

59 जबे बच्चा आठ दिनका होलै, तबे सभ्भे रिस्तेदार आरु पड़ोसिया सिनी खतना\* के मौका पर अयलै, जे यहूदी समाज के एगो विधि छेलै। ओकरा सिनी के अन्दाजा छेलै, कि बालक के नाम ओकरो बाबूजी के नाम पर “जकरयाह” राखलो जैतै।<sup>60</sup> इलीशिबा कहलकै, “नै! ओकरो नाम ‘यूहन्ना’ राखलो जैतै।”<sup>61</sup> लोग सिनी अचरज करी कॅ कहलकै, “तोरो खनदान में तँ केकरहो ई नाम नै छौ।”<sup>62</sup> यहे लेली वें सिनी बच्चा के बाबूजी सँ इशारा सँ बात करी कॅ पुछलकै।<sup>63</sup> जकरयाह इशारा करी कॅ लिखै लेली पाटी माँगलकै आरु लिखलकै, “एकरो नाम यूहन्ना छियै”। एकरा सँ सभ्भे कॅ अचरज होलै।<sup>64</sup> तबे जकरयाह के मुँह में तुरंते बोली आबी गेलै आरु वें परमेश्वर के जय-जयकार करे लागलै।<sup>65</sup> सभ्भे पड़ोसिया हक्का-बक्का होय गेलै आरु बादो में यहूदिया राज्य के पहाड़ी इलाका में ई बात फैले लागलै आरु लोग सिनी ई घटना के चर्चा करै लागलै।<sup>66</sup> ई घटना के बारे में जे कोय्यो सुनलकै, वें सिनी आपनो मोन में विचार करै लागलै। वें सिनी कहलकै, “ई बच्चा बड़ा होय कॅ की बनतै?” कैहनेकि निश्चिते प्रभु के हाथ ओकरा पर छेलै।

### जकरयाह के भजन

67 तबे बच्चा के बाबूजी जकरयाह पर परमेश्वर के आत्मा उतरलै आरु वें भविष्यवाणी करे लागलै:

68 “इसराएल के प्रभु परमेश्वर के जय हो,

---

1:59 खतना यहूदी समाज के एगो धार्मिक विधि छेलै। ई विधि में जनम के आठवाँ दिन पर नवजात बच्चा के जनन-अंग के अगला भाग के चमड़ी काटै के परम्परा छेलै। खतना के विधि पुरनका यहूदी समाज में ई बातो कॅ देखलाबै छेलै, कि ऊ लोग सिनी अब्राहम के वंशज छेलै आरु परमेश्वर के आज्ञा के पालन करै छेलै। (उत्पत्ति 17:1-14)

हुनी आपनो लोग सिनी पर दया के नजर करलकै,  
हुनी ओकरा सिनी कॅ मुक्ति दै वास्तें अयलै।

69 हुनी आपनो दास राजा दाऊद के वंश में हमरा सिनी लेली शक्तिशाली मुक्तिदाता भेजलकै,

70 जैसें हुनी आपनो बहुते भविष्यवक्ता द्वारा ई वादा करलको छेलै।  
जय हो, जय हो, इसराएल के प्रभु परमेश्वर के जय हो,

71 हुनी हमरा सिनी कॅ दुश्मनो के हाथो सँ बचाबै के वादा,  
आरु हमरा सिनी कॅ घृणा करै वाला सिनी सँ छुटकारा दै के  
वादा करलको छेलै।

72 हुनी आपनो पवित्र वादा कॅ याद करलकै आरु हमरा सिनी के पुरखा सिनी पर दया करलकै।

73 जे वचन हुनी अब्राहम कॅ देलो छेलै, ओकरा हुनी पूरा करलकै।

74-75 ताकी हमरा सिनी कॅ दुश्मनो के हाथो सँ मुक्ति मिली जाय  
आरु हमरा सिनी निडर बनी कॅ परमेश्वर के सेवा करते रहियै,  
हमरा सिनी जीवन भर हुनका सामना में पवित्र आरु धर्मी  
जीवन जीबे सकियै।

76-77 हे हमरो बाबू, आबे तोय परम-परमेश्वर के भविष्यवक्ता कहलैभैं,

तोय प्रभु के पैहने जैभैं आरु हुनको लोग सिनी कॅ मुक्ति के  
ज्ञान देभैं,

जे पाप के छमा सँ मिलै छै,

आरु ई तरहें प्रभु लेली रास्ता तैयार करभैं।

78 ई सभ्भे यहे लेली होतै कि हमरा सिनी के परमेश्वर बड्डी दयालु  
छै।

हमरा सिनी पर स्वर्ग सँ एगो रोशनी परगट हुवै वाला छै।

79 यहे लेली कि अन्हार आरु मौत के छाया में रहै वाला सिनी कॅ  
इंजोत मिलै

आरु शान्ति के रास्ता में अगुवाई हुवै।”

**80** बालक यूहन्ना बढ़े लागलै आरु आत्मिक रुप सँ मजबूत होलो गेलै। वें रेगिस्तान में बहुते साल बीतैलकै। तबे हुनी इसराएली लोग सिनी के बीद्यो में परगट होलै आरु आपनो काम सुरु करलकै।

### यीशु के जनम

**2** वहे समय में रोम के सम्राट औगुसतुस आदेश देलकै, कि ओकरो शासन में रहै वाला सभ्भे लोगो के जनगणना करलो जाय। <sup>2</sup>(ई पैहलो जनगणना वहे समय में होलो छेलै, जखनी क्विरीनियुस सुरिया राज्य के राज्यपाल छेलै) <sup>3</sup>जनगणना में नाम लिखाबै लेली सभ्भे कँ आपनो-आपनो पुरखा के नगर में जाना जरुरी छेलै।

**4** यूसुफो राजा दाऊद के वंश में सँ छेलै, यहै लेली ओकरहौ गलील के नासरत नगर सँ यहूदिया में राजा दाऊद\* के नगर बैतलहम जाय पड़लै। <sup>5</sup>वें मरियमो कँ संग लेलकै, जेकरो संग ओकरो छेका होलो छेलै। ई समय में मरियम के देह भारी छेलै।



**6** जखनी वें बैतलहम में छेलै, तबे ओकरो प्रसव समय नजदीक अयलै <sup>7</sup>आरु मरियम कँ पैहलो बेटा होलै। वें बच्चा कँ कपड़ा में लपेटी कँ गोहाली के नादो में राखलकै, कैहनेकि ओकरा वैनटां राखै लेली कोनो जग्घो नै छेलै।

**2:4** राजा दाऊद इसराएल के सबसे महान राजा छेलै, जे यीशु मसीह के जनम सँ लगभग 1000 साल पैहने राज करलको छेलै।

### यीशु जनम के खुशखबरी

**8** वहे रात में कुछ चरवाहा सिनी बैतलहम नगर सँ बाहर परती-परपट में आपनो भेड़ सिनी कँ जोगी रहलो छेलै।<sup>9</sup> अनचोके प्रभु के एगो स्वर्गदूत ओकरा सिनी के बीचो में अयलै आरु प्रभु के दिव्य रौशनी सँ ऊ जगह चमकी गेलै आरु डर सँ ओकरा सिनी के देह काँपी गेलै।

**10** तबे स्वर्गदूत ओकरा सिनी सँ कहे लागलै, “डरें नै! हम्में तोरा सिनी कँ एगो महान शुभ-संदेश सुनावै लेली अयलो छियौ, जे सभ्भे लोगो वास्ते छै।<sup>11</sup> तोरा सिनी के लेली मुक्तिदाता मसीहा के जनम आय राजा दाऊद के नगर बैतलहम में होलो छौ, जे परमेश्वर के द्वारा चुनलो गेलो राजा छै।<sup>12</sup> हुनका चिन्है लेली ई निशानी होतौ, कि तोरा सिनी कँ एगो बच्चा कपड़ा में लपेटलो आरु नादो में राखलो मिलतौ।”

**13** तबे अनचोके ऊ स्वर्गदूत के संग में बहुते स्वर्गदूत के झुंड दिखाय देलकै। वें सिनी ई कहतें हुवें परमेश्वरो के जय-जयकार करी रहलो छेलै, कि<sup>14</sup> “स्वर्ग में परमेश्वर के जय-जयकार हुवे आरु धरती पर ऊ लोगो कँ, जेकरा सिनी सँ परमेश्वर खुश छै, ओकरा सिनी के शान्ति मिलै।”

**15** जखनी स्वर्गदूत सिनी वैन्ठां सँ चल्लो गेलै, तँ चरवाहा सिनी अपना में कहे लागलै, “आबें, हमरा सिनी बैतलहम जाय के देखीयै, जे बात प्रभु हमरा सिनी कँ कहबैनें छै।”<sup>16</sup> आरु तुरते ऊ चरवाहा सिनी झटकी कँ बैतलहम चली देलकै आरु मरियम के संग यूसुफ कँ देखलकै आरु वैन्ठां सच्चे में ऊ बच्चा कँ नादो में राखलो देखलकै।<sup>17</sup> बच्चा देखी कँ चरवाहा सिनी नें ओकरा सिनी कँ बतैलकै, कि ऊ बच्चा के बारे में स्वर्गदूत ओकरा सिनी सँ की बतैलको छेलै।<sup>18</sup> ई सुनी कँ सभ्भे चकित होलै।

**19** लेकिन मरियम ई सभ्भे बातो कँ आपनो मोन्हें में राखी कँ ओकरा पर विचार करे लागलै।<sup>20</sup> तबे चरवाहा सिनी, जैसें कि ओकरा सिनी

सँ कहलो गेलो छेलै, सभ्भे कुछ वैसनं देखी आरु सुनी कँ परमेश्वर के जय-जयकार करते हुवें लौटी गेलै।

### यीशु के नाम राखलो गेलै

**21** मूसा के विधि-विधान के नियम मोताबिक आठ दिन बाद बच्चा के खतना के विधि पूरा होलै। तबे हुनको नाम “यीशु” राखलो गेलै, जे नाम हुनको माय मरियम के गर्भ में आबै सँ पैहनहैं स्वर्गदूत बतैने छेलै।

### विधि-विधान के नियम-पालन

**22-24** मूसा के विधि-विधान के मोताबिक, बच्चा जनम हुवै के बाद शुद्ध हुवै वास्तें एगो विधि पूरा करना जरूरी छेलै। यहे लेली यूसुफ आरु मरियम, “एक जोड़ा पड़ोकी या कबूतर के दू-गो बच्चा” कँ बलिदान दै वास्तें यरुशलेम के मंदिर में गेलै।

ओकरा सिनी कँ एगो आरु विधि पूरा करना छेलै, कैहनेकि विधि-विधान में यहो लिखलो छेलै, कि “जदि औरत के पैहलो बच्चा बेटा जनम हुवे, तँ ओकरा परमेश्वर लेली अर्पित करलो जाय।” यहे सभ्भे विधि कँ पूरा करै लेली ऊ दोनो यरुशलेम गेलै।

### सिमियोन कँ यीशु के दर्शन

**25** वहे समय यरुशलेम नगर में परमेश्वर के डर मानै वाला एगो धर्मी आदमी छेलै, जेकरो नाम सिमियोन छेलै। परमेश्वर के आत्मा ओकरा संग छेलै आरु वें इसराएल के शान्तिदाता के आबै के इन्तजार करी रहलो छेलै। <sup>26</sup>कैहनेकि परमेश्वर के आत्मा ओकरा पर परगट करलको छेलै, कि वें तब तलक नै मरतै, जब तलक वें परमेश्वर के चुनलो गेलो मसीहा कँ नै देखी लेतै, जे शान्तिदाता होतै।

**27** परमेश्वर के आत्मा सिमियोन कँ एक दिन मंदिर में जाय के मति देलकै। वहे दिन परमेश्वर के भविष्यवक्ता मूसा के विधि-विधान

मोताबिक मरियम आरू यूसुफ आपनो बच्चा कॅ परमेश्वर कॅ अर्पित करै लेली मंदिर में अयलै।

28 तबे सिमियोन यीशु कॅ अपनो गोदी में लेलकै आरू परमेश्वर के जय-जयकार करलकै आरू धन्यवाद देतें हुवें कहलकै, 29 “प्रभु, अपने के देलो वचन के मोताबिक आबे आपने के दास संतोष सँ प्राण त्यागे सकै छै, 30 कैहनेकि हम्मं आपनो आँखी सँ संसार के मुक्तिदाता कॅ देखी लेलियै, 31 जेकरा आपने सभ्भे देश आरू सभ्भे जाति के लोगो वास्ते भेजने छियै, 32 हुनको रौशनी परमेश्वर के सत्य के मार्ग, ओकरा सभ्भे कॅ देखैतै जे हुनका नै जानै छै आरू हुनी ‘इसराएल’ वास्ते गौरव के बात होतै।” 33 यूसुफ आरू मरियम यीशु के बारे में ई सभ्भे बात सुनी कॅ चकित होलै।

34 तबे सिमियोन ओकरा सिनी कॅ आशीर्वाद देलकै आरू बच्चा के माय मरियम सँ कहलकै, “देखें, इसराएल में बहुते लोग हुनको विरोध करतै आरू यहै कारणे ओकरा सिनी के पतन होतै, लेकिन दोसरा सभ्भे वास्ते हुनी नया जीवन मिलै के कारण होतै। 35 ई तरहें बहुत्तों के हृदय सँ बढ़ियाँ आरू खराब विचार परगट होतै। हे बेटी, एक दिन एसनो होतौ कि तोरहौ कलेजा शोक सँ भरी जैतौ, जैसे कि तलवार सँ आर-पार छेदलो जाय रहलो हुवे।”

### हन्नाह कॅ यीशु के दर्शन

36 वहे दिन हन्नाह नाम के एगो बहुते बूढ़ी औरत, जे परमेश्वर के भविष्यवक्तिनी छेलै, वहूँ मंदिरे में छेलै। वें फनूएल के बेटी छेलै, जे यहूदी लोग सिनी के असेर कुल के छेलै। वें व्याह हुवै के बाद साते साल तलक सुहागिन रहलो छेलै। 37 वें चौरासी साल के विधवा छेलै आरू मंदिर कॅ नै छोड़ै छेलै। वें उपवास आरू प्रार्थना करी कॅ रात-दिन परमेश्वर के भक्ति में लागलो रहै छेलै। 38 ऊ वहे समय में वैंन्टां अयलै जखनी सिमियोन मरियम आरू यूसुफ बात करी रहलो छेलै। वहूँ परमेश्वर

कँ धन्यवाद देलकै आरु जे लोग सिनी यरुशलेम के मुक्ति लेली रास्ता देखी रहलो छेलै, ओकरा सिनी कँ ऊ बच्चा के बारे में बताबे लागलै।

**39** यूसुफ आरु मरियम, जे प्रभु के विधि-विधान पूरा करै वास्तें यरुशलेम मंदिर अयलो छेलै, ओकरा सिनी कँ पूरा करलकै। ओकरो बाद बच्चा ले कँ ऊ दोनो गलील राज्य में आपनो नगर नासरत लौटी गेलै। <sup>40</sup> बच्चा बढ़े लागलै आरु मजबूत होलो गेलै। वें दिनो-दिन बुद्धि में बढ़लो गेलै आरु परमेश्वर के आशीर्वाद हुनका पर छेलै।

### बालक यीशु मंदिर में

**41** यीशु के माय-बाप हरेक साल फसह\* परब मनाबै लेली यरुशलेम जाय छेलै। <sup>42</sup> हर साल के तरहें वें सिनी एक दाफी यरुशलेम गेलो छेलै। वहे समय में यीशु के उमर बारह साल छेलै।

**43** परब समाप्त होला पर वें सिनी वापस आबे लागलै, लेकिन यीशु वहिन्ठां रही गेलै। ई बात हुनको माय-बाप कँ पता नै चललै। <sup>44</sup> वें सिनी सोचलकै, कि हुनी साथी-संगी के संग दोसरो यात्री सिनी के बीचो में होतै। लेकिन जखनी साँझो कँ हुनी दिखाय नै देलकै, तँ वें सिनी आपनो कर-कुटुम आरु जान-पहचान वाला सिनी में यीशु कँ खोजे लागलै। <sup>45</sup> जखनी यीशु ओकरा सिनी कँ नै मिललै, तँ खोजतें हुवें दोनो यरुशलेम वापस गेलै।

**46** आखरी में तेसरो दिन, वें सिनी हुनका मंदिरो में बैठलो आरु धर्म-गुरु सिनी के संग सवाल-जबाब करतें हुवें पैलकै। <sup>47</sup> जे सिनी हुनको बात सुनी रहलो छेलै, वें सिनी हुनको समझदारी आरु जबाबो सँ हक्का-बक्का छेलै। <sup>48</sup> हुनको माय-बाप सेहो चकित होलै। हुनको माय हुनका

---

**2:41** फसह परब यहूदी लोग सिनी के एगो खास परब छेलै, जेकरा में भेड़ के बलि देलो जाय छेलै। ई परब मिस्र देश के गुलामी सँ आजादी मिलै के याद में परमेश्वर के आज्ञा अनुसार सभ्भे साल मनैलो जाय छेलै।

सँ कहलकै, “रे बेटा, तोंय एसनो कैहनें करलहैं? तोरो बाबूजी आरु हममें तोरा खोजतें हुवें बड्डी व्याकुल छेलियौ।”

49 तबे यीशु ओकरा सिनी कँ कहलकै, “हमरा खोजै के कोन जरुरी छेलै? की अपने सिनी ई नै जानें छियै कि हमरा निश्चिते आपनो पिताजी के घर में होना चाहियो।” 50 लेकिन वें सिनी यीशु के कहै के माने नै समझलकै।

51 तबे यीशु ओकरा सिनी के संग नासरत नगर लौटी गेलै। वैन्ठां हुनी आपनो माय-बाप के बातो में रहे लागलै आरु हुनको माय ई सभ्भे बातो कँ आपनो मोन्हें में राखलकै। 52 यीशु बुद्धि आरु देह-दशा में बढलो गेलै। हुनी परमेश्वर के प्यारा छेलै आरु जे सिनी हुनका चिन्है-जानै छेलै, ओकरो सिनी के प्यारा छेलै।

### यूहन्ना के संदेश

**3** 1-2 जे समय में रोमन सम्राट\* तिबिरियुस के राज्य के पनरमा साल चली रहलो छेलै,

वहे समय ऊ राज्य के अधीन में:

राजा पुन्तियुस पिलातुस यहूदिया राज्य के,

राजा हेरोदेस गलील राज्य के,

ओकरो भाय राजा फिलिपुस इतूरिया-त्रखोनीतिस राज्य के,

राजा लुसानियास अबिलेन राज्य के शासक छेलै।

साथहै वहे समय में महा-पुरोहित के पद पर हन्ना आरु कइफा छेलै। वहे समय छेलै जखनी जकरयाह के बेटा यूहन्ना लिगां रेगिस्तान में परमेश्वर के वचन पहुँचलै।

3 यूहन्ना यरदन नदी के आस-पास समुच्चे इलाका में जगह-जगह जाय कँ प्रचार करे लागलै। वें कहलकै, “पाप सँ छमा पाबै वास्तें

---

3:1-2 मूल में ‘कैसर’ शब्द देलो गेलो छै, जेकरो माने छेकै समराट।

आपनो पापो सँ मुँह मोड़ी कँ हृदय-परिवर्तन करें आरु एकरो चिन्ह के रूप में बपतिस्मा\* ले।” 4 यूहन्ना के काम सँ ऊ बात पूरा होलै, जे बात बहुते पैहन्हैं परमेश्वर के भविष्यवक्ता यशायाह के किताब में लिखलो गेलो छेलै:

“रेगिस्तान में एगो आदमी अयतै, जे पुकारी कँ कहतै,  
 ‘प्रभु के आबै लेली रास्ता तैयार करें,  
 हुनका आबै लेली रास्ता कँ सीधा बनाबें,  
 5 हरेक घाटी भरी देलो जैतै आरु हरेक पहाड़ आरु टिल्हा कँ नीचा  
 करलो जैतै,  
 आरु जे टेढ़ा-मेढ़ा छै, ओकरा सीधा आरु जे ऊँचा-नीचा छै,  
 ओकरा चौरस बनैलो जैतै।

6 आरु सभ्भे लोग परमेश्वर के देलो मुक्ति कँ देखतै।’ ”

7 झुण्ड के झुण्ड यूहन्ना सँ बपतिस्मा लियै वास्तें निकली कँ आबै छेलै, ओकरा सिनी सँ यूहन्ना कहै छेलै, “हे साँपो के बच्चा सिनी, तोरा सिनी अखनी तलक सच्चे में आपनो मोन नै फिरैलो छैं। एकरो बाबजूदो तोरा सिनी अपने-आप में कैसें सोची लेलहैं, कि परमेश्वर के आबै वाला कोप सँ बची जैभें? 8 जो, पैहनें पाप सँ आपनो मन फिराबें आरु आपनो जिन्दगी जियै के तरीका सँ एकरा साबित करें। आबे ई नै सोचें लागिहैं कि हमरा सिनी अब्राहम के सन्तान छियै, तँ हमरा सिनी बची जैबै। एतन्हैं सँ कुच्छो साबित नै होय वाला छै। हम्में तोरा सँ कहै छियौ, कि परमेश्वर तँ ई पत्थरो सँ अब्राहम वास्तें संतान बनाबे सकै छै। 9 हुनको न्याय के कुल्हाड़ी गाछी के जड़ो पर राखलो छै, कैहनेकि जे भी गाछी में बढ़ियाँ फल नै लागतै, ओकरा काटी कँ आग में झोंकलो जैतै।”

10 तबे लोग सिनी पुछलकै, “तँ हमरा सिनी की करियै?” 11 यूहन्ना ओकरा सिनी कँ कहलकै, “जदि तोरो पास दूगो कुर्ता छौ, तँ एगो कुर्ता

---

3:3 बपतिस्मा एगो विधि छेकै, जे पानी सँ करलो जाय छै।

ओकरा दे दहें, जेकरो पास नै छै आरु जेकरो पास खाना छौ, वहूं वैसनें करें।”

12 रोमन सरकार के तरफ सँ चुंगी वसूलै वाला तहसीलदारो सिनी, जे सिनी समाज में बदनाम छेलै, यूहन्ना सँ बपतिस्मा लियै वास्तें अयलै। वें सिनी यूहन्ना सँ पुछलकै, “हे गुरु, हमरा सिनी की करियै?” 13 यूहन्ना जबाब देलकै, “सरकार जेतना चुंगी वसूलै के आदेश देलको छौ, ओकरा सँ बेसी नै वसूलें।” 14 सिपाही सिनी जे वैनंठां जमा छेलै, ऊहो सिनी पुछलकै, “आरु हमरा सिनी कॅ की करना चाहियो?” यूहन्ना जबाब देलकै, “जोर-जबरदस्ती करी कॅ या केकरहौ झूठ-मूठ में फँसाय कॅ पैसा नै वसूलें, पर आपनो दरमाहै सँ संतोष करें।”

15 भीड़ो में बड़ा जिज्ञासा उत्पन्न होय गेलै, कैहनेकि यहूदी लोग सिनी आपनो मुक्तिदाता के आबै के इन्तजार करी रहलो छेलै, यहे लेली वें सिनी ई सोचे लागलै कि कहीं वहे तँ मसीहा नै छिकै, जेकरो इन्तजार वें सिनी करी रहलो छेलै। 16 यूहन्ना जबाबो में कहलकै “हुनी जे आबै वाला छै, हमरा सँ बेसी सामर्थी छै आरु हम्मं तँ हुनको जुत्ता के फीतो खोलै लायक नै छियै। जखनी हम्मं बपतिस्मा दै छियौ, तँ तोरा पानी सँ धोबै छियौ, लेकिन हुनी तोरा सिनी कॅ परमेश्वर के आत्मा सँ धोतौ\* आरु तोय वहे तरहें शुद्ध करलो जैभैं, जैसं कि सोना आग में शुद्ध करलो जाय छै।

17 हुनी हाथ में सुप ले करी कॅ आपनो खलिहान में आबी गेलो छै। हुनी दाना कॅ भुस्सी सँ अलग करतै। दाना कॅ हुनी आपनो कोठी में जमा करतै, लेकिन भुस्सी कॅ कहियौ नै बुताबै वाला आग में फेकी देतै।”

18 यूहन्ना बहुते उदाहरण देतें हुवें आरु दोसरो तरहें लोग सिनी कॅ परमेश्वर के शुभ-संदेश सुनैलकै।

---

3:16 मूल में लिखलो छै “हुनी तोरा सिनी कॅ परमेश्वर के आत्मा आरु आग सँ बपतिस्मा देतौ”

19 बादो में एसनो होलै कि वहाँकरो राजा हेरोदेस बहुते गलत काम करलको छेलै। एगो गलत काम यहो करलको छेलै कि ऊ आपनो भाय फिलिपुस के घरवाली हेरोदियास के संग गलत रिश्ता राखलको छेलै। जखनी यूहन्ना राजा हेरोदेस पर ई सभ्भे गलत काम करै के कारनें दोष लगैलकै 20 तबे हेरोदेस ओकरा जेल में बंद करवाय देलकै आरु ई तरहें ऊ एगो आरु कुकर्म करलकै।



### प्रभु यीशु के बपतिस्मा

21 एक दिन जखनी लोग सिनी बपतिस्मा ले रहलो छेलै, तँ यीशुवो बपतिस्मा लियै वास्तें अयलै। बपतिस्मा लेला के बाद जखनी हुनी प्रार्थना करी रहलो छेलै, तखनियें आकाश खुली गेलै। 22 आरु परमेश्वर के आत्मा एगो कबूतर के रूप में हुनका पर उतरलै आरु तखनियें आकाशवाणी होलै “तोंय हमरो प्यारा बेटा छै, हम्में तोरा सँ बहुते खुश छियौ।”

### यीशु के वंशावली

23 जखनी यीशु आपनो सेवा के काम सुरु करलकै, तखनी हुनी लगभग तीस बरस के छेलै। जैसे कि सभ्भे लोग सोचै छेलै, कि यीशु यूसुफ के बेटा छेकै, आरु यूसुफ एलि के बेटा छेकै। 24 आरु ई वंशावली के पिछलका पीढ़ी-क्रम छेलै-

एलि, मातताक, लेवी, मलकि, यनना, यूसुफ,

25 मतितयाह, आमोस, नहूम, असलयाह, नोगह,

26 मात, मतितयाह, सिमि, योसेख, योदाह,

- 27 यूहन्ना, रेसा, जरुबबाबिल, सालतियेल, नेरि,  
 28 मलकि, अददि, कोसाम, ईलमोदाम, ऐर,  
 29 येसू, ईलाजार, योरिम, मततात, लेवी,  
 30 सिमोन, यहूदाह, यूसुफ, योनान,  
 31 ईलयाकिम, मलेआह, मिननान, मततता, नातान, दाऊद  
 32 यिसै, ओबेद, बोअज, सलमोन, नहसोन,  
 33 अममिनादाब, अरनि, हिसतरोन, फिरिस, यहूदाह,  
 34 याकूब, ईसहाक, अब्राहम, तिरह, नाहोर,  
 35 सरुग, रऊ, फिलिग, एबिर, सिलह,  
 36 केनान, अरफक्षद, सेम, नूह, लिमिक,  
 37 मथूसिलह, हनोक, यिरिद, महललेल, केनान,  
 38 एनोस, सेत, आदम, आरु आदम परमेश्वर के पुत्र\* छेलै।

### यीशु कें पाप में गिराबै के कोशिश

**4** परमेश्वर के आत्मा\* सँ पूरा तरहें भरलो यीशु यरदन नदी सँ लौटलै। ओकरो बाद परमेश्वर के आत्मा हुनका सुनसान रेगिस्तान में जगह-जगह जाय के मति देलकै।<sup>2</sup> जैन्ठां परमेश्वर के दुश्मन यानि शैतान चालीस दिन तलक यीशु कें पापो में गिराबै लेली परीक्षा करते रहलै। कैहनेकि एतना दिन तलक यीशु उपवास करी रहलो छेलै, यहे वास्तें एतना समय पूरा होला पर हुनका बड्डी भुख लागलै।<sup>3</sup> तबे शैतान यीशु सँ कहलकै, “जदि अपने परमेश्वर के पुत्र छियै, तँ ई पत्थर सँ कहियै कि रोटी बनी जाय”<sup>4</sup> एकरा पर यीशु ओकरा जबाब देलकै, “परमेश्वर के पवित्र-शास्त्र में लिखलो छै, कि आदमी खाली रोटियें सँ जिन्दा नै रहतै।”

---

**3:38** आदम पैहलो आदमी छेलै, जेकरा परमेश्वर आपनो हाथो सँ बनैलकै। आरु जानै लेली देखियै बाइबिल में पुराना नियम में ‘उत्पत्ति’ के किताब अध्याय 1 आरु 2 **4:1** मूल में “परमेश्वर के आत्मा” के ‘पवित्र-आत्मा’ कहलो गेलो छै।

<sup>5</sup> ओकरो बाद शैतान हुनका ऊँच्यो जगघो पर ले गेलै आरु एक्के पल में संसार के सभ्भे राज्य देखाय देलकै, <sup>6</sup> आरु हुनका सँ कहलकै, “हम्मैं ई सभ्भे अधिकार आरु एकरो शानो-सौकत अपने कँ देबै, कैहनेकि ई सभ्भे हमरा सौंपलो गेलो छै, आरु हम्मैं जेकरा चाहियै ओकरा ई सभ्भे दे सकै छियै। <sup>7</sup> यहे लेली जदि अपने हाथ जोड़ी कँ हमरा दंडवत करियै, तँ ई सभ्भे अपने के होय जैतै।” <sup>8</sup> यीशु जबाब देलकै, “परमेश्वर के पवित्र-शास्त्र में लिखलो छै, कि ‘तोय सच्चा जिन्दा प्रभु-परमेश्वर के आराधना करें आरु केवल हुनकहै आज्ञा मानलो करें’।” <sup>9</sup> तेकरो बाद शैतान यीशु कँ यरुशलेम आनी कँ मंदिर के गुंबज पर ले गेलै आरु हुनका सँ कहलकै, “जदि अपने परमेश्वर के पुत्र छियै, तँ यैन्ठां सँ नीचा कूदी जैयै। <sup>10</sup> कैहनेकि परमेश्वर के पवित्र-शास्त्र में लिखलो छै, कि

‘परमेश्वर अपने कँ बचाबै वास्तें स्वर्गदूत सिनी कँ आदेश देतै <sup>11</sup> आरु वें सिनी अपने कँ गोदी में लोकी लेतै,

ताकी अपने के गोड़ में पत्थर सँ ठेस नै लागै।’”\*

<sup>12</sup> यीशु जबाब देलकै, “परमेश्वर के पवित्र-शास्त्र में यहो लिखलो छै, कि ‘तोय सच्चा जिन्दा प्रभु-परमेश्वर कँ जाँचै के कोशिश नै करें।’”\* <sup>13</sup> जखनी यीशु कँ पाप में फसाबै के सभ्भे तरह के परीक्षा शैतान करी चुकलै, तँ ऊ अगला मौका के ताक में कुछ समय लेली यीशु कँ छोड़ी कँ चल्लो गेलै।

### गलील क्षेत्र में यीशु के काम के सुरुआत

<sup>14</sup> ओकरो बाद यीशु गलील क्षेत्र लौटी गेलै, आरु परमेश्वर के आत्मा के सामर्थ हुनको संग छेलै आरु हुनको अगुवाई करै छेलै। हुनको चर्चा अगल-बगल के पूरा इलाका में फैली गेलै। <sup>15</sup> हुनी यहूदी

---

4:11 परमेश्वर के पवित्र-शास्त्र में भजन-संहिता 91 के 12, 13वाँ पद। 4:12 परमेश्वर के पवित्र-शास्त्र में पुराना नियम के छठा अध्याय के सोलहमा पद।

धर्म सभा-भवन में उपदेश दै छेलै आरु वैनंठां जमा सभ्भे लोग हुनको बड़ाई करै छेलै।

### नासरत में यीशु के विरोध

16 फेनू यीशु नासरत नगर में अयलै, जैन्ठां हुनको लालन-पालन होलो छेलै। हुनी आपनो तौर-तरीका के अनुसार यहूदी लोग सिनी के आराम के दिन पर ओकरा सिनी के धर्म सभा-भवन में गेलै आरु वैनंठां परमेश्वर के पवित्र-शास्त्र पढ़ै लेली खड़ा होलै।<sup>17</sup> हुनका परमेश्वर के भविष्यवक्ता यशायाह के लिखलो किताब पढ़ै लेली देलो गेलै। हुनी किताब सँ ऊ भाग खोललकै जैन्ठां लिखलो छेलै: <sup>18</sup> “परमेश्वर के आत्मा हमरा पर छै, कैहनेकि हुनी कंगाल सिनी कँ शुभ-संदेश सुनाबै लेली तिलक करी कँ हमरा चुनलको छै। हमरा यह वास्ते भेजलो गेलो छै, कि हममें बंदी सिनी कँ आजादी, अंधा सिनी कँ आंख आरु दबलो-कुचल्लो कँ छुटकारा मिलै के घोषणा करियै।”<sup>19</sup> आरु ई बात के प्रचार करियै कि “प्रभु के दया-दृष्टि करै के समय आबी गेलो छै।”<sup>\*</sup> <sup>20</sup> तबे हुनी किताब बंद करी कँ धर्म सभा-भवन के व्यवस्थापक के हाथो में देलकै आरु बैठी गेलै। तबे वहाँकरो सभ्भे लोग टकटकी लगाय कँ हुनका देखे लागलै।

21 ओकरो बाद हुनी कहे लागलै “परमेश्वर के पवित्र-शास्त्र में लिखलो भविष्यवाणी के बात आय्ये तोरा सिनी के सामना में पूरा होलो।”

22 सभ्भे लोग चकित होय कँ यीशु के बड़ाई करे लागलै, कि कृपा सँ भरलो केतना मीठा-मीठा बात हुनको मुँह सँ निकलै छै। आरु वें सिनी आश्चर्य सँ भरी कँ आपना में कहे लागलै, “अरे! ई तँ यूसुफे के बेटा छेकै नें?”<sup>23</sup> तबे यीशु ओकरा सिनी कँ कहलकै, “तोय सिनी ई

---

4:19 परमेश्वर के पवित्र-शास्त्र के पुराना नियम में यशायाह के किताब में अध्याय 61:1-2 पद।

कहावत हमरा जरुरे कहभैं कि 'हो वैधजी, पैहने अपने-आप कँ ठीक करियै!' आरु ई बात कँ साबित करै लेली ऊ सभ्भे चमत्कार आपनो नगरो में करियै, जे हमरा सिनी सुनलियै कि अपने कफरनहुम नगर में करने छियै।" <sup>24</sup> यीशु आगु कहलकै "हम्मं तोरा सँ सच-सच कहै छियौ, कि परमेश्वर के कोय्यो भविष्यवक्ता कँ आपनो नगर में मान-सम्मान नै मिलै छै। <sup>25</sup> आरु हम्मं तोरा सँ सच कहै छियौ कि बहुते साल पैहने इसराएल देश में परमेश्वर के एगो भविष्यवक्ता एलियाह छेलै। ओकरो समय में साढ़े तीन साल तक वैनंटां बरसा नै होलै, तँ समुच्चे देश में भयंकर अकाल पड़लो छेलै। आरु ऊ समय में इसराएल देश में बहुते विधवा सिनी छेलै <sup>26</sup> लेकिन परमेश्वर नें आपनो भविष्यवक्ता एलियाह कँ ओकरो में सँ केकरो पास नै भेजलकै। लेकिन एलियाह कँ इसराएल देश के बाहर सीदोन नगर लिगां सारफत गाँव में रहैवाली एगो विधवा लिगां भेजलो गेलै। <sup>27</sup> आरु वैसें ही एक समय में वहे इसराएल देश में परमेश्वर के एगो भविष्यवक्ता एलिशा छेलै। ओकरो समय में ऊ देश में बहुते कोढ़ी छेलै। एलिशा इसराएल में रहैवाला कोनो कोढ़ी कँ ठीक नै करलकै। लेकिन इसराएल देश के बाहर सिरिया देश में रहैवाला नमान नाम के कोढ़ी कँ ठीक करलकै।"

**28** ई बात सुनतें ही यहूदी धर्म सभा-भवन में बैठलो लोग सिनी गुस्सा सँ तिलमिलाय गेलै <sup>29</sup> आरु वें सिनी उठी कँ यीशु कँ खीचतें हुवें ऊ पहाड़ के चोटी पर ले गेलै, जेकरा पर ऊ नगर बसलो छेलै। वें सिनी हुनका वैनंटां सँ नीचा धकेली दै वास्ते चाहै छेलै, यहै वास्ते हुनका खींची कँ ऊ पहाड़ के ऊपर वाला कनछी तलक ले गेलै। <sup>30</sup> लेकिन यीशु भीड़ सँ निकली कँ चलो गेलै।

**दुष्टात्मा लागलो आदमी ठीक करलो गेलै**

**31** एकरो बाद यीशु गलील क्षेत्र के कफरनहुम नगर में गेलै आरु यहूदी धर्म-सभा भवन में ओकरा सिनी के आराम के दिन में शिक्षा दे

रहलो छेलै।<sup>32</sup> यैन्ठों लोग सिनी हुनको शिक्षा सँ चकित होलै, कैहनेकि हुनी अधिकार के साथ शिक्षा दे रहलो छेलै।

**33** वहिन्ठां सभा-भवन में एगो आदमी ऐसनो छेलै, जेकरा दुष्टात्मा लागलो छेलै। ऊ जोर सँ चिल्लाय उठलै,<sup>34</sup> “हे नासरत नगर के रहैवाला यीशु, अपने कँ हमरा सिनी सँ कोन काम? की अपने हमरा सिनी कँ नाश करै वास्तें अयलो छियै? हम्मं जानै छियै कि अपने के छेकै। अपने परमेश्वर के पवित्र लोग छियै।”

**35** तबे यीशु ओकरा डाँटी कँ कहलकै, “चुप रह आरु एकरा में सँ निकली जो!” एकरा पर दुष्टात्मा\* ऊ आदमी कँ सभ्भे के सामना में पटकी देलकै आरु बिना कोनो हानि पहुँचैले ओकरो देह सँ बाहर निकली गेलै।<sup>36</sup> एकरा पर सभ्भे कोय चकित होय गेलै आरु वें सिनी अपना में कहे लागलै, “ई कैसनो वचन छेकै? कैहनेकि हुनी अधिकार आरु शक्ति के साथ दुष्टात्मा सिनी कँ आदेश दै छै आरु वें सिनी बाहर निकली जाय छै!”<sup>37</sup> ई तरहें चारो तरफ हरेक जगह यीशु के ई काम के ढिंढोरा पिटाय गेलै।

### बीमार लोगो कँ ठीक करना

**38** यीशु यहूदी धर्म सभा-भवन सँ निकली कँ सिमोन परतस नाम के एगो आदमी के घर गेलै। वैनठां सिमोन के सास बोखार सँ बड्डी बीमार छेलै आरु लोग सिनी यीशु सँ ओकरा ठीक करै लेली विनती करलकै।<sup>39</sup> यीशु ओकरो पास खड़ा होय कँ बोखार कँ डाँटलकै आरु बोखार तुरंते उतरी गेलै। तबे ऊ तुरंते उठी कँ हुनका सिनी के सेवा-टहल करे लागलै।

**40** साँझ होला पर नगर में जेकरा-जेकरा घर में रोगी छेलै, वें सिनी ओकरा यीशु लिगां लानलकै आरु हुनी एक-एक करी कँ सभ्भे रोगी पर हाथ राखलकै आरु सभ्भे कँ ठीक करलकै।<sup>41</sup> आरु बहुत्ते रोगी

में सँ दुष्टात्मा सिनी चिल्लाय कँ ई कहते हुवे बाहर निकली गेलै, कि “अपने परमेश्वर के पुत्र छेकियै।” दुष्टात्मा सिनी जानै छेलै, कि हुनी मुक्तिदाता मसीहा छिकै, यहे लेली यीशु ओकरा सिनी कँ डाँटलकै आरु चुप रहै लिये कहलकै।

**42** अगला दिन भोर होते हीं यीशु एकांत जग्घो में चल्लो गेलै। भीड़ हुनका खोजते हुवे हुनको पास अयलै आरु यीशु कँ रोके लागलै, कि हुनी ओकरा सिनी कँ छोड़ी कँ नै जाय। <sup>43</sup> एकरा पर यीशु जबाब देलकै, “हमरा दोसरो-दोसरो जग्घो में भी परमेश्वर के राज्य के शुभ-संदेश सुनाना जरुरी छै, कैहनेकि हमरा यहे वास्ते भेजलो गेलो छै।” <sup>44</sup> आरु ई तरहें हुनी यहूदिया राज्य के धर्म सभा-भवन सब में जाय कँ प्रचार करते रहलै।

### यीशु के पैहलो चेला

**5** एक दिन जखनी यीशु गन्नेसरत नाम के झील\* के किनारा पर खड़ा छेलै, तँ वैनटां परमेश्वर के वचन सुनै लेली बड़का भीड़ ठेलम-ठेला करतें हुवे जमा होय गेलै। <sup>2</sup> यीशु के नजर झील के किनारा में लागलो दूगो नाव पर पड़लै। हुनी देखलकै कि मछुवा सिनी आपनो-आपनो नाव पर सँ उतरी कँ जाल धोय रहलो छै। <sup>3</sup> तबे यीशु सिमोन मछुवा के नाव पर चढ़ी कँ ओकरा सँ नाव कँ किनारा सँ हटाय कँ थोड़ो दूर ले जाय वास्तें कहलकै। तबे यीशु बैठी कँ नावे पर सँ लोग सिनी कँ उपदेश दै लागलै।

**4** उपदेश खतम करला के बाद हुनी सिमोन सँ कहलकै, “नाव कँ गहरा पानी में ले चलें आरु मछली पकड़ै लेली जाल डालें।” <sup>5</sup> एकरा पर सिमोन जबाब देलकै, “हे मालिक, हमरा सिनी पूरा रात मेहनत करलियै लेकिन एक्कोटा मछली नै पकड़े सकलियै। फेनू भी आपने के

---

5:1 गनेसरत झील कँ गलील सागरो कहलो जाय छै।

कहला पर जाल डालबै।”<sup>6</sup> जखनी वें सिनी जाल डाललकै, तँ ओकरा में एतना मछली फँसी गेलै कि जाल फाटे लागलै।<sup>7</sup> एकरा पर वें सिनी दोसरका नाव पर के साथी सिनी कँ ईशारा करी कँ मदद करै लेली बोलैलकै। वें सिनी आबी कँ दोनो नावो में एतना मछली भरी लेलकै कि नाव डुबे लागलै।

**8** ई देखी कँ सिमोन पतरस यीशु के गोड़ पर गिरी कँ कहे लागलै, “हे स्वामी, हम्में पापी आदमी छियै आरु आपने के लायक नै छियै, यह लेली आपने हमरा पास सँ दूर चल्लो जैयै।”<sup>9</sup> कैहनेकि सिमोन आरु ओकरो साथी सिनी एतना मछली पकड़ला सँ चकित होय गेलो छेलै।<sup>10</sup> जबदी के बेटा याकुब आरु यूहन्ना जे सिमोन के साथ काम करै छेलै, ऊहो दोनो चकित होय गेलै।

एकरा पर यीशु सिमोन सँ कहलकै, “डरें नै, अखनी सँ तोंय मछली पकड़ै के काम छोड़ी कँ लोग सिनी कँ हमरो पास लानै के काम करभै।”<sup>11</sup> तेकरो बाद वें सिनी नाव कँ किनारा पर लानलकै आरु सभ्भे कुछ वहिन्टा छोड़ी कँ यीशु के पीछु होय गेलै।

### कोढ़ी के ठीक करलो गेलै

**12** जखनी यीशु एगो नगर में छेलै, तँ वैन्टां एगो कोढ़ सँ पूरा भरलो आदमी अयलै। वें यीशु कँ हाथ जोड़ी दंडवत करी कँ हुनका सँ विनती करलकै, “हे स्वामी, आपने चाहबै तँ हमरा पूरा तरहें शुद्ध करे सकै छियै।”<sup>13</sup> एकरा पर यीशु आपनो हाथ बढ़ाय कँ कोढ़ी कँ छुलकै आरु कहलकै, “हम्में चाहै छियै, तोंय शुद्ध होय जो।” आरु तुरंते ऊ कोढ़ी शुद्ध होय गेलै।<sup>14</sup> तबे यीशु ओकरा आदेश देलकै, “केकरो सँ ई बात नै बताबिहैं, लेकिन जाय कँ अपने-आप कँ पुरोहित कँ देखाबें ताकि ऊ तोरो शरीर कँ जाँची कँ देखौ। आरु परमेश्वर के भविष्यवक्ता मूसा के विधि-विधान के अनुसार शुद्ध हुवै वास्ते जे चढ़ावा चढ़ाबै के आदेश देलो गेलो छौ, ऊ चढ़ावा चढ़ाबें। ताकि सभ्भे लोगो के सामना

में गवाही ठहरी जैतै, कि तोंय शुद्ध होय गेलो छै।”<sup>15</sup> लेकिन यीशु के ऐसनो कहला के बाबजूदो ओकरो चर्चा चारो तरफ फैली गेलै। तबे बड़का भीड़ यीशु के वचन सुनै लेली आरु आपनो बीमारी सँ ठीक हुवै लेली जमा हुवे लागलै।<sup>16</sup> लेकिन यीशु प्रायः अलग जाय कँ एकांत जग्घो में प्रार्थना करलो करै छेलै।

**17** एक दिन यीशु कोनो घर में उपदेश दे रहलो छेलै। हुनका पास में फरिसी\* आरु विधि-विधान के गुरुजी सिनी बैठलो छेलै। वें सिनी गलील आरु यहूदिया के लगभग हरेक गाँव सँ आरु यरुशलेमो सँ अयलो छेलै। रोगी सिनी कँ ठीक करैवाला प्रभु के शक्ति यीशु के संग छेलै।

### यीशु द्वारा लकवा रोगी कँ ठीक करना

**18** वहे समय में कुछ लोग सिनी मिली कँ एगो खटिया पर लकवा मारलो एगो रोगी ले कँ अयलै। वें सिनी कोशिश करलकै कि ओकरा भीतर ले जाय कँ यीशु के आगु में राखी देलो जाय।<sup>19</sup> लेकिन भीड़ के कारनं वें सिनी यीशु लिगां नै पहुँचे सकलै। तबे वें सिनी बगल वाला सीढ़ी सँ ऊपर छत पर चढ़ी गेलै आरु खपड़ा हटाय कँ खटिया सहित रोगी कँ यीशु के ठीक सामना में उतारी देलकै।<sup>20</sup> यीशु ओकरा सिनी के विश्वास देखी कँ लकवा के रोगी सँ कहलकै, “हे भाय, तोरो पाप सब छमा होय गेलौ।”<sup>21</sup> तबे फरिसी सिनी आरु धर्म-गुरु सिनी आपना में सोचे लागलै, कि “ई आदमी अपने-आप कँ की समझै छै? ई तँ परमेश्वर के अपमान करै वाला बात कहै छै। परमेश्वर कँ छोड़ी आरु के छै, जे पाप के छमा करे सकै छै?”<sup>22</sup> यीशु ओकरा सिनी के मोन के विचार जानी गेलै। आरु हुनी ओकरा सिनी कँ पुछलकै, “तोंय सिनी आपनो मोन्हें की वाद-विवाद

---

5:17 यहूदी लोग सिनी के एगो प्रतिष्ठित धार्मिक पंथ के लोग सिनी, जे सिनी परमेश्वर के भविष्यवक्ता मूसा के देलो विधि-विधान आरु ओकरा सँ जुड़लो कर्मकांड सिनी कँ बहुते कड़ाई के साथ पालन करै छेलै। वें सिनी आपना कँ धर्मी बुझै छेलै।

करै छै? <sup>23</sup> तोरा सिनी के विचार में आसान की छौ? ई कहना कि 'तोरो पाप छमा होलौ' या ई कहना कि 'उठें आरु चलें-फिरें'? <sup>24</sup> यहे वास्ते तोरा सिनी ई जानी ले कि एकमात्र मनुष्य-पुत्रे\* कँ धरती पर पापो कँ छमा करै के अधिकार छै, आरु ऊ मनुष्य-पुत्र हम्मं छेकियै।" तबे यीशु लकवा के रोगी के तरफ मुड़ी कँ कहलकै, "उठें, आपनो खटिया उठा आरु घर जो।" <sup>25</sup> ऊ तुरंते उछली कँ सभ्भे के सामना में खड़ा होय गेलै आरु आपनो खटिया उठाय कँ परमेश्वर के बड़ाई करतें हुवें आपनो घर चल्लो गेलै। <sup>26</sup> जे सभ्भे वैनटां छेलै, वें सिनी चकित होय गेलै आरु अचंभा सँ भरी कँ कहे लागलै, "आय तँ हमरा सिनी बड्डी अनोखा बात देखलियै।"

### लेवी कँ यीशु द्वारा बोलैलो जाना

<sup>27</sup> बादो में जखनी यीशु ऊ नगर सँ बाहर जाय लागलै, तबे लेवी नाम के एगो तहसीलदारो कँ तहसीलैवाला चौकी पर बैठलो देखलकै। तबे यीशु ओकरा कहलकै, "हमरो पीछु आबी जो आरु हमरो चेला बनी जो।" <sup>28</sup> एकरा पर लेवी खड़ा होय गेलै आरु सभ्भे कुछु छोड़ी कँ हुनको पीछु होय गेलै। <sup>29</sup> बादो में लेवी यीशु कँ आदर दै लेली आपनो घर में भोज देलकै। लेवी के बहुत्ते साथी तहसीलदार आरु लोग सिनी ओकरा सिनी के संग खैलकै। <sup>30</sup> एकरा पर फरिसी सिनी आरु विधि-विधान के धर्म-गुरु सिनी यीशु के चेला सिनी सँ शिकायत करे लागलै, "तोंय सिनी ऐसनो पापी लोग आरु तहसीलदारो सिनी के संग में खाना-पीना कैहने खाय छै?" <sup>31</sup> यीशु ओकरा सिनी कँ जबाब देलकै, "भला-चंगा लोगो कँ नै, बल्कि रोगीये सिनी कँ वैध के जरुरी होय छै। <sup>32</sup> यहे तरहें हम्मूँ यहे लेली नै अयलो छियै, कि ओकरा सिनी कँ बोलैये जे खूद कँ

धर्मी बुझै छै, लेकिन हममें तँ पापी सिनी कँ बोलाबै लेली अयलो छियै, ताकि वें सिनी आपनो हृदय-परिवर्तन करै।”

### उपवास पर यीशु के जबाब

**33** धार्मिक अगुआ सिनी यीशु सँ कहलकै, “बपतिस्मा दै वाला यूहन्ना के चेला सिनी तँ बार-बार उपवास करै छै आरु प्रार्थनों में लागलो रहै छै, वैसें हीं फरिसी सिनी के चेलो सिनी करै छै, लेकिन अपने के चेला सिनी तँ खैयते-पीते रहै छै।”

**34** एकरा पर यीशु जबाब देलकै, “जब तलक शादी में आबै वाला बराती सिनी के संग में दुल्हा छै, तब तलक बराती सिनी उपवास करै छै की? बिल्कुले नै! <sup>35</sup> लेकिन ऊ दिन अयतै जखनी दूल्हा कँ बराती सिनी के बीद्यो सँ दूर करी देलो जैतै, तबे वें सिनी उपवास करतै।” <sup>36</sup> तबे यीशु ओकरा सिनी कँ ई समझैलकै, कि फरिसी सिनी आरु विधि-विधान के गुरु सिनी के बनैलो पुरनका नियम-कानून आरु यीशु के देलो शिक्षा सब एक-दोसरा के संग ठीक मेल नै खाय छै। हुनी ओकरा सिनी कँ ई उदाहरण देलकै, “कोय्यो आदमी लबका कपड़ा में सँ फाड़ी कँ पुरनका कपड़ा में चिप्पी नै लगाबै छै, नै तँ लबका कपड़ा भांगी जैतै आरु ऊ चिप्पी पुरनका कपड़ा में मेलो नै खैतै। <sup>37</sup> वहे तरहें कोय्यो आदमी ताजा अंगूर के रस कँ ढक्कन लागलो पुरनका आरु कमजोर मसका\* में नै राखै छै, नै तँ ताजा अंगूर के रस जखनी खट्टा होय कँ गैस बनैतै, तँ ऊ गैस सँ मसका भांगी जैतै आरु रस बही जैतै। <sup>38</sup> यहै लेली ताजा अंगूर के रस बिना ढक्कन वाला नया मजबूत मसके में राखलो जाय छै। <sup>39</sup> वहे तरहें पुरनका अंगूर के रस पीला के बाद कोय्यो लबका अंगूर के रस पीयै के इच्छा नै करै छै, कैहनेकि वें सिनी कहै छै कि पुरनके अंगूर के रस बढ़िया छै।”

5:37 मूल में मसका के जगह पर छै- चमड़ा के थैली।

### यीशु आराम दिन के भी मालिक छैकै

**6** एक दाफी यहूदी लोग सिनी के आराम दिन में यीशु आपनो चेला सिनी के संग खेत सँ गुजरी रहलो छेलै। हुनको चेला सिनी गहुँम के सिसो तोड़ी-तोड़ी कँ आरु हाथ सँ मली-मली कँ खाबे लागलै।<sup>2</sup> एकरा पर कुछ फरिसी लोग सिनी कहे लागलै, “जे काम आराम के दिन में मना छै, ऊ काम तोरा सिनी कैहने करै छै?”

**3** यीशु जबाब देलकै, “की तोरा सिनी परमेश्वर के पवित्र-शास्त्र में कहियौ नै पढ़लो छै, कि बहुते साल पैहने एक दाफी जखनी राजा दाऊद आरु ओकरो साथी सिनी भुखलो छेलै, तँ ऊ की करलकै? <sup>4</sup> दाऊद कैसे परमेश्वर के भवन में गेलै आरु चढ़लै ऊ रोटी ले कँ खेलकै आरु साथी सिनी के देलकै, जे रोटी पुरोहित कँ छोड़ी आरु दोसरा कँ खाना उचित नै छेलै।” <sup>5</sup> ओकरो बाद यीशु आगु कहलकै, “हम्मै\* आरामो के दिन के मालिक छियै।”

### आराम दिन पर भी बीमारी कँ ठीक करना

**6** एक दोसरो आराम के दिन पर यीशु यहूदी धर्म सभा-भवन में जाय कँ उपदेश दे रहलो छेलै। यैन्टां एगो आदमी ऐसनो छेलै, जेकरो दहिना हाथ सुखी गेलो छेलै। <sup>7</sup> विधि-विधान के गुरुजी सिनी आरु फरिसी सिनी ई ताक में छेलै, कि देखियै आराम के दिन में यीशु ई आदमी कँ ठीक करै छै कि नै? अगर हुनी ऊ आदमी के हाथ कँ ठीक करतियै, तँ वें सिनी हुनका पर आराम के दिन में काम करै के दोष लगैतियै। <sup>8</sup> यीशु ओकरा सिनी के मोन के विचार जानी गेलै। यहे लेली हुनी सुखलो हाथ वाला आदमी सँ कहलकै, “उठें! यैन्टां बीच्चो में खड़ा होय जो, जैन्टां सभ्भे कोय तोरा देखे सकौ।” ऊ उठलै आरु आबी कँ बीच्चो में खड़ा

---

6:5 मूल में ‘हम्मै’ के जगह पर लिखलो छै- “मनुष्य-पुत्र”।

होय गेलै।<sup>9</sup> तबे यीशु ओकरा सिनी सँ कहलकै, “हम्में तोरा सिनी सँ एगो बात पुछै छियौ। विधि-विधान के मोताबिक आराम के दिन में उचित की छै- भला करना या बुरा करना? प्राण कँ बचाना या नाश करना?”<sup>10</sup> हुनी आपनो चारो तरफ खड़ा लोग सिनी कँ देखलकै आरु ऊ आदमी सँ कहलकै, “आपनो हाथ बढ़ा!” ऊ आदमी हाथ बढ़लकै आरु ओकरो हाथ पूरा तरहें ठीक होय गेलै।

**11** एकरा पर धर्म-गुरु सिनी आरु फरिसी सिनी आग-बबूला होय कँ अपना में विचार करे लागलै कि यीशु के संग आबे की करलो जाय?

### बारह-गो मसीह-दूत कँ चुनलो जाना

**12** एक दिन यीशु प्रार्थना करै वास्तें एगो पहाड़ पर गेलै आरु समुच्चे रात परमेश्वर सँ प्रार्थना करलकै।<sup>13</sup> भोर होला पर हुनी चेला सिनी कँ आपनो पास बोलैलकै। ओकरा में सँ बारह-गो कँ चुनलकै। जेकरा हुनी आपनो “दूत” कहलकै। ओकरो सिनी के नाम छेलै:

**14** शिमौन (जेकरो नाम हुनी पतरस राखलकै),  
अन्द्रियास (परतस के भाय), याकूब, यूहन्ना,  
फिलिप्पुस, बरतुलमै,<sup>15</sup> मत्ती, थोमा,  
याकूब (हलफर्ड के बेटा),  
सिमोन (जे “देश-भक्त”<sup>\*</sup> कहलाबै छेलै),

<sup>16</sup> यहूदा (याकूब के बेटा),  
यहूदा इस्करियोति (जे बाद में यीशु कँ पकड़ाबै वाला बनलै)।

### यीशु बड़का भीड़ के बीछो में

**17** ओकरो बाद यीशु ओकरा सिनी के संग पहाड़ पर सँ उतरी कँ समतल जग्घो में खड़ा होलै। वहिन्टां हुनको चेला सिनी के बड़का भीड़

---

6:15 मूल भाषा में ‘जेलोतेस’ जे एगो ‘यहूदी देश-भक्त’ दल के नाम छेलै।

छेलै। साथे में समुच्चे यहूदिया, यरुशलेम आरु समुन्द्र के किनारा पर बसलो सूर आरु सैदा नगर के बहुते लोग सिनी जमा छेलै।<sup>18</sup> वें सिनी यीशु के वचन सुनै वास्तें आरु आपनो बीमारी सब सँ ठीक हुवै वास्तें अयलो छेलै। यीशु दुष्टात्मा पकड़लो बहुते लोग सिनी कँ ठीक करले जाय छेलै।<sup>19</sup> सभ्भे कोय यीशु कँ छुवै वास्तें चाहै छेलै, कैहनेकि हुनका छुला पर शक्ति निकलै छेलै आरु ऊ शक्ति सँ सभ्भे ठीक होय छेलै।

### धन्य के छै?

**20** यीशु चेला सिनी के तरफ देखतें हुवें कहलकै,  
“धन्य छैं तोरा सिनी जे दीन-हीन छैं,  
कैहनेकि परमेश्वर के राज्य तोरा सिनी के छेकौ।

**21** धन्य छैं तोरा सिनी जे अखनी भुखलो छैं,  
कैहनेकि तोय सिनी तृप्त करलो जैभैं।  
धन्य छैं तोरा सिनी जे अखनी कानैं छैं,  
कैहनेकि तोय सिनी हँसभैं।”

**22** “धन्य छैं तोरा सिनी जखनी हमरो\* कारनें लोग सिनी तोरा सिनी सँ नफरत करतौ, तोरा समाज सँ बारी देतौ, तोरो निन्दा करतौ आरु खराब मानी कँ तोरा सिनी के नामो नै लेतौ।<sup>23</sup> वहे दिन में खुशी सँ उछलिहैं, कैहनेकि देखें तोरा सिनी वास्तें स्वर्ग में बड़का ईनाम राखलो छौ। आरु याद करें कि पुरनका जमाना में ओकरा सिनी के बाप-दादा सिनी भी परमेश्वर के भविष्यवक्ता सिनी के साथ वैसन्हैं व्यवहार करलको छेलै।”

**24** “लेकिन धिक्कार छौ तोरा सिनी पर जे मातवर छैं,  
कैहनेकि तोय सिनी आपनो सुख भोगी चुकलहैं।

**25** धिक्कार छौ तोरा सिनी पर जे अखनी तृप्त छैं,  
कैहनेकि तोय सिनी भूखलो रहभैं।

धिक्कार छौ तोरा सिनी पर जे अखनी हँसे छैं,  
कैहनेकि तोय सिनी शोक मनैभैं आरु कानभैं।”

**26** “धिक्कार छौ तोरा सिनी पर जखनी लोग तोरा सिनी के बड़ाय करै छौ, कैहनेकि पुरनका जमाना में तँ लोग परमेश्वर के झूठा भविष्यवक्ता सिनी के भी बड़ाय यहे तरहें करले छेलै।”

### दुश्मनो सँ प्रेम

**27** “तोय सिनी ध्यान सँ सुनें। आपनो दुश्मनो सँ प्रेम करें। जे तोरा सँ घृणा करै छौ, ओकरो भला करें। **28** जे तोरा सराप दै छौ, ओकरा आशीर्वाद दहें। जे तोरो संग बुरा व्यवहार करै छौ, ओकरा लेली प्रार्थना करें। **29** जदि कोय तोरो एक गाल पर थप्पड़ मारै छौ, तँ ओकरो तरफ दोसरो गाल घुमाय दहीं। अगर कोय तोरो ओढ़ना छिने छौ, तँ ओकरा आपनो कुरतो लिये दहें। **30** जदि कोय तोरा सँ माँगै छौ, तँ ओकरा दहें आरु जदि तोरा सँ कोनो चीज ले लेलकौ, तँ ओकरा वापस नै माँगें। **31** तोय दोसरो लोगो के संग वैसनें व्यवहार करें, जैसें तोय अपना लेली चाहै छैं, कि दोसरो लोग तोरो संग करौ।”

**32** “जे तोरा सिनी सँ प्रेम राखै छौ, जदि तोय खाली ओकरे सिनी सँ प्रेम करै छैं, तँ एकरा में तोरो कोन बड़ाय होलौ? कैहनेकि पापी आरु अधर्मियों लोग ऐसने करै छै। **33** जे तोरो भलाई करै छौ, जदि तोय खाली वहे लोग सिनी के भला करै छैं, तँ एकरा में तोरो कैसनो बड़ाय होलौ? कैहनेकि पापीयो सिनी ऐसने करै छै। **34** जदि तोय वापस पाबै के आशा रखतें हुवें दोसरा कँ पैचा दै छैं, तँ एकरा में तोरो कैसनो बड़ाय होलौ? कैहनेकि पापीयो लोग वापस पाबै के आशा करतें हुवें एक दोसरा कँ पैचा दै छै। **35** लेकिन तोरा सिनी आपनो दुश्मनो सिनी सँ प्रेम करें, ओकरो भलाई करें, बिना वापस पाबै के आशा करतें हुवें ओकरा पैचा दहें। तबे जाय कँ तोरा बड़का इनाम मिलतौ आरु तोय सिनी परम-प्रधान के संतान ठहरभैं। कैहनेकि परमेश्वर उपकार नै मानैवाला सिनी आरु

खराबो लोग सिनी पर कृपा करै छै। <sup>36</sup> जैसैं तोरा सिनी के परम-पिता परमेश्वर दयालु छौ, वैसने तोरो सिनी दयालु बनें।”

### दोसरा कॅ दोषी नै ठहराबें

**37** “दोसरा कॅ आँकै के कोशिश नै करें, तँ तोरहौ नै आँकलो जैतो। दोसरा कॅ दोषी नै ठहराबें, तँ तोरहौ दोषी नै ठहरैलो जैतौ। दोसरा कॅ छमा करें, तँ तोरहौ छमा करलो जैतौ। <sup>38</sup> तोय दहें तँ तोरहौ देलो जैतौ। जे नाप सँ नापी कॅ तोय दोसरा कॅ देभैं, वहे नाप सँ परमेश्वरो पूरा-पूरी नापी कॅ, दाबी-दाबी कॅ, हिलाय-डोलाय कॅ आरु भरी-भरी कॅ उप्पे-उप करी कॅ तोरा वापस देतौ।”

**39** ओकरो बाद यीशु ओकरा सिनी कॅ सिखाबैवाला खिस्सा कहतें हुवें पुछलकै, “की एगो अंधा आदमी दोसरो अंधा आदमी कॅ रास्ता बताबे सकै छै? की दोनोहैं गढ़ैया में नै गिरी जैतै? <sup>40</sup> चेला आपनो गुरु सँ बढी कॅ नै होय छै, लेकिन जखनी ऊ पूरा शिक्षा पाबी ले छै, तँ आपनो गुरु के जैसनो बनी जाय छै।

**41** तोय आपनो भाय के आँखी में लकड़ी के तिनका कैहने देखै छैं, जखनी कि तोरा आपनो खुद के आँखी में पड़लो ढेंग नै सुझै छौ? <sup>42</sup> जखनी तोय आपनो आँखी में पड़लो लकड़ी के ढेंग कॅ नै देखे सकै छैं, तँ तोय आपनो भाय कॅ कैसें कहे सकै छैं, ‘भाय, आबें हम्मैं तोरो आँखी के तिनका निकाली दै छियौ?’ हे कपटी! पैहने आपनो आँखी के ढेंग तँ निकाली ले, तबे तोय आपनो भाय के आँखी के तिनका बढियाँ सँ देखते हुवें निकाले सकभैं।”

### फल सँ गाछी के पहचान

**43** “बढियाँ गाछी में खराब फल नै फलै छै आरु नै ही खराब गाछी में बढियाँ फल फलै छै। <sup>44</sup> हरेक गाछी के पहचान ओकरो फले सँ होय छै। लोग काँटो वाला झाड़ी सँ अंजीर या अंगूर के फल नै तोड़े सकै छै।

45 बढियाँ आदमी आपनो हृदय के खजाना सँ बढियाँ बात निकालै छै। खराब आदमी आपनो हृदय सँ खराब बात निकालै छै। जे बात मोन में भरलो छै, वहे बात ओकरो मुँहो सँ निकलै छै।”

### घर बनाबै वाला दू तरह के लोग

46 “हमरा ऊ लोग सिनी ‘हे गुरु, हे गुरु’ कहने कहै छै, जे सिनी हमरो कहलो नै मानै छैं? 47 जे हमरा पास आबै छै आरु हमरो बात सुनी कँ ओकरा मानै छै, हममें तोरा बताबै छियौ कि ऊ केकरो जैसनो छै। 48 ऊ वैसनो आदमी के जैसनो छै, जे आपनो घर बनाबै के वक्ती धरती में गड्ढा खोदी कँ चट्टान जैसनो कठोर माटी पर नींव डाललकै। जखनी बाढ़ के तेज धार ऊ घर सँ टकरैलै, तँ घर कँ हिलाय्यो नै सकलै, कहनेकि ऊ मजगुत बनलो छेलै। 49 लेकिन जे लोग सिनी हमरो बात सुनै छै आरु नै मानै छै, ऊ वैसनो आदमी के जैसनो छै, जे बिना नींव डालले आपनो घर बनैलकै। जखनी बाढ़ के तेज धार ऊ घर सँ टकरैलै, तँ तुरंत ऊ घर ढही गेलै आरु ओकरो सत्यानाश होय गेलै।”

### रोमी सेनापति के अटल विश्वास

**7** यीशु लोग सिनी कँ ई सभ्भे उपदेश देला के बाद कफरनहुम नगर चल्लो अयलै। 2 वैन्टां रोमी सेना के एगो कप्तान छेलै, जेकरो एगो खास नौकर खुब्बे बीमार होय कँ मरै-मरै पर छेलै। 3 जखनी कप्तान यीशु के बारे में सुनलकै, तँ वें यहूदी समाज के कुछ प्रतिष्ठित बुढ़ा-बुजुर्ग लोगो कँ यीशु लिगां ई विनती करै वास्तें भेजलकै, कि यीशु आबै आरु ओकरो नौकर कँ ठीक करै। 4 वें सिनी यीशु लिगां अयलै आरु विनती करी कँ कहलकै, “ऊ आदमी ई लायक छै, कि अपने ओकरा लेली ई काम करी दियै 5 कहनेकि ऊ हमरा सिनी के यहूदी जाति सँ प्रेम करै छै आरु ऊ दान दे कँ हमरा सिनी वास्तें धर्म सभा-भवन बनैलको छै।”

6 यीशु ऊ लोग सिनी के संग कप्तान के घर चली देलकै। जखनी हुनी ओकरो घर लिगां पहुँचलै, तँ ऊ कप्तान आपनो दोस्त सिनी कँ यीशु लिगां ई कहै वास्ते भेजलकै, “हे स्वामी, अपने आरु बेसी तकलीफ नै उठाबियै, कैहनेकि हम्मं ई लायक नै छियै कि अपने हमरो घर में आबीयै। 7 हम्मं अपने-आप कँ ई लायको नै बुझै छियै कि अपने के नजदीक आबे सकियै। अपने खाली कही दियै तँ हमरो नौकर ठीक होय जैतै। 8 हम्मूँ आपनो अधिकारी के अधीन में छियै आरु हमरो अधीन में सैनिक सिनी छै। जखनी एगो कँ कहै छियै ‘जो’ तँ ऊ जाय छै, आरु दोसरा सँ कहै छियै, ‘आबें’, तँ ऊ आबै छै आरु जखनी आपनो कोनो दास कँ ई कहै छियै कि ‘ई करें’ तँ दास ओकरा पूरा करै छै।”

9 कप्तान के ई बात सुनी यीशु कँ बड़ा अचंभा होलै आरु भीड़ जे हुनको पीछु चली रहलो छेलै, ओकरा सँ यीशु कहलकै, “हम्मं तोरा सिनी सँ कहै छियौ, कि हम्मं ऐसनो विश्वास करै वाला कैन्ठों नै पैलियै, इसराएल के यहूदियो सिनी में नै।” 10 आरु जखनी कप्तान के भेजलो लोग सिनी घर लौटी कँ देखलकै, तँ नौकर बिल्कुल्ले ठीक छेलै।

### यीशु द्वारा विधवा के मरलका बेटा कँ जीवन-दान

11 ई घटना के कुछ दिन बाद यीशु आपनो चेला सिनी के संग नाईन नाम के नगर गेलै। बड़का भीड़ हुनको संग छेलै। 12 जैसैं ही हुनी नगर के फाटक लिगां पहुँचलै, तँ देखलकै कि लोग सिनी एगो जवान आदमी के लहाश नगर के बाहर ले जाय रहलो छै। ऊ मरलो आदमी आपनो विधवा माय के एकलौता बेटा छेलै। ओकरा संग में नगर के बहुते लोग चली रहलो छेलै। 13 विधवा कँ देखी यीशु कँ बड्डी तरस अयलै आरु हुनी कहलकै, “नै कानें।”

14 यीशु आगु बढ़ी कँ अर्थी कँ छुलकै। तबे कंधा दै वाला सिनी रुकी गेलै। यीशु कहलकै “हे जवान, हम्मं तोरा सँ कहै छियौ, उठें!” 15 तबे

ऊ मरलो आदमी उठी कॅ बैठी गेलै, आरु बोले लागलै। यीशु ऊ जवान कॅ ओकरा माय कॅ सौपी देलकै।

**16** ई देखी कॅ लोग सिनी पर बड़का डर छाया गेलै। वें सिनी परमेश्वर के जय-जयकार करते हुवें कहे लागलै, “हमरा सिनी के बीद्यो में परमेश्वर के एगो बड़का भविष्यवक्ता अयलो छै! परमेश्वर आपनो लोग सिनी पर दया करै वास्तें उतरी अयलो छै!” <sup>17</sup> ई घटना के समाचार समुच्चे यहूदिया में आरु ओकरो आस-पास चारो तरफ फैली गेलै।

### यूहन्ना के सवाल आरु यीशु के जबाब

**18** यूहन्ना के चेला सिनी ई सभ्भे के बारे में ओकरा बतैलकै। तबे यूहन्ना आपनो दूगो चेला कॅ बोलाय कॅ यीशु लिगां ई पुछै वास्तें भेजलकै, कि <sup>19</sup>“आबै वाला जे मुक्तिदाता छै, की ऊ अपने हीं छियै, या हमरा सिनी दोसरो केकरो रास्ता देखियै?”

**20** ऊ दोनो चेला यीशु लिगां अयलै आरु पुछलकै, “हमरो गुरु यूहन्ना बपतिस्मा दै वाला, हमरा सिनी कॅ अपने लिगां ई पुछै वास्तें भेजलको छै, कि जे आबै वाला मुक्तिदाता छै, की ऊ अपने हीं छियै या हमरा सिनी दोसरो केकरो रास्ता देखियै?”

**21** वहे समय में यीशु बहुत्तों कॅ बीमारी, कष्ट आरु दुष्टात्मा सिनी सँ मुक्ति देलकै आरु बहुत्ते अंधा सिनी कॅ देखै के ताकत देलकै। <sup>22</sup> तबे हुनी यूहन्ना के दोनों चेला सँ कहलकै, “जे सभ्भे तोंय देखलहैं आरु जे सुनलहैं, जाय कॅ यूहन्ना सँ कही दहें: अन्धा देखै छै, लंगड़ा चलै-फिरै छै, कोढ़ी ठीक करलो जाय छै, बहरा सुनै छै, मुर्दा जियैलो जाय छै आरु दीन-हीन सिनी कॅ शुभ-संदेश सुनैलो जाय छै। <sup>23</sup> धन्य छै ऊ आदमी, जे हमरा पर विश्वास करै छै आरु हमरा सँ मुँह नै फेरै छै।”

**24** जखनी यूहन्ना के भेजलो दोनो चेला वापस चल्लो गेलै, तबे हुनी यूहन्ना के बारे में बात करते हुवें भीड़ में जमा लोग सिनी सँ पुछलकै, “तोंय सिनी यहूदिया के रेगिस्तान में की देखै वास्तें गेलो

छेलैं? हवा सँ हिलतें हुवें खड़ही कँ? बिलकुल्ले नै! <sup>25</sup> तबे की देखै वास्तें गेलो छेलैं? दामी कपड़ा पहिरलो कोनो आदमी कँ? दामी कपड़ा पहनै वाला आरु सुख-विलास में रहै वाला रेगिस्तान में नै, बल्कि राजा के राजमहल में रहै छै। <sup>26</sup> तँ फेनू की देखै वास्तें गेलो छेलैं? की परमेश्वर के कोनो भविष्यवक्ता कँ? हाँ! हम्मे तोरा सँ कहै छियौ, कि तोंय सिनी परमेश्वर के भविष्यवक्तो सँ महान आदमी कँ देखलहैं। <sup>27</sup> ई वहे दूत छिकै, जेकरो बारे में परमेश्वर के पवित्र-शास्त्र में लिखलो छै,

‘देखें, हम्में मसीहा के आबै सँ पैहने आपनो दूत कँ भेजबै,  
जे हुनका लेली लोग सिनी कँ तैयार करतै।’”

**28** हम्में तोरा सिनी सँ कहै छियौ, कि लोग सिनी में यूहन्ना सँ बड़ी कँ कोय्यो कभियो जनम नै लेलको छै। तैय्यौ परमेश्वर के राज्य में जे छोटका सँ छोटका आदमी छै, ऊ यूहन्नो सँ बड़ी कँ छै।

**29** सुनै वाला सभ्भे लोग आरु तहसीलदारो सिनी यूहन्ना कँ बात सुनी कँ ई मानलकै, कि परमेश्वर के बात सच्चा छै आरु वें सिनी यूहन्ना सँ बपतिस्मा लेलकै। <sup>30</sup> लेकिन फरिसी सिनी आरु धर्म-गुरु सिनी ओकरा सँ बपतिस्मा नै लेलकै आरु ई तरहें ओकरा सिनी के लेली परमेश्वर के जे योजना छेलै, ओकरा आपनो जीवन सँ नकारी देलकै।

**31** तबे यीशु कहलकै, “हम्में ई जुग के लोग सिनी के तुलना केकरा सँ करियै, कि वें सिनी केकरो जैसनो छै? <sup>32</sup> वें सिनी बाजार में बैठलो ऊ बच्चा सिनी के जैसनो छै, जे आपनो साथी सिनी सँ पुकारी-पुकारी कँ कहै लागलै, ‘हम्में सिनी तोरा लेली “सौहर-गीत” गैलिहौं, लेकिन तोंय खुशी सँ नै नाचल्हो: हम्में सिनी “समधन-गीत” गैलिहौं, लेकिन तोंय नै कानल्हो!’ <sup>33</sup> हम्में यहै लेली कहै छियौ, कि यूहन्ना बपतिस्मा दै वाला अयलै आरु ऊ वैसनो खाना नै खाय छेलै, जे तोरा सिनी खाय छैं आरु नशों नै पियै छेलै, लेकिन एकरो बादो तोंय सिनी कहै छैं,

‘ओकरा में दुष्टात्मा छै’।<sup>34</sup> लेकिन मनुष्य-पुत्र\* तँ खैते-पीते अयलो छै, तैय्यो हुनका बारे में तोय सिनी कहै छै, कि ‘देखें, कैसनो पेटू आरु पियक्कड़ आदमी छै, जे तहसीलदारो सिनी आरु पापियो लोग सिनी के साथी छेकै।’<sup>35</sup> बुद्धि के सच्चाई ओकरो फल सँ ठहरैलो जाय छै, वहे तरहें हमरा दोनो के सच्चाई हमरो जीवन आरु चाल-चलन सँ ठहरैलो जैतै।”

### पापीन महिला कँ क्षमादान

**36** सिमोन नाम के एगो फरिसी यीशु कँ आपनो यैन्टां भोजन करै के न्यौता देलकै। यीशु ओकरो न्यौता स्वीकारी कँ ओकरो घर अयलै आरु भोजन करै वास्ते बैठलै।<sup>37</sup> तखनिये वहे नगर के एगो पापीन महिला जखनी जानलकै कि यीशु एगो फरिसी के घरो में भोजन करै वास्ते बैठलो छै, तँ वें एगो संगमरमर के बर्तन में गमकौवा तेल ले कँ अयलै,<sup>38</sup> आरु घर के भीतर जाय कँ वें यीशु के गोड़ लिगां घुटना टेकी कँ कानें लागलै। ओकरो आँख के लोर हुनका गोड़ पर गिरै छेलै आरु ऊ आपनो केश सँ हुनको गोड़ कँ पोछे लागलै आरु गोड़ कँ बार-बार चुमतें हुवें तेल लगाबें लागलै।

**39** ई देखी कँ सिमोन आपनो मोन्हें सोचे लागलै, “जदि हुनी परमेश्वर के भविष्यवक्ता होतिये, तँ जानी जैतिये कि ई जे हुनका छुबी रहलो छै, ऊ कैसनो पापीन महिला छेकै।”

**40** तबे यीशु कहलकै, “हे सिमोन, हमरा तोरा सँ कुछ कहना छै।” सिमोन बोललै, “हे गुरु, कहियै।”

**41** तबे यीशु कहलकै “सुनें, कोनो साहूकार के दूगो कर्जदार छेलै। ओकरा में एगो पाँच सौ चाँदी के सिक्का आरु दोसरो पचास चाँदी के

---

7:34 बहुते दाफी यीशु अपने-आप कँ “मनुष्य-पुत्र” कहलको छै।

सिक्का\* के देनदार छेलै। <sup>42</sup>जखनी ऊ दोनो कर्जदार कर्जा नै सधाय सकलै, तँ साहूकार दया करी कँ दोनों के कर्जा माँफ करी देलकै। आबे हमरा तोंय बताबें कि दोनों में सँ के ऊ साहूकार कँ बेसी मानतै?”

**43** सिमोन जबाब देलकै, “हमरो समझ में जेकरो बेसी कर्जा माँफ करलो गेलै, वें साहूकार कँ बेसी मानतै।”

यीशु सिमोन सँ कहलकै, “तोंय ठीक कहलहैं।”

**44** तबे पापीन महिला के तरफ घुमी कँ हुनी सिमोन सँ कहलकै, “तोंय ई महिला कँ देखै छै? हम्मं तोरो घर में अयलियौ, तैय्यो तोंय हमरा गोड़ धुवै वास्तें पानी नै देलहैं, पर ई महिला हमरो गोड़ कँ आपनो आँख के लोर सँ भींगाय कँ आपनो केश सँ पोछलकै। <sup>45</sup>अपना सिनी के परंपरा मोताबिक, तोंय चुमी कँ हमरो स्वागत नै करलहैं, लेकिन जखनी सँ हम्मं अयलियै, तखनियें सँ ई महिला हमरो गोड़ कँ बार-बार चूमलको छै। <sup>46</sup>परंपरा मोताबिक तोंय हमरो माथा में तेल नै लगलहैं, लेकिन ई महिला हमरो गोड़ में गमकौवा तेल लगलकै। <sup>47</sup>हम्मं तोरा सँ कहै छियौ, कि एकरो पाप, जे बहुते छेलै, सभ्भे माँफ करलो गेलै, आरु देखें कि ओकरो दिल में केतना प्रेम छै। पर जेकरो पाप थोड़ो छै, ओकरो जदि समुच्चे माँफ होय जाय, तैय्यो ऊ थोड़े प्रेम करतै।”

**48** तबे यीशु महिला सँ कहलकै, “तोरो पाप माँफ होलौ।”

**49** तबे यीशु के संग में भोजन करै वास्तें बैठलो लोग सिनी आपस में फुसफुसाय कँ कहे लागलै, “ई आदमी के छिकै आरु अपने-आप कँ की बुझै छै, जे पापी सिनी के पाप माँफ करने फिरै छै?”

**50** तबे यीशु महिला सँ कहलकै, “तोरो विश्वास सँ तोरा मुक्ति मिल्लौ। शान्ति सँ जो।”

---

7:41 मूल में दिनार: एक दिनार चाँदी के एगो सिक्का के बराबर होय छेलै, जे खेत में काम करै वाला मजदूर के एक दिन के मजदूरी छेलै।

### यीशु के सेवा करै वाली महिला सिनी

**8** ओकरो बाद यीशु लोग सिनी कॅ परमेश्वर के राज्य\* के शुभ-संदेश सुनैतें हुवें नगर-नगर आरु गाँव-गाँव घुमें लागलै। हुनको बारहौ चेला साथे में छेलै। <sup>2</sup> हुनको संग कुछ महिलो सिनी छेलै, जेकरा हुनी बीमारी आरु दुष्टात्मा सिनी सँ छुटकारा देलको छेलै। एकरा में मरियम नाम के एगो महिला छेलै, जे मगदला नाम के जग्घो के रहैवाली छेलै, जेकरा में सँ सात-गो दुष्टात्मा निकाल्लो गेलो छेलै। <sup>3</sup> आरु बाकी महिला सिनी में एगो के नाम योअन्ना छेलै, जे राजा हेरोदेस के खास मनीजर खुजा के घरवाली छेलै। सुसन्ना नाम के महिला सेहो बाकी महिला सिनी के संग छेलै। ऊ महिला सिनी आपनो धन-दौलत सँ यीशु आरु हुनको चेला सिनी के सेवा करै छेलै।

### बीया बुनै वाला किसान के खिस्सा

**4** नगर-नगर सँ लोग सिनी यीशु लिगां आबी रहलो छेलै, आरु एक दिन जखनी बड़का भीड़ हुनको पास जमा होलै, तँ यीशु एगो सिखाबैवाला खिस्सा कहलकै, <sup>5</sup>“एगो किसान बीया बुनै वास्तें आपनो खेत गेलै। बीया बुनतें हुवें कुछु बीया खेत के



बीया बुनै वाला किसान (8:4)

**8:1** परमेश्वर के राज्य के माने कोय संसारिक राज्य नै, बल्कि एगो आत्मिक राज्य छेकै, जेकरा पर परमेश्वर के शासन होतै। ऐकरो माने छेकै परमेश्वर आरु लोग सिनी कॅ बीद्यो में एगो लबका संबंध, जेकरा में परमेश्वर सबसे शक्तिमान राजा के रूप में होतै आरु लोग सिनी अपने-आप कॅ परमेश्वर के हाथो में सौपी कॅ हुनको इच्छा के मोताबिक जीवन जीतै। परमेश्वर के ई राज्य हमेशा लेली धार्मिकता आरु शान्ति पर टिकलो रहतै।

आरी के बगल में गिरलै, जे लतमर्दन होय गेलै आरु ओकरा चिड़ियाँ सिनी आबी कॅ खाय लेलकै। <sup>6</sup>कुछु बीया खेत के ऊ भाग में गिरलै, जहाँकरो माटी पत्थर जैसनो कठोर छेलै। माटी में हाल नै हुवै के कारने ई बीया जनमतें सुखी गेलै। <sup>7</sup>कुछु बीया जंगल-झाड़ में गिरलै आरु ओकरा में गजूर निकललै, लेकिन जंगल-झाड़ो साथे-साथ बढ़ी कॅ ओकरा दबाय देलकै। <sup>8</sup>बाकी जे बीया बढ़ियाँ माटी पर गिरलै, ऊ जनमी कॅ फललै-फूललै आरु सौ गुणा बेसी फसल देलकै।”

ई सभ्भे कहै के बाद हुनी जोर सँ कहलकै, “हमरो बात कान खोली कॅ सुनी ले।”

### खिस्सा के माने

**9** तबे चेला सिनी यीशु सँ ई खिस्सा के माने पुछलकै। <sup>10</sup>हुनी कहलकै, “तोरा सिनी कॅ ई जानै के सौभाग्य मिललो छै, कि परमेश्वर आपनो लोग सिनी पर कैसें शासन करतै, लेकिन बाँकी लोगो कॅ उदाहरणे में खिस्सा सुनैलो जाय छै, ताकि

‘हमरा देखतहौं वें सिनी नै पहचाने सकै,  
आरु हमरो बात सुनतहौं नै समझे सकै।’

**11** ई खिस्सा के माने ई छियै- बीया परमेश्वर के वचन छेकै। <sup>12</sup>खेत के आरी के बगल में गिरलो बीया, जेकरा चिड़ियाँ सिनी आबी कॅ खाय गेलै, ऊ बीया वैसनो लोग सिनी कॅ जैसनो छै, जे सिनी वचन कॅ सुनै तँ छै, लेकिन शैतान आबी कॅ ओकरा सिनी के मोन सँ ऊ वचन निकाली के ले जाय छै, ताकि वें सिनी परमेश्वर के वचन पर विश्वास करी कॅ मुक्ति नै पाबे सकै। <sup>13</sup>पत्थर जैसनो कठोर माटी पर गिरलो बीया, जे जनमतें सुखी गेलै, ऊ बीया वैसनो लोग सिनी के जैसनो छै, जे वचन कॅ सुनै तँ छै, आरु खुशी-खुशी वचन कॅ स्वीकारतो छै, लेकिन वचन ओकरा सिनी के हृदय में मजगुती सँ जड़ नै पकड़े सकलै। यहे लेली वें सिनी थोड़े देर तलक विश्वास तँ करै छै, लेकिन जखनी ओकरो जीवन

में संकट आबै छै, तँ विश्वास छोड़ी दै छै। <sup>14</sup> जंगल-झाड़ में गिरलो बीया ऊ लोग सिनी के जैसनो छै, जे वचन कँ सुनै छै, पर आगु चली कँ जीवन के चिन्ता-फिकिर, धन-दौलत आरु भोग-विलास में फँसी जाय छै। यहै लेली ओकरा सिनी के विश्वास मुझाय जाय छै आरु फले-फूले नै सकै छै। <sup>15</sup> लेकिन बढ़ियाँ माटी पर गिरलो बीया वैसनो लोग सिनी के जैसनो छै, जे सच्चा आरु पवित्र मोन सँ परमेश्वर के वचन सुनी कँ आपनो हृदय में संभालै छै आरु धीरज धरै के कारने बढ़ियाँ सँ फले-फूले छै आरु ओकरा सिनी के जीवन में भलाई के फल उत्पन्न होय छै।”

### सच्चाई छुपलो नै रहै छै

**16** “कोय्यो आदमी दिया जलाय कँ ओकरा बर्तन सँ नै झाँपै छै, आरु नै हीं ओकरा खटिया के नीचा में राखै छै। वें ओकरा दीपहरो पर राखै छै, ताकि घर के भीतर आबै वाला लोग सिनी कँ रोशनी मिलै। <sup>17</sup> हरेक चीज जे अखनी छिपलो छै, ऊ परगट करलो जैतै, आरु हरेक चीज जे अखनी गुप्त छै, ऊ उजागर करलो जैतै। <sup>18</sup> यहै लेली चौकस रहें कि तोरा सिनी कैसें सुनै छैं। जे सिनी हमरो बात कँ सुनै छै, समझै वास्तें ओकरा आरु ज्ञान देलो जेतै। लेकिन जे सिनी हमरो बात कँ नै सुनै छै, ओकरा सिनी सँ ऊहो ले लेलो जैतै, जे ओकरा सिनी कँ लागै छै कि वें सिनी समझै छै।”

### यीशु के माय आरु भाय के छिकै?

**19** यीशु के माय आरु भाय सिनी हुनका पास मिलै वास्तें अयलै, लेकिन भीड़ के कारने यीशु लिंगां नै पहुँचे सकलै। <sup>20</sup> कोय जाय कँ यीशु कँ कहलकै, “अपने के माय आरु भाय सिनी बाहर खड़ा छै आरु अपने सँ मिलै लेली चाहै छै।” <sup>21</sup> यीशु एकरो जबाब में कहलकै, “हमरो माय आरु भाय ई सिनी छेकै, जे परमेश्वर के वचन सुनै छै आरु ओकरा मानतो छै।”

### आँधी-तूफानो पर यीशु के अधिकार

**22** एक दिन यीशु आपनो चेला सिनी के साथ नाव पर चढ़लै आरु कहलकै, “झील के ऊ पार चलें।” तबे वें सिनी नाव खोली देलकै। **23** कुछ देर बाद हुनी नावे में सुती गेलै। एकाएक झीलो में बहुते तेज आँधी-तूफान ऊठी गेलै आरु नाव में पानी भरे लागलै आरु नाव डुबे लागलै। ओकरा सिनी के जान जोखिम में पड़ी गेलै। **24** तबे चेला सिनी यीशु लिगां आबी कँ हुनका जगैतें हुवें कहलकै, “स्वामी! हे स्वामी! हमरा सिनी डुबी रहलो छियै।” तबे हुनी उठी कँ आँधी-तूफान कँ आरु पानी में उठैवाला भयंकर लहर कँ डाँटलकै। तुरंते आँधी-तूफान थमी गेलै आरु पानी शांत होय गेलै।

**25** तबे यीशु चेला सिनी सँ पुछलकै, “तोरा सिनी के विश्वास कैन्ठां चल्लो गेलौ?” चेला सिनी डरी गेलै आरु भौंचक्का होय कँ आपस में कहे लागलै, “हुनी के छेकै, जेकरो आज्ञा हवो-पानी मानै छै?”

### दुष्टात्मा सिनी पर यीशु के अधिकार

**26** ओकरो बाद यीशु आरु ओकरो चेला सिनी झील पार करी कँ गिरासेनी लोगो के इलाका में पहुँचलै, जे गलील क्षेत्र के सामने झील के ऊ पार छेलै।

**27** जखनी वें सिनी किनारा पर उतरलै, तँ वहे नगर के एगो आदमी यीशु कँ मिललै, जेकरा में दुष्टात्मा सिनी समैलो छेलै। ऊ बहुते समय सँ घर में नै बल्कि कब्रिस्तान\* में लंगटे रहै छेलै। **28** जैसें हीं ऊ यीशु कँ देखलकै, चिल्लाय कँ हुनको सामना में गिरी गेलै आरु जोर-जोर सँ कहलकै, “हे यीशु! परम परमेश्वर के पुत्र, हमरा सँ आपने कँ कोन काम? हम्मैं आपने सँ विनती करै छियै, कि हमरा कष्ट नै दियै।” **29** ऊ

---

8:27 मूल में लिखलो छै “कब्रों की खोह में”।

ई बात यह लेली कहलकै, कैहनेकि यीशु दुष्टात्मा सिनी कँ ओकरा में सँ निकलै के आज्ञा देलको छेलै। दुष्टात्मा सिनी ओकरा बार-बार पकड़ै छेलै आरु लोग सिनी ओकरा लोहा कँ सिक्कड़ सँ बाँधी कँ पहरा दे कँ राखै छेलै, लेकिन ऊ सिक्कड़ कँ तोड़ी दै छेलै। दुष्टात्मा सिनी ओकरा सुनसान जग्घो में भटकैतें रहै छेलै।

**30** यीशु ओकरा सँ पुछलकै, “तोरो नाम की छेकौ?” वें जबाब देलकै, “सेना”। कैहनेकि बहुते दुष्टात्मा ओकरा में एक सेना के जैसो समैलो छेलै।<sup>31</sup> दुष्टात्मा सिनी यीशु सँ ई कही विनती करे लागलै, कि “हमरा सिनी कँ ‘अथाह कुंड’ में जाय के आज्ञा नै दियै।”

**32** वहिन्टां पहाड़ो पर सुअर सिनी के एगो बड़का झूंड चरी रहलो छेलै। दुष्टात्मा सिनी विनती करी कँ कहे लागलै, कि “हमरा सिनी कँ वहे सुअर सिनी के झूंड में जाय के आदेश दियै।” तबे यीशु वैसन्हें आदेश देलकै।<sup>33</sup> तबे दुष्टात्मा सिनी ऊ आदमी में सँ निकली कँ सुअर सिनी में समाय गेलै। तबे सुअर के पूरा झूंड पहाड़ी ढलान के तरफ झपटी कँ दौड़लै आरु झीलो में गिरी कँ डुबी मरलै।

**34** सुअर के चरवाहा सिनी ई देखी कँ तुरते भागी गेलै आरु आस-पास के नगर आरु गाँव में जाय कँ ई घटना के समाचार सुनैलकै।<sup>35</sup> तबे लोग सिनी ई देखै लेली अयलै आरु जखनी यीशु लिगां पहुँचलै, तँ देखलकै कि ऊ आदमी जेकरा में सँ दुष्टात्मा सिनी निकली गेलो छेलै, वें यीशु के गोड़ लिगां कपड़ा पिन्हले पूरा होशो-हवास में बैठलो छै। ई अचंभा वाला बात देखी कँ वें सिनी डरी गेलै।<sup>36</sup> ई घटना कँ जे सिनी देखले छेलै, वें सिनी बाकी लोगो कँ बतैलकै कि दुष्टात्मा लागलो आदमी कैसें ठीक होलै।<sup>37</sup> ई सभ्भे देखला-सुनला के बाद गिरासेनी इलाका के सभ्भे लोगो सिनी में ऐसो डर समाय गेलै, कि वें सिनी यीशु सँ विनती करे लागलै, कि हुनी वैन्टां सँ चल्लो जाय। तबे यीशु वापस लौटे लेली नाव में सवार हुवे लागलै।

**38** तबे जे आदमी में सँ दुष्टात्मा सिनी निकललो छेलै, वें यीशु सँ ई कही विनती करलकै, कि “हमरहौ आपनो संग में जाय दियै।” एकरा

पर यीशु ओकरा ई कही कॅ विदा करलकै, कि <sup>39</sup>“आपनो घर लौटी जो आरु लोग सिनी कॅ बताबें कि परमेश्वर तोरा लेली केतना बड़का काम करलको छौ।” ओकरो बाद ऊ आदमी वैनठां सँ चल्लो गेलै आरु समुच्चे नगर में सुनाबे लागलै कि यीशु ओकरा लेली कोन-कोन काम करलको छेलै।

### बीमार महिला कॅ चंगाई आरु मरलो लड़की कॅ जीवनदान

**40** जखनी यीशु झील के ई पार लौटलै, तँ बड़का भीड़ जे हुनको आबै के रास्ता देखी रहलो छेलै, वें सिनी हुनको स्वागत करलकै। <sup>41-42</sup> ऐतने में याईर नाम के एगो आदमी, जे यहूदी धर्म सभा-भवन के अधिकारी छेलै, ऊ यीशु लिगां अयलै। ओकरो बारह साल के एकलौती बेटी बीमार होय कॅ मरै-मरै पर छेलै, यहे वास्ते वें यीशु के गोड़ पर गिरी कॅ ओकरो घर चलै लेली विनती करे लागलै।

जखनी हुनी याईर के घर जाय रहलो छेलै, तबे लोग सिनी के ठेलम-ठेला में यीशु चिपाबें लागलै। <sup>43</sup> भीड़ में एगो महिला छेलै, जेकरा बारह साल सँ लहू बहै के बीमारी छेलै। वें आपनो सभ्भे धन-दौलत डाक्टर-वैध के पीछु में गमाय चुकलो छेलै, तैय्यो ओकरो बीमारी ठीक नै होय सकलै। <sup>44</sup> ऊ महिला पीछु सँ आबी कॅ यीशु के कपड़ा के कोर छुलकै आरु तुरंते ओकरो लहू बहना बंद होय गेलै। <sup>45</sup> यीशु पुछलकै, “हमरा के छुलकै?” जखनी सभ्भे कोय मुकरी गेलै, तँ पतरस कहलकै, “हे स्वामी, अपने कॅ तँ भीड़ चारो तरफ सँ दबाय रहलो छै आरु अपने पर गिरलो-पड़लो आबै छै।”

**46** लेकिन यीशु कहलकै, “नै, कोय हमरा छुलकै। हम्मं जानै छियै कि हमरा में सँ शक्ति निकललो छै।”

**47** जखनी महिला देखलकै, कि वें यीशु के नजरी सँ बचे नै सकतै, तँ ऊ काँपतें हुवें अयलै आरु यीशु के गोड़ पर गिरी कॅ सभ्भे लोगो के सामना में बतैलकै कि ऊ कैहने हुनका छुलकै आरु तुरंते कैसं ओकरो बीमारी

ठीक होय गेलै। <sup>48</sup>यीशु ऊ महिला सँ कहलकै, “हे बेटी, तोंय जे हमरा पर विश्वास करलहैं, यहै लेली तोंय ठीक होलहैं। आबे शान्ति सँ जो।”

**49** यीशु ई कैहिये रहलो छेलै कि याईर के घर सँ एगो आदमी अयलै आरु याईर सँ कहलकै, “अपने के बेटी मरी चुकलो छै, यहै लेली आबे गुरु कँ आरु परेशानी नै दियै।”

**50** यीशु ई सुनी कँ याईर सँ कहलकै, “तोंय डरें नै, खाली हमरा पर विश्वास राखें, तोरो बेटी बची जैतौ।”

**51** यीशु याईर के घर अयलै। हुनी पतरस, यूहन्ना, याकूब आरु बच्ची के माय-बाप कँ छोड़ी दोसरा केकरो आपनो संग ऊ कमरा के भीतर नै आबै देलकै। <sup>52</sup>सभ्भे कोय ऊ बच्ची वास्तें छाती पीटी-पीटी कँ कानै छेलै, एकरा पर यीशु कहलकै, “कानें नै! कैहनेकि ऊ मरलो नै छै, बल्कि सुतलो छै।” <sup>53</sup>ई सुनी कँ सभ्भे लोग हुनको मजाक उड़ाबें लागलै, कैहनेकि वें सिनी जानै छेलै कि लड़की मरी चुकलो छै।

**54** यीशु लड़की के हाथ पकड़ी कँ कहलकै, “गे बेटी, उठें!” <sup>55</sup>वहै समय ओकरो प्राण लौटी अयलै आरु वें तुरंते उठी कँ खड़ा होय गेलै। यीशु आज्ञा देलकै कि ओकरा कुछ खाय लिये देलो जाय। <sup>56</sup>लड़की के माय-बाप चकित होय गेलै, लेकिन यीशु ओकरा सिनी कँ ई घटना के बारे में केकरहौ नै कहै के आज्ञा देलकै।

### सेवा-कार्य लेली बारहो चेला भेजलो गेलै

**9** एक दिन यीशु आपनो बारहो चेला कँ एक्के साथ बोलैलकै आरु सभ्भे तरह के दुष्टात्मा निकालै के आरु बीमारी सिनी कँ ठीक करै के शक्ति आरु अधिकार देलकै। <sup>2</sup>तबे हुनी ओकरा सिनी कँ परमेश्वर के राज्य के बारे में प्रचार करे लेली आरु बीमार सिनी कँ ठीक करे लेली भेजलकै। <sup>3</sup>हुनी चेला सिनी सँ कहलकै, “रास्ता वास्तें कुच्छो नै लिहैं, नै लाठी, नै झोला, नै खाना, नै रुपया-पैसा आरु नै हीं दोसरो कुरता। <sup>4</sup>कोनो गाँव में गेला के बाद जे घर में तोरो स्वागत हुवौ,

तँ ऊ गाँव सँ विदा हुवे तलक वहे घर में ठहरलो रहियैं।<sup>5</sup> आरू जदि कोनो गाँव में गेला के बाद लोग सिनी तोरा सिनी के स्वागत नै करौ, तँ ऊ गाँव सँ निकलतें हुवें आपनो गोड़ के धूरा झाड़ी दिहैं। ई यह बातो के गवाही होतै, कि ओकरा सिनी के ई व्यवहार के कारनं परमेश्वर ओकरा सिनी के विरोध में छै।”<sup>6</sup> तबे वें सिनी वैनंठां सँ विदा होय कँ गाँव-गाँव में परमेश्वर के शुभ-संदेश सुनैतें हुवें आरू बीमार लोग सिनी कँ ठीक करतें हुवें घुमतें-फिरतें रहलै।

### राजा हेरोदेस दुविधा में

7 जखनी गलील के राजा हेरोदेस यीशु के बारे में ई सब सुनलकै, तँ वें दुविधा में पड़ी गेलै, कैहनेकि कोय कहै छेलै कि बपतिस्मा दै वाला यूहन्ना मरलो में सँ जीबी गेलो छै।<sup>8</sup> कोय-कोय कहै छेलै कि परमेश्वर के भविष्यवक्ता एलियाह परगट होलै। कोय-कोय तँ ईहो कहै छेलै कि ओकरो अलावे परमेश्वर के पुरनका भविष्यवक्ता सिनी में सँ कोय फेनू सँ जीबी गेलो छै।<sup>9</sup> एकरा पर राजा हेरोदेस कहलकै, “यूहन्ना कँ तँ हम्मं खुद्दे मुड़ी कटबैमें छेलियै, आबे ई के छेकै, जेकरो बारे में ऐसनो बात सब सुनै छियै?” आरू वें यीशु सँ भेंट करै के कोशिश करे लागलै।

### पाँच रोटी आरू पाँच हजार लोग

10 जखनी बारहो दूत लौटी कँ अयलै, तँ वें सिनी जे कुछु करने छेलै, सभ्भे यीशु कँ बतैलकै। तबे यीशु ओकरा सिनी कँ आपनो साथ ले कँ बैतसैदा नाम के एगो दोसरो नगर चल्लो गेलै, ताकि वें सिनी एकान्त जग्घो में रहे सकै।<sup>11</sup> लेकिन जखनी लोग सिनी ई बात जानी गेलै कि यीशु आरू ओकरो चेला सिनी वैनंठां सँ चल्लो गेलो छै, तँ वें सिनी यीशु के पीछु-पीछु आबे लागलै। हुनी ओकरा सिनी के स्वागत करलकै, आरू ओकरा सिनी सँ परमेश्वर के राज्य के बारे में बात करे लागलै। जेकरहौ कोनो बीमारी सँ ठीक हुवै के जरूरी छेलै, ओकरा हुनी ठीक करलकै।

**12** जखनी दिन ढले लागलै, तँ बारहो चेला आबी कँ हुनका सँ कहलकै, “हमरा सिनी यैन्टां सुनसान जग्घो में छियै, जैन्टां एतना बड़का भीड़ के लेली खाय-पीयै के कोनो व्यवस्था नै होय सकै छै। ई लोग सिनी कँ बड़्डी भुख लागलो होतै, यहै लेली ओकरा सिनी कँ जाय लेली कहियै ताकि वें सिनी आसपास के गाँव-बस्ती में जाय कँ अपना लेली रहै के आरु खाय-पीयै के उपाय करै।”

**13-14** यीशु जबाब देलकै, “तोरहै सिनी ओकरा सिनी कँ खाय वास्तें दहें।” लेकिन वैनटां लगभग पाँच हजार लोग छेलै।

एकरा पर चेला सिनी कहलकै, “हमरा सिनी लिगां तँ पाँच रोटी आरु दूगो मछली कँ छोड़ी आरु कुच्छो नै छै। अपने ई कैसें कहै छियै कि एतना बड़का भीड़ कँ खिलैयै? कैहनेकि जखनी तलक हमरा सिनी जाय कँ खाना खरीदी कँ नै लानियै, तब तलक तँ एतना बड़का भीड़ कँ खिलाना संभवे नै छै!”

तबे यीशु आपनो चेला सिनी सँ कहलकै, “खाय लेली ओकरा सिनी कँ पचास-पचास के झूंड में बैठाय दहें।” <sup>15</sup> चेला सिनी वैसेने करलकै आरु सभ्भे कँ बैठाय देलकै। <sup>16</sup> तबे यीशु ऊ पाँच रोटी आरु दूगो मछली लेलकै आरु स्वर्ग के तरफ ऊपर देखी कँ रोटी आरु मछली वास्तें परमेश्वर कँ धन्यवाद देलकै। तबे हुनी रोटी आरु मछली कँ तोड़लकै आरु लोग सिनी कँ परोसै वास्तें चेला सिनी कँ देलकै। <sup>17</sup> तबे सभ्भे लोग भर पेट खाय कँ अघाय गेलै। लोग सिनी के खैला के बादो रोटी आरु मछली बची गेलै। एतना सारा बचलो टुकड़ा छेलै कि चेला सिनी बारह टोकड़ी भरी कँ उठैलकै।

### यीशुवे मुक्तिदाता मसीहा छैकै

**18** एक दिन यीशु एकान्त में प्रार्थना करी रहलो छेलै आरु चेला सिनी हुनको संग छेलै। यीशु चेला सिनी सँ पुछलकै, “हम्मं के छेकियै, हमरो बारे में लोग की कहै छै?” <sup>19</sup> वें सिनी जबाब देलकै कि “आपने के बारे

में कोय कहै छै ‘बपतिस्मा दै वाला यूहन्ना’, कोय कहै छै ‘एलियाह’ आरु कोय-कोय यहो कहै छै कि परमेश्वर के पुरनका भविष्यवक्ता में सँ कोय जीबी उठलो छै।”

**20** लेकिन यीशु फेनू पुछलकै, “ओकरा सिनी कँ छोड़ें, लेकिन हममें के छेकियै, हमरो बारे में तोंय सिनी की कहै छै?” पतरस जबाब देलकै, “आपने तँ ओकरा सिनी सँ बहुत्ते बढ़ी कँ छेकियै! आपने परमेश्वर के भेजलो मसीहा छियै।” <sup>21</sup> एकरा पर यीशु ओकरा सिनी कँ चेतैलकै आरु कहलकै “ई बात केकरो सँ नै कहियै।”

### यीशु आपनो मौत के बारे में भविष्यवाणी करलकै

**22** यीशु आगु कहलकै, “हमरा लेली\* बड्डी दुख उठाना निश्चित छै। बुढ़ो-पुरानो, महा-पुरोहित आरु धर्म-गुरु लोग सिनी तुच्छ समझी कँ हमरा अपमानित करतै। एकरा सँ बढ़ी कँ ऐसनो होतै, कि हमरा जान सँ मारलो जैतै आरु तेसरो दिन फेनू जिलैलो जैतै।”

**23** तबे यीशु लोग सिनी सँ कहलकै, “जे कोय हमरो चेला बनै लेली चाहै छै, तँ ऊ आपनो स्वार्थ सँ भरलो इच्छा कँ छोड़ी दहें। साथहै हरेक दिन हमरा लेली दुख उठाबै वास्तें आरु यहाँ तलक कि आपनो प्राणो दियै लेली तैयार होय जो\* आरु हमरो पीछु चलें। <sup>24</sup> कैहनेकि जे कोय्यो आपनो जीवन बचाबै वास्तें चाहै छै, ऊ ओकरा गमाय देतै, लेकिन जे कोय हमरा वास्तें आपनो जीवन गमैते, ऊ ओकरा बचाय लेतै। <sup>25</sup> जदि कोय आदमी समुच्चे संसार कँ जीती लिये लेकिन खुद्दे कँ गमाय दिये या खुद्दे कँ नाश करी लिये, तँ एकरा सँ कोन फायदा होतै? <sup>26</sup> जे कोय हमरा सँ आरु हमरो शिक्षा सँ लजाबै छै, ओकरो सँ मनुष्य-पुत्र\* ऊ समय

---

9:22 मूल रूप सँ “हमरा लेली” के जग्घो पर लिखलो छै- “मनुष्य-पुत्र के लेली”। बेसी जानकारी ‘शब्द-परिचय’ में देलो गेलो छै। 9:23 मूल में “हमरा लेली दुख ..... तैयार होय जो” के जग्घो पर लिखलो छै: “आपनो कूश उठाय ले।” 9:26 बहुत्ते दाफी यीशु अपने-आप कँ “मनुष्य-पुत्र” कहलको छै।

लजैतै, जखनी हुनी आपनो महिमा के साथ आरु आपनो पिता आरु पवित्र स्वर्गदूत सिनी के महिमा के साथ अयतै। <sup>27</sup> हममें तोरा सिनी सँ सच कहै छियौ, कि यैन्ठां कुछ ऐसनो लोग सिनी खड़ा छै, जे परमेश्वर के राज्य जखनी तलक नै देखी लेतै, तखनी तलक नै मरतै।”

### यीशु के रूप बदल्लै

**28** ई सभ्भे बातो के लगभग आठ दिन बाद यीशु आपनो साथ पतरस, यूहन्ना आरु याकूब कॅ ले कॅ प्रार्थना करै वास्ते पहाड़ पर गेलै। <sup>29</sup> जखनी यीशु प्रार्थना करी रहलो छेलै, तँ हुनको चेहरा के रूप बदली गेलै आरु हुनको कपड़ा बिजली के जैसनो चमके लागलै। <sup>30</sup> एका-एक वैन्ठां दूगो आदमी मूसा आरु एलियाह यीशु सँ बात करतें हुवें देखलाई देलकै। <sup>31</sup> वें सिनी दिव्य रोशनी सँ चमकी रहलो छेलै। वें सिनी एकरा बारे में बातचीत करी रहलो छेलै कि परमेश्वर के योजना मोताबिक कैसें जल्दिये यरुशलेम नाम के शहर में यीशु के मौत होतै। <sup>32</sup> पतरस आरु ओकरो संगी सिनी निंदवासलो छेलै। लेकिन जखनी वें सिनी सचेत होलै, तँ यीशु के महिमामयी रूप देखलकै आरु हुनको संग दोनो आदमी कॅ खड़ा देखलकै। <sup>33</sup> जखनी ऊ दोनो आदमी यीशु लिगां सँ विदा हुवे लागलै, तँ पतरस बिना ई समझतें हुवें कि ऊ की बोली रहलो छेलै, यीशु सँ कहलकै, “हे गुरु! हमरा सिनी वास्ते केतना बढियाँ छै, कि हमरा सिनी यैन्ठां छियै! यह लेली हमरा सिनी यैन्ठां तीन मंडप बनैबै, एगो आपने वास्ते, एगो मूसा वास्ते आरु एगो एलियाह वास्ते।”

**34** पतरस ई कहिये रहलो छेलै, कि बादल आबी कॅ ओकरा सिनी कॅ झाँपी लेलकै। चेला सिनी बादल सँ झपैला के कारने डरी गेलै। <sup>35</sup> तबे बादल में सँ एगो आवाज अयलै, “ई हमरो बेटा छेकै, जेकरा हममें चुनलो छियै, हुनको बात ध्यान सँ सुनें!” <sup>36</sup> ई आकाशवाणी होला के बाद चेला सिनी देखलकै कि यीशु वैन्ठां अकेले खड़ा छेलै।

ई घटना के बारे में वें सिनी चुप रहलै आरु जे कुछ देखनें छेलै, ओकरो चर्चा केकरहौ सँ नै करलकै।

### दुष्टात्मा पकड़लो बालक कँ ठीक करना

**37** अगला दिन जखनी वें सिनी पहाड़ पर सँ नीचा उतरलै, तँ यीशु कँ लोगो सिनी के एगो बड़का भीड़ मिललै। **38** भीड़ में सँ एगो आदमी चिल्लैतें हुवें कहलकै, “हे गुरु, हम्मं अपने सँ विनती करै छियै कि हमरो बेटा कँ एक दाफी देखी लियै। ई हमरो एकलौता बेटा छेकै। **39** दुष्टात्मा ऐकरा पकड़ी लै छै आरु ई एकाएक चिल्लाय उठै छै। दुष्टात्मा ऐकरा नीचा में पटकी दै छै आरु ऐकरा मुँह सँ झाग निकले लागै छै। दुष्टात्मा एकरो देह कँ तोड़ते-मरोड़ते हुवें बहुते कष्ट पहुँचैला के बादे एकरा छोड़ै छै। **40** हम्मं अपने के चेला सिनी सँ ई दुष्टात्मा कँ निकालै लेली विनती करलियै, लेकिन वें सिनी ओकरा नै निकाले सकलै।”

**41** यीशु जबाब देलकै, “हे हठीला आरु भ्रष्ट लोग सिनी! हमरा तँ मोन होय रहलो छै, कि तोरा सिनी कँ छोड़ी कँ चल्लो जैय्यौ, ताकि हमरा तोरा सिनी के अविश्वास कँ सहै नै पड़े। आपनो बेटा कँ यैन्टां लान।”

**42** ऊ बालक हुनका तरफ आबीये रहलो छेलै, कि दुष्टात्मा ओकरा नीचा पटकी कँ मरोड़े लागलै। एकरा पर यीशु दुष्टात्मा कँ डाँटते हुवें बाहर निकलै के आदेश देलकै। ई तरहें बालक कँ ठीक करी कँ ओकरो बाबूजी कँ सौंपी देलकै। **43** परमेश्वर के सामर्थ आरु महानता देखी कँ सभ्भे लोग चकित होय गेलै।

लोग सिनी यीशु के काम देखी कँ अचंभा करै छेलै, लेकिन हुनी आपनो चेला सिनी सँ कहलकै, **44** “जे बात हम्मं तोरा सिनी कँ कहै लेली जाय रहलो छियौ, ओकरा पर ध्यान दहें। आबै वाला समय में हमरा\* पकड़बाय

कॅ लोग सिनी के हाथो में सौपलो जैतै।” 45 लेकिन चेला सिनी ई बात के मतलब नै समझे सकलै, कैहनेकि ई बातो के मतलब ओकरा सिनी सँ छिपलो छेलै। वें सिनी यीशु सँ ई बारे में पुछै सँ डरै छेलै।

### बड़ा आरु छोटा

46 यीशु के चेला सिनी के बीचो में ई बातो पर विवाद हुवे लागलै कि ओकरा सिनी में सबसे बड़का के छै? 47 पर यीशु ओकरा सिनी के मोन के विचार जानी लेलकै। हुनी एगो बालक कॅ लानी कॅ आपनो पास खड़ा करलकै। 48 तबे हुनी चेला सिनी सँ कहलकै, “जे कोय हमरो नाम सँ ई छोटो बालक कॅ स्वीकार करै छै, ऊ हमरहै स्वीकार करै छै, आरु जे हमरा स्वीकार करै छै, ऊ खाली हमरहै नै, बल्कि ओकरो स्वीकार करै छै, जे हमरा भेजलको छै। हाँ, जे तोरा सिनी के बीचो में सबसे नम्र छौ, वहे सबसे महान छौ।”

49 तबे यूहन्ना कहलकै, “हे स्वामी, हमरा सिनी एगो आदमी कॅ अपने के नाम लेतें हुवें दुष्टात्मा सिनी कॅ निकालतें देखलियै, तँ ओकरा रोकै के कोशिश करलियै, कैहनेकि ऊ आपने के पीछु चलैवाला हमरा सिनी के झूंड के नै छेकै।” 50 यीशु ओकरा कहलकै, “ओकरा नै रोकें, कैहनेकि जे तोरो विरोध में नै छौ, ऊ तँ तोरो पक्षे में छौ।”

### सामरी इलाका के एगो गाँव में यीशु के अपमान

51 जखनी यीशु के स्वर्ग में उठैलो जाय के दिन पास अयलै, तँ हुनी यरूशलेम नगर जाय के निश्चय करलकै। 52 हुनी आपनो आगु कुछ आदमी भेजलकै। वें सिनी विदा होय कॅ सामरी लोग सिनी के एगो गाँव में हुनका लेली तैयारी करे गेलै। 53 लेकिन ऊ गाँव में लोग सिनी यीशु के स्वागत नै करलकै, कैहनेकि हुनी यरूशलेम

नगर के तरफ जाय रहलो छेलै।\* 54 ई देखी कॅ हुनको चेला याकूब आरु यूहन्ना कहलकै, “हे गुरु, की आपने चाहै छियै कि एकरा सिनी कॅ भष्म करै लेली आकाश सँ आग बरसै वास्ते हमरा सिनी आज्ञा दियै?” 55 एकरा पर यीशु ओकरा सिनी के तरफ घुमी कॅ डाँटलकै\*, 56 आरु वें सिनी दोसरो गाँव चल्लो गेलै।

### यीशु के चेला बनै के कीमत

57 जखनी रास्ता में जाय रहलो छेलै, तँ कोय आदमी यीशु सँ कहलकै, “जैन्टां-जैन्टां अपने जैबै, हम्हूँ अपने के संग चलबै।” 58 यीशु ओकरा सँ कहलकै, “लोमड़ी सिनी कॅ माँद आरु आकाश कॅ चिड़ियाँ सिनी कॅ खोता होय छै, लेकिन हमरा\* सिर राखैयो के जगघो नै छै।”

59 दोसरो आदमी सँ यीशु कहलकै, “हमरो पीछु आबें।” लेकिन वें कहलकै, “हे गुरु, हमरा पैहले जाय कॅ आपनो बाबूजी के लहाश गाड़ी कॅ आबै लिये दियै।”

60 यीशु कहलकै, “आत्मिक रूप सँ मरलो लोगे सिनी कॅ आपनो मुर्दा गाड़ै लिये दहें। लेकिन तोय जाय कॅ परमेश्वर के राज्य के शुभ-संदेश सुनाबें।”

61 फेनू दोसरो आदमी कहलकै, “हे गुरु, हम्में अपने के पीछु होय जैबै, लेकिन पैहने हमरा घर जाय कॅ आपनो सगा-संबंधी सँ विदा लिये दियै।” 62 यीशु ओकरा सँ कहलकै, “जे कोय आपनो हाथ हल के लागन पर रखी कॅ पीछु देखै छै, वें परमेश्वर के राज्य के लायक नै छै।”

---

9:53 सामरी लोग आरु यहूदी लोग एक दोसरा कॅ नीचा नजरी सँ देखै छेलै। यरुशलेम यहूदी लोग सिनी के सबसे पवित्र नगर छेलै, यहे लेली सामरी लोग सिनी ऊ नगरो सँ नफरत करै छेलै। 9:55 कुछ हस्तलिपि में लिखलो छै: घुमी कॅ डाँटलकै आरु कहलकै, “तोरा सिनी नै जानै छै, कि कैसरो आत्मा सँ प्रेरित छै, मनुष्य-पुत्र लोग सिनी कॅ नाश करे लेली नै बल्कि बचावै लेली अयलो छै।” 9:58 मूल में ‘हमरा’ के जगघो पर लिखलो छै- “मनुष्य-पुत्र कॅ”।

### सत्तर-गो चेला वास्तें प्रचार के काम

**10** ओकरो बाद यीशु सत्तर-गो\* आरु आदमी कॅ चुनलकै आरु दूगो-दूगो करी कॅ ऊ सभ्भे नगर आरु गाँव में भेजी देलकै, जैन्टां-जैन्टां हुनी खुद्दे जाय वाला छेलै। <sup>2</sup>यीशु ओकरा सिनी कॅ कहलकै, “पाकलो फसल तँ बहुते छै, लेकिन मजदूर थोड़ो छै। यह लेली खेत के मालिक सँ विनती करें, कि हुनी आपनो खेतो में फसल कॅ जमा करै लेली आरु मजदूर कॅ भेजै। <sup>3</sup>आबे तोरा सिनी जो। तोरा सिनी कॅ हममें भेड़िया सिनी के बीच्चो में मेमना के जैसनो भेजी रहलो छियौ। <sup>4</sup>आपनो संग में नै रुपया-पैसा, नै झोला आरु नै ही दोसरो जोड़ी जूता-चप्पल लिहैं। रास्ता में केकरो हाल-समाचार पुछै लेली नै रुकिहैं। <sup>5</sup>जखनी केकरो घरो में घुसिहैं, तँ सबसे पैहनं ई कहियैं, ‘ई घर में शान्ति हुवे’। <sup>6</sup>जदि वैनटां कोय शान्तिप्रिय लोग होतै, तँ तोरो शान्ति ओकरा पर बनलो रहतौ, नै तँ वापस तोरो पास लौटी अयतौ। <sup>7</sup>ठहरै लेली घर-घर नै घुमीहैं। तोरो सामना में खाय-पीबै लेली जे भी परोसलो जैतौ, वह खैइहैं-पीबिहैं, कैहनेकि मजदूर कॅ तँ मजदूरी मिलने चाहियो।”

**8** “हाँ, जखनी कोनो नगर में गेला पर तोरो स्वागत करलो जाव, तँ जे कुच्छ तोरो सामना में परोसलो जाव, ओकरा खो-पी। <sup>9</sup>वैनटां जे सिनी बीमार छै, ओकरा सिनी कॅ ठीक करें आरु सभ्भे लोगो सँ कहैं कि परमेश्वर के राज्य तोरा सिनी के नजदीक में आबी गेलो छौ। <sup>10</sup>लेकिन जदि कोनो नगर में गेला के बाद वहाँकरो लोग सिनी तोरो स्वागत नै करौ, तँ ऊ नगर के गली-मोहल्ला में जाय कॅ कहियैं, <sup>11</sup>‘ई बात जानी ले कि परमेश्वर के राज्य नजदीक आबी गेलो छै, पर कैहनेकि तोरा सिनी हमरो स्वागत नै करलहैं, यह लेली तोरो नगर के धूरो, जे हमरा सिनी के गोड़ में लागी गेलो छै, तोरा सिनी के विरोध में झाड़ी दै छियौ।” <sup>12</sup>यीशु चेला सिनी कॅ आगु

10:1 कुछ संस्करण में ‘सत्तर’ के बदला में ‘बहत्तर’ देलो गेलो छै।

कहलकै, “हम्मं तोरा सिनी सँ कहै छियौ, कि न्याय के दिनों में, सदोम\* जैसनो पापी नगर के दशा भी, ऊ नगर के तुलना में कहीं सहै लायक होतै।”

**13** “आरु हे खुराजीन आरु बेतसैदा नगर! यहूदी लोगो के नगर होला के बाबजूदो तोरा सिनी पर धिक्कार छौ! कैहनेकि हम्मं तोरा सिनी के बीच्यो में बहुते चमत्कार वाला काम करलियौ, लेकिन तोरा सिनी आपनो हृदय-परिवर्तन नै करलहैं। लेकिन सूर आरु सैदा तँ गैर-यहूदी नगर छै, छै कि नै? लेकिन तैय्यो अगर हम्मं वैसनो सब चमत्कार ओकरा सिनी के बीच्यो में करलो रहतियै, तँ ओकरा सिनी पर गहरा असर पड़तियै। हमरो काम सब कँ देखला के बाद वें सिनी पक्का तौर पर आपनो पापी जीवन सँ मुँह फेरी लेतियै आरु चिथड़ा पहनी कँ आरु माथो पर राख छिड़की कँ देखैतियै कि कैसे वें सिनी आपनो हृदय-परिवर्तन करी लेलको छै।<sup>14</sup> लेकिन अंत में एक दिन आबी रहलो छै, जखनी तोरा सिनी के न्याय करलो जैतौ। ऊ दिन तोरा सिनी कँ सूर आरु सैदा सँ भी बेसी सजा देलो जैतौ।<sup>15</sup> आरु हे कफरनहूम नगर! तहँ तँ यहूदी लोग सिनी के नगर छैं। लेकिन की तोय स्वर्ग तक उठैलो जयभैं? नै। तोय तँ निश्चिते अधोलोक में गिरैलो जयभैं।”

**16** यीशु आगु चेला सिनी कँ कहलकै, “जे कोय्यो तोरा सिनी के बात सुनै छौ, वें हमरहौ बात सुनै छै। जे कोय्यो तोरा सिनी कँ नै अपनाबै छौ, वें हमरहौ नै अपनाबै छै आरु जे कोय हमरा नै अपनाबै छै, वें सिनी हुनको नै अपनाबै छै, जे हमरा भेजलको छै।”

### दुष्टात्मा सिनी पर अधिकार

**17** जखनी ऊ सत्तरो आदमी प्रचार के काम करी कँ वापस लौटलै, तँ वें सिनी बहुते खुशी के साथ कहलकै, “हे गुरु, आपने के नाम के शक्ति सँ दुष्टात्मां सिनी हमरा सिनी के आज्ञा मानलकै।”

---

**10:12** सालों पैहने सदोम नाम के एगो ऐसनो नगर छेलै, जहाँकरो पाप एतना बढ़ी गेलो छेलै, कि परमेश्वर ऊ नगर कँ आकाश सँ आग बरसाय कँ नाश करी देलको छेलै।

**18** एकरा पर यीशु कहलकै, “हाँ, हम्में दुष्टात्मा सिनी के सरदार शैतान कँ ओकरो ऊँच्यो पदवी वाला जग्घो सँ वहे तरहें नीचा गिरतें हुवें देखलियै, जैसे बिजली आकाश सँ नीचा गिरै छै। <sup>19</sup> हम्में तोरा सिनी कँ साँप आरु बीच्छु कँ कुचलै के शक्ति देलो छियौ आरु दुश्मन रुपी शैतान के पूरा शक्ति पर अधिकार देलो छियौ। कोनो चीज तोरा सिनी कँ नुकसान नै पहुँचाबै सकतौ। <sup>20</sup> एकरो बाबजूदो ई बातो पर खुश नै हुवें कि दुष्टात्मों सिनी तोरो वश में छौ, बल्कि ई बातो पर आनन्द मनाबें कि तोरा सिनी के नाम स्वर्ग में लिखलो गेलो छौ।”

**21** तखनियें यीशु परमेश्वर के आत्मा के आनन्द सँ भरी कँ कहलकै, “हे पिता, स्वर्ग आरु धरती के मालिक, हम्में आपने कँ यहें लेली धन्यवाद दै छियै, कि आपने ई सभ्भे बात विद्वान आरु ज्ञानी लोग सिनी सँ छिपाय कँ राखलियै, लेकिन बच्चा सिनी पर परगट करलियै, कैहनेकि हे पिता, आपने कँ एकरे सँ आनन्द होलै।

**22** हमरो पिता सभ्भे कुछ हमरो हाथो में सौंपले छै। पुत्र के छिकै, ई बात पिता कँ छोड़ी कोय नै जानै छै आरु पिता के छिकै, यहो बात पुत्र कँ छोड़ी आरु जेकरहौ पर पुत्र हुनका परगट करै लेली चाहै छै, ओकरा छोड़ी कोय नै जानै छै।”

**23** तबे यीशु चेला सिनी के तरफ मुड़ी कँ अकेले में कहलकै, “धन्य छै ऊ आँख, जे ऊ सभ्भे चीज देखी रहलो छै, जे तोंय सिनी देखी रहलो छै। <sup>24</sup> हम्में तोरा सँ कहै छियौ, कि बहुते राजा आरु परमेश्वर के भविष्यवक्ता सिनी छेलै, जे सिनी ऊ सभ्भे चीज देखै के इच्छा करलकै, जे तोंय सिनी देखी रहलो छै, लेकिन नै देखै सकलै आरु ऊ सभ्भे चीज सुनै के इच्छा करलकै, जे तोंय सिनी सुनी रहलो छै, लेकिन नै सुनै सकलै।”

### सच्चा पड़ोसिया

**25** एक दाफी धर्म नियम के एगो पंडित परखै वास्ते यीशु सँ ई सवाल पुछलकै, “गुरु, अनन्त जीवन के वारिश हुवै लेली हम्में की करियै?”

26 यीशु जबाब देलकै, “विधि-विधान में की लिखलो छै? ओकरा पढ़ी कें तोय कैसें समझै छै?”

27 एकरा पर ऊ आदमी जबाब देलकै, “लिखलो छै कि तोय आपनो प्रभु-परमेश्वर सँ आपनो पूरा मोन, पूरा आत्मा, पूरा शक्ति आरु पूरा बुद्धि के साथ प्रेम करें आरु तोय आपनो पड़ोसियो सँ वैसन्हें प्रेम करें जैसनो प्रेम तोय खुद सँ करै छै।” 28 यीशु कहलकै, “तोय ठीक कहलहैं। वैसन्हें करें तें तोय जीवन पयभै।”

29 लेकिन ऊ आदमी अपना कें धर्मी ठहराबै लेली यीशु सँ पुछलकै, “तें हमरो पड़ोसिया के छिकै?”

30 यीशु जबाब देलकै, “सुनें, एक आदमी एक दाफी यरुशलेम शहर सँ यरीहो नगर जाय रहलो छेलै। रास्ता में डाकू सिनी ओकरा घेरी लेलकै आरु ओकरो कपड़ा-लत्ता छीनी लेलकै, आरु ओकरा मारतें-मारतें अधमरा करी कें रास्ता किनारे छोड़ी कें चल्लो गेलै। 31 संयोग सँ यहूदी लोग सिनी के एगो पुरिहित वहे रास्ता सँ जाय रहलो छेलै। पुरोहित ऊ आदमी कें देखलकै लेकिन नजर फेरी कें बगल सँ आगु बढ़ी गेलै। 32 वहे तरहें मंदिर में सेवा करै वाला एगो आदमी, जखनी ऊ जग्घो पर अयलै, तें ओकरा वैनटां पड़लो देखलकै, लेकिन वहूँ मुँह फेरी कें आगु बढ़ी गेलै। 33 लेकिन एगो सामरी आदमी, जेकरा सिनी कें तोरा सिनी नीचा नजरी सँ देखै छै, वहे रास्ता सँ जाय रहलो छेलै। जखनी वें घायल आदमी कें रास्ता पर पड़लो देखलकै, तें ओकरो हृदय दया सँ भरी गेलै। 34 वें ओकरो नजदीक गेलै आरु ओकरो घाव पर तेल आरु अंगूर के रस सँ बनलो जड़ी-बुटि डाली कें मरहम-पट्टी बान्हि देलकै। तबे ऊ घायल आदमी कें आपनो सवारी पर बैठाय कें एगो रैन-बसेरा में लानलकै आरु ओकरो सेवा करलकै। 35 भोर होला पर रैन-बसेरा के मालिक कें चाँदी के दूगो सिक्का निकाली कें देलकै आरु कहलकै, ‘ई घायल आदमी के देखभाल करिहो। एकरा सँ बेसी जे भी खर्चा होतै, वापसी में हम्में चुकाय देभौ।’” 36 तबे यीशु ओकरा सँ पुछलकै, “आबे

हमरा बताबें कि तोरो विचार में ई तीनो आदमी में सँ के ऊ घायल आदमी के सच्चा पड़ोसिया कहलैते?”

**37** धर्म नियम के पंडित जबाब देलकै, “वहे ओकरो सच्चा पड़ोसिया कहलैते जे ओकरा पर दया करलकै।” तबे यीशु कहलकै, “जो, तोय भी वैसन्हें करिहैं।”

### मरियम आरु मार्था

**38** यीशु आरु हुनको चेला सिनी यरुशलेम के तरफ आगु बढ़तें हुवें एगो गाँव में गेलै, जैन्टां मार्था नाम के एगो महिला आपनो घर में हुनको सेवा-सत्कार करलकै।<sup>39</sup> वहे मार्था कँ मरियम नाम के एगो बहिनो छेलै। ऊ यीशु के गोड़ लिगां बैठी कँ हुनको बात सुनी रहलो छेलै।<sup>40</sup> लेकिन मार्था सेवा-सत्कार के भार सँ चिन्तित छेलै। वें यीशु लिगां आबी कँ हुनका सँ कहलकै, “हे गुरु, की आपने कँ ई बात के कनियोटा चिन्ता नै छै, कि हमरो बहिन सभ्भे काम करै लेली हमरा अकेले छोड़ी देलको छै? ओकरा हमरो मदद करै लेली कहियै।”

**41** एकरा पर यीशु जबाब देलकै, “हे मार्था, तोय बहुत्ते बात लेली चिन्ता-फिकिर करै छैं।<sup>42</sup> लेकिन एक्के बात जरुरी छै। मरियम वहे बढियाँ भाग कँ चुनी लेलको छै, जे ओकरा सँ छिनलो नै जैतै।”

### प्रार्थना के बारे में यीशु के शिक्षा

**11** एक दिन यीशु कोनो जग्घो में प्रार्थना करी रहलो छेलै। जखनी हुनी प्रार्थना करी चुकलै, तबे हुनको एगो चेला कहलकै, “हे गुरु, जैसें यूहन्ना बपतिस्मा दै वाला आपनो चेला सिनी कँ प्रार्थना करै लेली सिखैलकै, वैसें हमरो सिनी कँ परमेश्वर पिता सँ प्रार्थना करै लेली सिखैयै।”

**2** यीशु चेला सिनी कँ कहलकै, “तोरा सिनी परमेश्वर पिता सँ ई तरहें प्रार्थना करिहैं:

हे पिता,

आपने के नाम पवित्र मानलो जाय।

आपने के राज्य आबै।

<sup>3</sup> हमरा सिनी कॅ हरेक रोज लेली भोजन दियै,

<sup>4</sup> आरु हे परमेश्वर पिता, हमरा सिनी के पाप छमा करियै,

जैसें हमरो सिनी ओकरा सिनी कॅ छमा करै छियै, जे हमरो विरोध में पाप करै छै।

आरु हमरा सिनी कॅ पाप में फँसाबै वाला बातो सँ दूर राखियै।”

<sup>5</sup> तबे यीशु चेला सिनी कॅ कहलकै, “मानी ले कि तोरा सिनी में सँ केकरो एगो दोस्त छौ। तोंय आधो रात में ओकरो पास जाय कॅ कहै छैं, ‘दोस्त, हमरा तीन गो रोटी दियै।’ <sup>6</sup> कैहनेकि हमरो एगो मुसाफिर दोस्त हमरो यैन्ठां अयलो छै, ओकरा खिलाबै लेली हमरो पास कुच्छो नै छै।’

<sup>7</sup> आरु ऊ दोस्त घर कॅ भीतरे सँ अवाज दै, कि ‘हमरा तंग नै करें, केवाड़ी लागलो छै आरु बाल-बच्चा सिनी हमरो पास सुतलो छै। यह लेली उठी कॅ हम्मं कुच्छो नै दिये सकबौ।’ <sup>8</sup> हम्मं तोरा सँ कहै छियौ, कि भले ही दोस्त हुवै के नाते ऊ उठी कॅ ओकरा रोटी नै दै लिये चाहै, लेकिन बार-बार बिना संकोच माँगते रहला पर वें जरुरे उठी कॅ ओकरा जे भी जरुरी छै, ऊ सभ्भे देतै। <sup>9</sup> यह लेली हम्मं तोरा सिनी सँ कहै छियौ, कि माँगें तँ तोरा देलो जैतौ, खोजें तँ तोंय पैयभें, आरु खटखटाबें तँ तोरा लेली खोललो जैतौ। <sup>10</sup> कैहनेकि जे कोय माँगै छै, ओकरा मिलै छै, जे कोय खोजै छै, ऊ पाबै छै आरु जे कोय खटखटाबै छै, ओकरा लेली खोली देलो जाय छै।

**11** तोरा में सँ ऐसनो पिता के छैं, जेकरो बेटा जदि रोटी माँगतौ तँ ओकरा पत्थर देभैं, या जदि मछली माँगतौ तँ ओकरा साँप देभैं? <sup>12</sup> या अंडा माँगतौ, तँ बिच्छु देभैं? <sup>13</sup> तोंय सिनी तँ बुरा आदमी होला के बाबजूदो आपनो बाल-बच्चा कॅ अच्छा-अच्छा चीज दै लिये जानै छैं। तँ माँगैवाला सिनी, जे सिनी परमेश्वर पिता सँ माँगै छै, ओकरा सिनी कॅ परमेश्वर के आत्मा कैहने नै देलो जैतै?”

### यीशु के शक्ति कैन्टां सँ आबै छै?

**14** एक दाफी एगो आदमी कँ एगो गूंगा दुष्टात्मा पकड़ी लेलको छेलै। यीशु ऊ आदमी में सँ दुष्टात्मा कँ निकाली रहलो छेलै, आरु जखनी दुष्टात्मा निकली गेलै, तँ ऊ आदमी बोले लागलै। ई देखी कँ लोग सिनी अचंभित होय गेलै। <sup>15</sup>लेकिन कोय-कोय कहे लागलै, “हुनी तँ दुष्टात्मा सिनी के सरदार बालजबूले के सहायता सँ दुष्टात्मा निकालै छै।” <sup>16</sup>कुछ लोग यीशु कँ जाँचै लेली हुनका स्वर्ग सँ कोनो चमत्कार के चिन्ह देखलाबै लिये कहलकै।

**17** लेकिन यीशु ओकरा सिनी के मोन के विचार जानी कँ कहलकै, “जे राज्य में फूट पड़ी जाय छै, ऊ राज्य उजड़ी जाय छै आरु जे घर में फूट पड़ी जाय छै, तँ ऊ घरो नाश होय जाय छै। <sup>18</sup>अगर शैतान खूददे के विरोध में होय जाय, तँ ओकरो राज्य कैसें टिकलो रहतै? हममें ई बात यहै लेली कहै छियौ, कैहनेकि तोय सिनी कहै छै कि हममें दुष्टात्मा के सरदार बालजबूले के शक्ति सँ दुष्टात्मा निकालै छियै। <sup>19</sup>जदि हममें बालजबूल के शक्ति सँ दुष्टात्मा निकालै छियै, तँ तोरो लोग सिनी केकरो शक्ति सँ दुष्टात्मा निकालै छौ? यहै लेली वहै सिनी तोरा सिनी के फैसला करतौ, कि तोरा सिनी जे कहलहैं, ऊ झूठ छै। <sup>20</sup>लेकिन जदि हममें परमेश्वर के शक्ति सँ दुष्टात्मा कँ निकालै छियै, तँ ई जानी ले कि परमेश्वर के राज्य तोरा सिनी के बीद्यो में आबी गेलो छौ।

**21** जखनी कोय ताकतवर आदमी हाथ में हथियार ले कँ आपनो घर के रखवाली करै छै, तँ ओकरो धन-संपति के रक्षा होय छै। <sup>22</sup>लेकिन ओकरो सँ बेसी ताकतवर आदमी जखनी हमला करी कँ ओकरा वश में करी लै छै, तँ ओकरो सभ्भे हथियार जेकरो भरोसे वें छेलै, ऊ सभ्भे हथियार छिनी लै छै आरु ओकरो सभ्भे सम्पति लुटी लै छै आरु आपनो साथी सिनी में बाँटी दै छै।

23 जे कोय हमरो तरफ नै छै, ऊ हमरो विरोध में छै, या जे हमरो संग जमा नै करै छै, ऊ छिड़ियाबै छै।”

### खाली हृदय शैतान के बास

24 “जखनी कोय दुष्टात्मा कोनो आदमी सँ बाहर निकलै छै, तँ ऊ सूखा-परपट वाला जग्घो में आराम के खोज में भटकतें रहै छै, लेकिन ओकरा कोनो जग्घो नै मिलै छै। तबे वें कहै छै, ‘हम्मं फेनू सँ आपनो पैहने वाला घर में जैबै, जैन्टां सँ निकली कँ बाहर अयलो छियै।’<sup>25</sup> आरू जखनी वें वैन्टां वापस पहुँचलै, तँ ऊ घर कँ झाड़लो-बुहारलो आरू सजलो-धजलो पैलकै,<sup>26</sup> तबे वें जाय कँ आपनो सँ खराब सात-गो दुष्टात्मा कँ लानै छै आरू वें सिनी वहे आदमी के भीतर आपनो घर बनाय लै छै, जेकरा सँ वें बाहर अयलो छेलै। ई तरहें, ऊ आदमी के दशा पैहनो सँ बदतर होय जाय छै।”

27 यीशु ई सभ्भे बात कहिये रहलो छेलै, कि भीड़ में सँ एगो महिला जोर सँ बोली उठलै, “धन्य छै ऊ माय, जे आपने कँ जनम देलकै आरू दुध पिलैलकै!”<sup>28</sup> यीशु कहलकै, “हाँ! लेकिन ओकरो सँ बेसी धन्य छै ऊ लोग सिनी, जे परमेश्वर के वचन सुनै छै आरू ओकरा मानतो छै।”

### अविश्वासी पीढ़ी के लेली चेतावनी

29 जखनी यीशु के चारो बगल लोग सिनी के भीड़ लागी गेलै, तँ हुनी ओकरा सिनी सँ कहलकै, “ई भ्रष्ट पीढ़ी के लोग सिनी चमत्कार के चिन्ह माँगै छै, लेकिन परमेश्वर के भविष्यवक्ता योना के साथ जे घटना घटलो छेलै, ऊ चिन्ह छोड़ी कँ आरू कोनो चिन्ह ओकरा सिनी कँ नै देखैलो जैतै।<sup>30</sup> जैसँ योना के साथ जे घटना घटलै, ऊ निनवे नगर के लोग सिनी के लेली परमेश्वर के एगो चिन्ह बनलै, वैसँ हमरो\* ”

संग जे घटना घटतै, ऊहो ई पीढ़ी के लोग सिनी वास्तें ई बात के चिन्ह ठहरतै कि परमेश्वरें हमरा भेजलको छेलै।

**31** बहुत्ते समय पैहने राजा सुलेमान आपनो परजा सिनी कँ बुद्धि के बहुत्ते सारा बात बतैलो करै छेलै। लोग सिनी दूर-दूर देश सँ ओकरो बात सुनै लेली आबै छेलै। दक्षिण देश के रानी सेहो दूर देश सँ ओकरो बात सुनै लेली अयलो छेलै। ऊ रानी न्याय के दिन में ई पीढ़ी के लोग सिनी के साथ खड़ा होतै आरु ओकरा सिनी कँ दोषी ठहरैतै, कैहनेकि अखनी यैन्टां जे खड़ा छै, ऊ राजा सुलेमानो सँ महान छै।<sup>32</sup> निनवे के लोग सिनी न्याय के दिन में ई पीढ़ी के लोग सिनी के साथ खड़ा होतै आरु ओकरा सिनी कँ दोषी ठहरैतै, कैहनेकि वें सिनी तँ योना के प्रचार सुनी कँ आपनो पाप सँ मुँह मोड़लकै, आरु देखें, हम्में तोरा सिनी सँ कहै छियौ कि जे अखनी यैन्टां खड़ा छै, ऊ योनों सँ महान छै।

### शरीर के दिया

**33** कोय्यो आदमी दिया जलाय कँ ओकरा नुकाय कँ नै राखै छै, नै ही कोनो बर्तन सँ झाँपी कँ राखै छै। वें ओकरा दिपहरो पर राखै छै, ताकी भीतर आबै वाला सिनी कँ रोशनी मिलै।<sup>34</sup> शरीर के दिया आँख छियै। आँख अगर ठीक छै, तँ पूरा शरीर रोशनी में रहै छै, लेकिन आँख अगर खराब छै, तँ पूरा शरीर अन्हार में छै।<sup>35</sup> यहे लेली सचेत रहें कि तोंय जेकरा आपनो भीतर के रोशनी बुझै छै, कहीं ऊ वास्तव में अन्हारे तँ नै छियौ।<sup>36</sup> यहे लेली जदि तोरो पूरा शरीर रोशनी सँ भरलो छौ आरु कोनो अंग अन्हार में नै छौ, तँ पूरा शरीर ज्योति सँ चमकतौ, जैसे कि दिया आपनो तेज रोशनी सँ तोरा चमकाबै छौ।”

### फरिसी आरु धर्म-गुरु सिनी पर धिक्कार

**37** जखनी यीशु ई सभ्भे बात कहना समाप्त करलकै, तँ हुनका एगो फरिसी आपनो यैन्टां भोजन करै के न्योता देलकै। हुनी ओकरा यैन्टां

जाय कॅ घर के भीतर भोजन करै लेली बैठलै। <sup>38</sup> तँ फरिसी कॅ ई देखी बड़ा अचंभा होलै कि यीशु बिना नहैले भोजन करै लेली बैठी गेलै। फरिसी लोग सिनी के परंपरा अनुसार भोजन करै सँ पैहने शुद्ध हुवै लेली नहाना जरूरी छेलै। <sup>39</sup> यीशु ओकरा कहलकै, “तोंय सिनी थारी-कटोरा कॅ बाहरे-बाहर माँजै तँ छै, लेकिन तोरो भीतर लोभ आरु दुष्टता भरलो छौ। <sup>40</sup> अरे निर्बुद्धि सिनी, जे बाहरी भाग कॅ बनैलकै, की हुनीयें भीतरको भाग कॅ नै बनैलकै? <sup>41</sup> यहै लेली तोरा सिनी गरीब-कंगाल सिनी कॅ दान दै कॅ आपनो भीतर कॅ शुद्ध करी ले, तँ तोरा सिनी पूरा तरहें शुद्ध होय जयभैं।

**42** हे फरिसी सिनी, तोरा सिनी पर धिक्कार छौ! कैहनेकि तोंय सिनी आपनो खेत-खलिहान के छोटका सँ छोटका रूपज सँ हुवै वाला आमदनी के दसमा हिस्सा तँ परमेश्वर के नाम में दै छै, लेकिन दोसरा के उचित न्याय करै में आरु परमेश्वर सँ प्रेम करै में तोरा सिनी चुकी जाय छै। दसमा हिस्सा तँ जरुरे देना चाहियो, लेकिन एकरो साथे जे बेसी जरूरी बात छै, यानि दोसरा लेली उचित न्याय आरु परमेश्वर लेली प्रेम, ओकरो नै भुलना चाहियो।

**43** हे फरिसी लोग सिनी, तोरा सिनी पर धिक्कार छौ! कैहनेकि तोरा सिनी कॅ हर वक्ती धर्म सभा-भवन में ऊँचो आसन पाना आरु हाट-बाजार में लोग सिनी के परनाम-पाती पाना बहुत्ते अच्छा लागै छौ।

**44** हाँ, धिक्कार छौ तोरा सिनी पर, कैहनेकि तोंय सिनी वैसनं छै, जैसे कि खेत में छुपलो बिना निशानी वाला कब्बर, जेकरा पर लोग सिनी अनजाने में चलै-फिरै छै, आरु अशुद्ध होय जाय छै।” <sup>45</sup> एकरा पर एगो धर्म-नियम के पंडित यीशु कॅ जबाब देलकै, “हे गुरु, ई बात बोली कॅ अपने हमरो सिनी के अपमान करै छियै।” <sup>46</sup> यीशु जबाब में कहलकै, “हे धर्म-नियम के पंडित सिनी, तोरो सिनी पर धिक्कार छौ, तोंय सिनी लोग सिनी पर ऐसनो बोझ लाधी दै छै, जेकरा वें सिनी उठाबें नै सकै छै आरु ओकरा सिनी कॅ बोझ उठाबै में तोंय सिनी एगो अंगुलियो के सहारा नै दै छै।”

**47-48** “तोरा सिनी पर धिक्कार छौ! तोरा सिनी के बापे-दादा सिनी नें परमेश्वर के भविष्यवक्ता सिनी के हत्या करलको छेलौ। आबे तोरा सिनी ओकरा सिनी के कब्बर पर मकबरा बनावै छैं! ऐसनो करी कॅ तोंय सिनी ई बात कॅ देखलाबै छैं, कि तोंय सिनी आपनो बाप-दादा सिनी के करलो काम सँ सहमत छैं। कहै के माने ई छै, कि वें सिनी तँ परमेश्वर के भविष्यवक्ता सिनी के हत्या करलकौ आरु तोरा सिनी ओकरा सिनी के कब्बर पर मकबरा बनाय कॅ आपनो बापे-दादा सिनी के कामे कॅ आगु बढाय रहलो छैं। परमेश्वर तोरा सिनी कॅ बहुते भारी सजा देतौ! <sup>49</sup>यहे लेली सभ्भे कुछ जानै वाला परमेश्वर कहलकै, ‘हम्मं आपनो भविष्यवक्ता आरु दूत सिनी कॅ ऊ लोग सिनी के बीद्यो में भेजबै। पर ऊ लोग सिनी ओकरा में सँ कुछ भविष्यवक्ता आरु दूत सिनी कॅ मारी देतै आरु कुछ कॅ सतैतै।’ <sup>50</sup>आरु संसार के सुरुआत सँ ले करी कॅ आय तलक हमरो भविष्यवक्ता सिनी के जेतना लहू बहैलो गेलो छै, ऊ सभ्भे के हिसाब-किताब यहे पीढी के लोगो सँ लेलो जैतै। <sup>51</sup>यानि कि हाबिल के हत्या सँ ले करी कॅ जकरयाह के हत्या तक, जे कि मंदिर के बलि-वेदी आरु परमेश्वर के भवन के बीद्यो में घात करलो गेलो छेलै। हम्मं तोरा सँ कहै छियौ, कि ई सभ्भे के पूरा हिसाब-किताब यहे पीढी के लोग सिनी सँ लेलो जैतै।”

**52** “हे धर्म-नियम के पंडित सिनी, तोरा सिनी पर धिक्कार छौ, कैहनेकि तोंय सिनी ज्ञान के द्वार के चाभी हथियाय तँ लेलहैं, लेकिन तोंय खुद ओकरा में प्रवेश नै करलहैं आरु जे प्रवेश करै वाला छेलै, ओकरो सिनी कॅ रोकी देलहैं।”

**53** जखनी यीशु वैन्टां सँ विदा होय कॅ आगु बढलै, तँ फरिसी आरु धर्म-गुरु सिनी हुनको कट्टर विरोधी होय गेलै। वें सिनी हुनका सँ अलग-अलग विषय पर सवाल-जबाब करे लागलै। <sup>54</sup>वें सिनी ई ताक में लागलो छेलै, कि यीशु के कहलो बातो में ही हुनका कैसं फँसैलो जाय।

### कपटीपना सँ सावधान

**12** एतन्हें में वैनटां हजारों-हजार लोगो के भीड़ जमा होय गेलै। भीड़ एतना बड़का छेलै कि लोग सिनी एक-दोसरा पर गिरे-पड़े लागलै। तखनियें यीशु सबसे पैहने आपनो चेला सिनी सँ कहलकै, “फरिसी लोग सिनी के शिक्षा\* सँ सावधान रहें, कैहनेकि ऊ लोग सिनी कपटी छै।<sup>2</sup> जे कुच्छो बात अखनी झाँपलो छै, ऐसनो समय आबी रहलो छै, जखनी ऊ सभ्भे बात उधारलो जैतै। हमरो कहै के माने छै, कि अखनी कुच्छो बात छिपलो नै छै, जे जानलो नै जैतै।<sup>3</sup> जे कुच्छो बात तोंय अन्हार में कहलो छै, ऊ सभ्भे रोशनी में सुनलो जैतै आरु जे कुच्छु बन्द कोठरी में कानो-कान फुसफुसाय कँ कहलो छै, ऊ सभ्भे छत पर सँ खुल्ला रुप में घोषणा करलो जैतै, ताकी सभ्भे सुनै।”

### आदमी सँ नै डरें!

4 “हे हमरो साथी-संगी सिनी, हम्मं तोरा सिनी सँ कहै छियौ, कि ओकरा सिनी सँ नै डरें, जे शरीर के हत्या करे सकै छै, आरु ओकरा सँ बेसी कुच्छो नै करे सकै छै।<sup>5</sup> केकरा सँ डरें? हम्मं कहै छियौ कि परमेश्वर सँ डरें। कैहनेकि तोरो शरीर के मरला के बादो तोरा नरक में फेकी दै के अधिकारो हुनके पास छै। हाँ, हम्मं तोरा सिनी सँ कहै छियौ कि हुनके सँ डरें।<sup>6</sup> की दूगो पैसे में पाँच गो गोरैया नै बिकै छै? लेकिन एकरो बाबजूदो परमेश्वर ऊ सभ्भे में सँ एकको कँ नै भुलै छै।<sup>7</sup> सच तँ ई छै कि तोरा सिनी के माथा के एक-एक केशो गिनलो छौ, यह लेली डरें नै, कैहनेकि तोरा सिनी गोरैया सिनी सँ बहुते बेसी कीमती छै।”

---

12:1 मूल में ‘शिक्षा’ के जगघो पर देलो गेलो छै- ‘खमीर’।

**8** “हममें तोरा सिनी कॅ यहो कहै छियौ, कि जे कोय सबके सामना में हमरो भक्त बनी कॅ हमरा स्वीकार करी लेतै, ओकरो हममें\* परमेश्वर के स्वर्गदूत सिनी के सामना में आपनो मानी लेबै।<sup>9</sup> लेकिन जे कोय लोगो सिनी के सामना में हमरा नकारतै, वहूँ परमेश्वर के स्वर्गदूत सिनी के सामना में नकारलो जैतै।”

**10** “जे हमरो\* विरोध में कोनो बात बोलतै, ओकरा तँ छमा करलो जैतै, लेकिन जे कोय परमेश्वर के आत्मा के निन्दा करतै, ओकरा छमा नै करलो जैतै।”

**11** “आरु जखनी लोग सिनी तोरा सिनी के फैसला करै लेली धर्म सभा-भवन में ले जैतौ या अधिकारी आरु हाकिम सिनी के सामना में हाजिर करतौ, तँ एकरो चिन्ता नै करिहैं कि आपनो बचाव कैसें करबै या की जबाब देबै।<sup>12</sup> कैहनेकि परमेश्वर के आत्मा वहे समय में तोरा सिखाय देतौ कि तोरा की कहना जरुरी छौ।”

### लोभ के बारे में यीशु के चेतावनी

**13** तबे भीड़ में सँ एगो आदमी यीशु सँ कहलकै, “हे गुरु, हमरो भाय सँ कहियै कि बाबूजी जे सम्पत्ति छोड़ी कॅ गेलो छै, ओकरो बटवारा करी कॅ हमरो हिस्सा हमरा दे दिये।”

**14** लेकिन हुनी जबाब देलकै, “हे बाबू, हमरा तोरो सिनी के बीचो में पंचैती करै वाला या बटवारा करैवाला के बनैलकै?”

**15** तबे हुनी लोग सिनी सँ कहलकै, “सावधान रहें! सभ्भे तरह के लोभ सँ अपने-आप कॅ बचाय कॅ राखें, कैहनेकि आदमी के जीवन ओकरो धन-सम्पत्ति पर निर्भर नै करै छै, भले ही ऊ आदमी केतनो मातबर कैहने नै हुवे।”

---

**12:8** मूल में ‘हममें’ के जग्घो पर लिखलो छै- “मनुष्य-पुत्र”। **12:10** मूल में ‘हमरो’ के जग्घो पर लिखलो छै- “मनुष्य-पुत्र के”।

**16** ओकरो बाद हुनी ओकरा सिनी कॅ ई सिखाबैवाला खिस्सा कहलकै, “कोनो मातबर आदमी के खेत में बड़्डी ऊपजा होलै। <sup>17</sup> ऊ आदमी मोने-मन सोचै लागलै कि आबे हम्मं की करियै? हमरो पास तँ एतना अनाज राखै लेली जग्घो नै छै। <sup>18</sup> तबे ऊ आदमी सोचलकै कि हम्मं ऐसनो करबै कि सभ्भे छोटका-छोटका कोठी तोड़ी कॅ बड़का-बड़का ठेक बनाय लेबै आरु ओकरे में हम्मं आपनो अनाज आरु सभ्भे धन-दौलत राखबै। <sup>19</sup> तबे हम्मे अपने-आप सँ कहबै, कि ‘आबे तोरा लेली सालों-साल वास्तें धन-दौलत राखलो छौ। आबे आराम सँ रहें, खो-पी आरु आनंद करें।’ <sup>20</sup> लेकिन परमेश्वर ओकरा सँ कहलकै, ‘अरे मूर्ख, आय राती तोरो प्राण ले लेलो जैतौ। तबे एतना जे जमा करलहैं, ऊ सभ्भे केकरो होतौ?’” <sup>21</sup> यीशु आगु कहलकै, “यहे दशा ओकरो होतै, जे आपना लेली धन-दौलत जुटाबै तँ छै, लेकिन परमेश्वर के साथ सही रिश्ता नै राखै छै।”

### चिन्ता नै करें

**22** तबे यीशु आपनो चेला सिनी सँ कहलकै, “यहे लेली हम्मं तोरा सिनी सँ कहै छियौ, कि आपनो जिन्दगी के बारे में चिन्ता नै करें, कि तोंय की खैभें आरु की पहिनभें। <sup>23</sup> कैहनेकि भोजन सँ बढी कॅ छौ तोरो जिन्दगी आरु कपड़ा सँ बढी कॅ छौ तोरो शरीर। <sup>24</sup> कौआ कॅ देखें! वें सिनी नै बीया बुनै छै आरु नै कटनी करै छै। ओकरा सिनी कॅ नै कोठी छै आरु नै ठेक। फेनू भी परमेश्वर ओकरा सिनी कॅ भोजन खिलाबै छै। तोरा सिनी तँ चिड़ियाँ सिनी सँ केतना बेसी कीमती छैं! <sup>25</sup> तोरा सिनी में सँ के छैं, जे चिन्ता करी कॅ आपनो औरदा कॅ एक्को पल बढ़ाबें सकै छैं? कोय्यो नै! <sup>26</sup> जखनी चिन्ता-फिकिर करला के बादो तोंय सिनी ई छोटको काम नै करे सकै छैं, तँ बड़का बातो सब के चिन्ता कैहने करै छैं?”

**27** “जंगली फूल सब कॅ देखें कि वें सिनी कैसें खिलै छै! ओकरा सिनी के बारे में जरा सोचें कि वें सिनी नै तँ मेहनत करै छै आरु नै ही

अपना लेली पोशाक बनाबै छै। एकरो बाबजूदो हम्मं तोरा सँ कहै छियौ, कि राजा सुलेमान आपनो राजसी पोशाको में ई फूल के जैसनो सुन्दर नै लागै छेलै। <sup>28</sup>हे अल्पविश्वासी सिनी! तोंय सिनी जानै छैं, कि जंगली घास आय मैदान में उगै छै आरु अगला दिन आग में झोंकलो जाय छै। एकरो बाबजूदो परमेश्वर ओकरा ई तरहें हरा-भरा राखै छै, तँ की हुनी निश्चिते तोरा सिनी कँ नै पहनैतौ-ओढैतौ? <sup>29</sup>तोरा सिनी ई सभ्भे बातो के चिन्ता-फिकिर में नै पड़लो रहें, कि तोंय की खयभैं आरु की पीभैं। <sup>30</sup>ई संसार में परमेश्वर कँ नै जानै वाला लोग सिनी ई सब बातो के पीछु दौड़तें रहै छै, लेकिन तोरा सिनी के पिता तँ जानै छौ, कि तोरा सिनी कँ कोन-कोन चीजो के जरुरत छौ। <sup>31</sup>यहे लेली परमेश्वर के राज्य के खोज में लागलो रहें, तँ हुनी तोरा ऊ सभ्भे चीज दे देतौ, जेकरो तोरा जरुरी छौ।

**32** हे हमरो छोटो झूंड, नै डरें, कैहनेकि तोरा सिनी के पिता खुशी-खुशी आपनो राज्य तोरा सिनी कँ दै लेली फैसला करी लेलको छौ। <sup>33</sup>आपनो धन-दौलत बेची कँ गरीब-कंगाल सिनी कँ दान करी दहें। आपनो लेली ऐसनो बटुवा बनाय ले जे कहियो नै फटतौ। स्वर्ग में धन जमा करें, जे कहियो नै घटै छै, चोर जेकरा चोरी नै करे सकै छै आरु कीड़ा-मकोड़ा जेकरा नुकसान नै पहुँचाबे सकै छै। <sup>34</sup>कैहनेकि जे जग्घो में तोरो धन रहतौ, वहे जग्घो में तोरो मोन लागलो रहतौ।”

### जागलो रहें

**35** “तोरा सिनी आपनो कमर कसले रहें आरु आपनो दिया जलैने रहें। <sup>36</sup>ऊ नौकर सिनी के जैसनो सचेत रहें, जे आपनो मालिक के आबै के रास्ता देखी रहलो छै, कि मालिक जखनी विवाह के भोज खाय कँ अयतै आरु केवाड़ी खटखटैतै, तँ वें सिनी तुरन्ते केवाड़ी खोली देतै। <sup>37</sup>लौटला पर मालिक जे दास सिनी कँ जागलो पयतै, ऊ दास सिनी केतना धन्य होतै। हम्मं तोरा सिनी सँ कहै छियौ, कि मालिक ओकरा

सिनी कॅ खाना खिलाबै वास्तें बैठैते आरु कमर कसी कॅ आपनो हाथो सँ परोसी कॅ ओकरा सिनी कॅ खिलैतै।<sup>38</sup> धन्य छै ऊ दास सिनी, जेकरा सिनी कॅ मालिक रात के दोसरो या तेसरो पहरो में अयला पर तैयार पयतै।

**39** लेकिन ई जानी ले कि घरबैया जदि जानी लेतिहै कि चोर कोन पहर में आबी रहलो छै, तँ ऊ चोर कॅ आपनो घरों में चोरी नै करे देतिहै।<sup>40</sup> तोरो सिनी हर समय तैयार रहें, कैहनेकि तोंय सिनी नै जानै छैं कि ‘मनुष्य-पुत्र’\* कखनी आबी जैतै।”

**41** एकरा पर पतरस पुछलकै, “हे गुरु, आपने ई सिखाबै वाला खिस्सा खाली हमरा सिनी लेली कही रहलो छियै या कि सभ्भे लोगो लेली?”

**42** यीशु जबाब देलकै, “विश्वास करै लायक आरु बुधियार नौकर ऊ छै, जेकरा मालिक आपनो घरों के बाकी नौकर-चाकर सिनी के ऊपर मेठ बनाय देतै, जे ठीक समय पर ओकरा सिनी कॅ खाना-पीना देतै।<sup>43</sup> मालिक जखनी वापस अयतै आरु देखतै कि ओकरो नौकर बढ़िया तरहें आपनो जिम्मेवारी निभैलकै, तँ ऊ नौकर लेली केतना भला होतै।<sup>44</sup> हममें तोरा सँ सच-सच कहै छियौ, कि मालिक आपनो समुच्चे संपत्ति के जिम्मेदारी ओकरा सौंपी देतै।<sup>45</sup> लेकिन ऊ नौकर जदि आपनो मोन में सोचे लागे कि हमरो मालिक कॅ आबै में बहुते देरी छै आरु वें बाँकी नौकर-चाकर सिनी कॅ मारे-पीटे लागे आरु खाय-पीबी कॅ मातलो रहे लागे,<sup>46</sup> तँ ओकरो मालिक ऐसनो दिन में घुमी कॅ वापस अयतै, जखनी वें हुनको रास्ता नै ताकते होतै आरु ऐसनो समय में अयतै, जे वें नै जानतै। तबे मालिक ओकरा खण्ड-खण्ड करी देतै आरु ओकरो अन्त वैसनें होतै, जैसे कि अविश्वासी सिनी के होय छै।

**47** ऊ नौकर जे आपनो मालिको के इच्छा तँ जानै छेलै, एकरो बाबजूदो ओकरा पूरा करै लेली ऊ कोनो तैयारी नै करलकै, ऊ बहुते मार खेतै कैहनेकि मालिको के इच्छा जानै के बाबजूदो वें ओकरा पूरा

नै करलकै। <sup>48</sup> लेकिन वें थोड़ो मार खैतै, जे अनजाने में कोय गलती करै छै। जेकरा बेसी देलो जाय छै, ओकरा सँ बेसी उम्मीदो करलो जाय छै, यानि कि जेतना बेसी केकरो हाथो में सौंपलो जाय छै, ओकरो सँ बेसी अनुपात में ओकरा धुमाबे लऽ पड़तै।”

### यीशु के कारने फूट

**49** हममें धरती पर आग लगाबै वास्तें अयलौ छियै आरु हमरा बहुते इच्छा छेलै, कि ऊ आग अखनी तक सुलगी गेलो होतियै। <sup>50</sup> लेकिन हमरा एगो बड़का कष्ट\* उठाना छै आरु जखनी तलक ऊ पूरा नै होतै, तखनी तलक हममें बहुते व्याकुल छियै। <sup>51</sup> की तोरा सिनी सोचे छै कि हममें धरती पर मेल-मिलाप कराबै लेली अयलौ छियै? नै, हममें तोरा सिनी सँ कहै छियौ कि मेल-मिलाप नै, बल्कि फूट कराबै लेली। <sup>52</sup> अखनी सँ एक्के परिवार में पाँच लोग एक-दोसरा के विरोधी बनी जैतै, तीन लोगो के विरोध में दूगो आरु दूगो के विरोध में तीन। <sup>53</sup> अखनी सँ अपने में फूट होय जैतै: बाप बेटा के विरोध में, आरु बेटा बाप के विरोध में, माय बेटी के विरोध में, बेटी माय के विरोध में, सास पुतौह के विरोध में आरु पुतौह सास के विरोध में।

### ई युग के लक्षण

**54** यीशु भीड़ में जमा लोग सिनी सँ कहलकै, “जखनी तोरा सिनी पश्चिम दिशा में मेघ उठतें हुवें देखै छै, तँ तोय सिनी जानी जाय छै, कि बरसा होतै आरु वैसनें होतौ छै। <sup>55</sup> आरु जखनी दक्खिन दिशा सँ हवा बहै छै, तँ जानी जाय छै, कि बड़ा गर्मी पड़तै आरु वैसनें होतौ छै। <sup>56</sup> अरे पाखंडी सिनी, धरती आरु आकाश के चिन्ह तँ तोरा सिनी चिन्ही

लै छैं, लेकिन अखनका जुग में जे घटना सब घटी रहलो छै, ओकरा कैहने नै चिन्हे सकै छैं?”

57 “तोरा सिनी खूददे ई फैसला कैहने नै करै छैं कि सही की छै? 58 जदि कोय विरोधी तोरा पर मुकदमा ठोकी कॅ कचहरी ले जाय रहलो छौ, तँ रास्ताहै में ओकरा साथ मेल-मिलाप करै के कोशिश करें, ताकि तोंय छुटी जो। कहीं ऐसनो नै होय जाय कि तोरो विरोधी तोरा जबरदस्ती हाकिम के सामना में ले जाव आरु हाकिम तोरा सिपाही के हाथो में सौंपी दिये आरु सिपाही तोरा जेल में बंद करी दिये। 59 हम्में तोरा सँ कहै छियौ कि जखनी तलक तोंय ओकरो एक-एक पैसा चुकाय नै देभैं, तखनी तलक वैन्ठां सँ नै छुटभैं।”

**13** तखनिये कुछ लोग यीशु लिगां आबी कॅ हुनका गलील श्रेत्र सँ अयलो कुछ लोग सिनी के साथ घटलो घटना के बारे में सुनैलकै। घटना ई छेलै, कि एक दाफी वें सिनी बलि चढ़ाय रहलो छेलै। वहे समय में राज्यपाल पिलातुस बहुत्ते बेरहमी के साथ ओकरा सिनी के हत्या करबाय देलकै। 2 यीशु जबाब देलकै, “ओकरहै सिनी के साथे ऐसनो घटना कैहनें घटलै, दोसरो लोग सिनी के साथ कैहनें नै घटलै? की तोरा सिनी के विचार में वें सिनी गलील के दोसरो लोग सिनी सँ बेसी पापी छेलै? 3 हम्में तोरा सिनी कॅ कहै छियौ कि नै! सच्चाई तँ ई छै, कि सभ्भे कोय पापी छै। कोय्यो आदमी जदि आपनो पाप सँ मुँह मोड़ी कॅ आपनो हृदय नै बदलतै, तँ निश्चित छै कि वहूँ नाश होय जैतै। 4 आरु तोरा सिनी कॅ याद होतौ ऊ अठारहो-गो लोग, जेकरा सिनी पर यरुशलम शहर के सिलोह नाम के जग्घो में मीनार गिरी पड़लो छेलै आरु वें सिनी दबी कॅ मरी गेलो छेलै। की तोरा सिनी के विचार में वें सिनी यरुशलम के आरु सभ्भे लोगो सँ बेसी पापी छेलै? 5 हम्में तोरा सिनी सँ कहै छियौ कि, नै! सभ्भे कोय पापी छै। जखनी तोरो सिनी आपनो पाप सँ मुँह मोड़ी कॅ आपनो हृदय परिवर्तन नै करभैं, तँ तहूँ सिनी नाश होय जयभैं।”

### बिना फल के पेड़

6 तबे यीशु ओकरा सिनी कॅ एगो सिखाबै वाला खिस्सा कहलकै, “एगो आदमी के अंगूर के बगीचा में एगो अंजीर के गाछ छेलै। एक दिन वें फल तोड़ै लेली गेलै, तँ ओकरा एक्को फल नै मिललै। 7 तबे वें माली सँ कहलकै, ‘देखें! हम्मं तीन साल सँ ई गाछी सँ फल तोड़ै लेली आबी रहलो छियै, लेकिन ई फलते नै छै। एकरा काटी दहें। ई बेकारे में जग्घो छेकले छै।’ 8 माली जबाब देलकै, ‘मालिक, एकरा एक साल आरु छोड़ी देलो जाय। हम्मं एकरो जड़ो के चारो तरफ कोड़ी कॅ खाद-पानी देबै। 9 जदि अगला साल फलतै तँ ठीक छै, नै तँ आपने एकरा कटबाय देबै।”

### कुबड़ी महिला कॅ ठीक करना

10 यहूदी लोग सिनी के आराम के कोनो दिन पर यीशु ओकरा सिनी के धर्म सभा-भवन में शिक्षा दे रहलो छेलै। 11 वहे जग्घो में एगो महिला ऐसनो छेलै, जेकरा दुष्टात्मा अठारह साल सँ पकड़को छेलै आरु ई कारनं ओकरो कमर टुटी गेलो छेलै आरु वें कैसनो कॅ सीधा नै हुवे सकै छेलै। 12 जखनी यीशु के नजर ऊ कुबड़ी पर पड़लै, तँ हुनी ओकरा बोलैलकै आरु कहलकै, “हे नारी, तोंय ई रोगो सँ छुटी गेलो छै।” 13 ई कहतें हुवें ओकरा पर हुनी हाथ राखलकै आरु ऊ महिला तुरन्ते सीधा खड़ा होय गेलै आरु परमेश्वर के जय-जयकार करे लागलै।

14 एकरा पर यहूदी धर्म सभा-भवन के अधिकारी गोसाय गेलै, कैहनेकि यीशु आराम के दिन में ओकरा ठीक करलकै। ऊ अधिकारी वैन्ठां जमा लोग सिनी कॅ कहे लागलै “काम करै लेली छऽ दिन छै, यहे लेली यहे छऽ दिनों में आबी कॅ बीमारी सँ ठीक हुवें, आराम के दिनों में नै।”

15 यीशु ओकरा जबाब देलकै, “रे पाखंडी सिनी! की तोरा सिनी आरामो के दिन आपनो बैल या माल-जाल कॅ गोहाली सँ खोली कॅ पानी

पिलाबै वास्तें नै ले जाय छैं? <sup>16</sup> आरु ई महिला अब्राहमे के वंश के छेकै। शैतान अठारह साल सँ एकरा आपनो बंधन में राखलको छेलै। की आराम के दिन हुवै के बाबजुदो एकरा ई बंधन सँ आजाद करलो जाना ठीक नै छेलै?” <sup>17</sup> यीशु जखनी ई बात कहलकै, तँ हुनको सभ्भे विरोधी लज्जित होय गेलै। लेकिन सभ्भे लोग हुनको अच्छा-अच्छा काम सब देखी कँ आनंदित होलै। <sup>18</sup> तबे यीशु कहलकै, “परमेश्वर के राज्य केकरो जैसनो छै? ओकरो तुलना केकरा सँ करियै? <sup>19</sup> परमेश्वर के राज्य राई के एगो छोटो दाना जैसनो छै, जेकरा किसान आपनो खेत में बुनलकै। ऊ दाना बढ़ी कँ गाछ बनी गेलै आरु ओकरो डाली पर चिड़िया-चुनमुन आबी कँ खोता बनाय लेलकै।”

### रोटी फुलाबै वाला खमीर के उदाहरण

**20** यीशु दुबारा कहलकै, “परमेश्वर के राज्य केतुलना हम्मं केकरा सँ करियै? <sup>21</sup> परमेश्वर के राज्य खमीर के जैसनो छै, जेकरा एगो महिला तीन पसेरी आटा में मिलाय कँ सानलकै। बाद में खमीर के शक्ति सँ पूरा आटा फुली गेलै।”

### सँकरा दरवाजा

**22** तबे यीशु नगर-नगर आरु गाँव-गाँव घुमी कँ उपदेश देतें हुवें यरुशलेम केतरफ बड़े लागलै। <sup>23</sup> तँ कोय आदमी हुनका सँ पुछलकै, “हे गुरु, की थोड़े लोग मुक्ति पाबे सकतै?” यीशु ओकरा जबाब देलकै, <sup>24</sup> “तोरा सिनी परमेश्वर के राज्य में ले जाय वाला सँकरा दरवाजा सँ प्रवेश करै लेली जी-जान सँ मेहनत करें, कैहनेकि हम्मं तोरा सिनी कँ बताबै छियौ कि बहुते लोग एकरा में प्रवेश करै लऽ चाहतै, लेकिन प्रवेश नै करे सकतै। <sup>25</sup> जखनी घर कँ मालिक उठी कँ दरवाजा बंद करी लेतै, तँ बहुते देर होय जैतौ। तबे तोय सिनी बाहर खड़ा होय के दरवाजा खटखटैतें हुवें विनती करभैं आरु कहभैं, ‘हे मालिक, हमरा

सिनी लेली दरवाजा खोली दियै।’ लेकिन वें जबाब देतौ, ‘हम्मं तोरा सिनी कॅ नै पहचानै छियौ आरु यहो नै जानै छियौ, कि तोरा सिनी कैन्टां सँ अयलो छैं।’<sup>26</sup> तबे तोंय सिनी कहे लागभैं, कि ‘हमरा सिनी तँ अपने के संग में खैलियै-पिलयै, आरु अपने हमरो गाँव-घर में शिक्षा दै छेलियै।’<sup>27</sup> लेकिन हुनी जबाब देतौ, ‘हम्मं तोरा नै चिन्है छियौ आरु यहो नै जानै छियौ कि तोरा सिनी कैन्टां सँ अयलो छैं। हे कुकर्मी सिनी! हमरो पास सँ चल्लो जो!’

**28** जखनी तोंय अब्राहम, इसहाक, याकूब आरु परमेश्वर के भविष्यवक्ता सिनी कऽ परमेश्वर के राज्य में देखभैं आरु अपने-आप कॅ बाहर निकाल्लो पैभैं, तँ तोरा सिनी कानभैं आरु दाँत कटकटैभैं।<sup>29</sup> चारो दिश सँ लोग सिनी आबी कॅ परमेश्वर के राज्य में भोज खाय लेली बैठतै।<sup>30</sup> आरु ध्यान दहें, कि अखनी जे लोग सिनी के कोनो मान-सम्मान नै छै, ऊ समय ओकरा सिनी कॅ बहुते मान-सम्मान मिलतै आरु अखनी जे लोग सिनी के बहुते मान-सम्मान छै, ऊ समय ओकरा सिनी कॅ कोनो मान-सम्मान नै होतै।”

### हम्मं आपनो लक्ष्य पूरा करबै

**31** तखनियें कुछ फरिसी लोग सिनी आबी कॅ यीशु सँ कहलकै, “आपने यैन्टां सँ चल्लो जैयै, कैहनेकि राजा हेरोदेस आपने कॅ मारै लेली चाहै छै।”<sup>32</sup> यीशु जबाब देलकै, “जाय कॅ ऊ लोमड़ी सँ कही दहें, कि हम्मं आय आरु कल दुष्टात्मा निकालै के काम करते रहबै आरु बीमार लोग सिनी कॅ ठीक करते रहबै आरु परसों हम्मं आपनो लक्ष्य पूरा करबै।<sup>33</sup> लेकिन हमरा आय, कल आरु परसों आपनो रास्ता पर आगु बढ़तें जाना जरुरी छै, कैहनेकि ई संभव नै छै कि परमेश्वर केकोय भविष्यवक्ता यरुशलैम शहर के बाहर कोनो दोसरो जग्घो में मारलो जाय।”

### यरुशलेम शहर लेली यीशु के विलाप

**34** “हे यरुशलेम, हे यरुशलेम! हममें तोरा लेली केतना परवाह करै छियौ, लेकिन परमेश्वर जे भविष्यवक्ता सिनी कॅ तोरो पास भेजलकौ, तोय बारंबार ओकरो तिरष्कार करलहैं। तोय पत्थर फेकी-फेकी कॅ ओकरा सिनी कॅ मारी दैलहैं। हममें केतना दाफी चाहलियै, कि तोरो संतान कॅ वहे तरहें जमा करी लियै, जैसें मुर्गी आपनो बच्चा सिनी कॅ आपनो पंख के तरो में छिपाबै छै, लेकिन तोय ऐसनो नै चाहलहैं! <sup>35</sup> आरु देखें, ऊ समय आबी गेलै जखनी तोरो इकलौता मंदिरो ऊजड़ी जैतो। हममें तोरा कहै छियौ, कि तोय हमरा तब तलक दुबारा नै देखभैं, जखनी तलक कि ऊ समय नै अयतै, जखनी तोय ई कहभैं, कि ‘धन्य छै हुनी, जे प्रभु के नाम में आबै छै!’”

### यीशु एगो फरिसी के घर में

**14** यहूदी लोग सिनी के आराम के कोनो दिन पर यीशु फरिसी लोग सिनी के एगो सरदार के घर भोजन करै लेली गेलै। वैन्टां लोग सिनी यीशु पर नजर टिकैले छेलै। <sup>2</sup>वैन्टां यीशु के ठीक सामना में एगो आदमी छेलै, जेकरो हाथ-पैर बीमारी सँ फूली गेलो छेलै। <sup>3</sup>धर्म-गुरु सिनी आरु फरिसी सिनी सँ यीशु पुछलकै, “आराम के दिन में रोगी कॅ ठीक करना धर्म-नियम के मोताबिक उचित छै की नै?” <sup>4</sup>लेकिन वें सिनी एकरो कोय जबाब नै देलकै। तबे यीशु ऊ रोगी कॅ छुबी कॅ ओकरा ठीक करी देलकै आरु ओकरा भेजी देलकै।

**5** तबे यीशु ऊ लोग सिनी के तरफ मुड़ी कॅ कहलकै, “मानी ले कि तोरा में सँ केकरो बेटा\* या बैल आराम के दिन कुआँ में गिरी जाय, तँ आरामो के दिन होला पर की ओकरा तुरन्ते बाहर नै निकालभें?” <sup>6</sup>तबे वें सिनी कुच्छो जबाब नै दै सकलै।

---

14:5 कुछ हस्तलेख में ‘बेटा’ के जग्घो पर ‘गदहा’ लिखलो गेलो छै।

### अपना कॅ बड़का नै बूझें

7 यीशु जखनी देखलकै कि भोज में नौतलो लोग सिनी खुद लेली मुख्य-मुख्य आसन चुनी रहलो छेलै, तबे हुनी ओकरा सिनी कॅ ई सिखाबैवाला खिस्सा कहलकै, <sup>8</sup>“जखनी कोय तोरा सिनी कॅ शादी-विवाह में नौता दौ, तँ मुख्य आसन पर नै बैठें। कहीं ऐसनो नै हुवे कि तोरहौ सँ प्रतिष्ठित कोय आदमी कॅ नौता देलो गेलो हुवे। <sup>9</sup>आरु जे घरबैया तोरा दोनो कॅ नौता देलको छौ, वें आबी कॅ तोरा सँ कहौ, ‘ई जग्घो में हुनका बैठै लेली दहो।’ तबे तोय लज्जित होय जैभैं आरु तोरा सबसे नीचला जग्घो में बैठे पड़तौ। <sup>10</sup>जखनी तोरा कोय नौता दौ, तँ जाय कॅ सबसे नीचला जग्घो में बैठें। जखनी घरबैया तोरा वैन्ठां बैठलो देखतौ, तँ तोरा सँ कहतौ, ‘हो दोस्त, चल्लो आरु बढियाँ आसन पर बैठौ।’ ई तरहें बाकी मेहमान सिनी के सामना में तोरो सम्मान होतौ। <sup>11</sup>जे कोय खुद कॅ बड़ा बनाबै लेली चाहै छै, ओकरा छोटा बनैलो जैतै आरु जे कोय अपने-आप कॅ छोटा बुझै छै, ओकरा बड़ा बनैलो जैतै।”

**12** फेनू यीशु घरबैया सँ कहलकै, “जखनी लोग सिनी कॅ भोज दहें, तँ आपनो संगी-साथी, कुटुंब-परिवार आरु धनी-मानी पड़ोसिया सिनी कॅ नौता नै दहें। ओकरा सिनी कॅ नौता देभैं, तँ एकरो बहुत्ते संभावना छौ कि ऊहो सिनी तोरा फेनू कभियो नौता देतौ, आरु ई तरहें तोरा ओकरो बदला चुकाय देतौ। <sup>13</sup>जखनी तोय भोज दहें, तँ गरीब-कंगाल, लूल्हा-लंगड़ा आरु अंधा-बहिरा सिनी कॅ नौता दहें। <sup>14</sup>वें सिनी तँ तोरा फेनू नौता दै कॅ ओकरो बदला नै दै सकतौ, लेकिन तोय यहै लेली धन्य होभैं कि परमेश्वर तोरा ओकरो इनाम ऊ दिन देतौ, जखनी धर्मी लोग सिनी मृत्यु सँ जीबि उठतै।”

### बड़का भोज के खिस्सा

15 ई सुनी कॅ यीशु के साथ भोजन करै लेली बैठलो एगो आदमी कहलकै, “केतना धन्य होतै ऊ लोग, जे सिनी परमेश्वर के राज्य के भोज में शामिल होतै!”

16 यीशु जबाब में एगो खिस्सा कहलकै, “एक दाफी एगो आदमी बड़का भोज करी कॅ बहुते लोगो कॅ नौता देलकै। 17 खाना तैयार होला पर वें आपनो नौकर कॅ नौतलो लोग सिनी लिगां ई कहै लेली भेजलकै, कि भोजन करै लेली चलियै, भोज तैयार छै।”

18 “लेकिन नौतलो लोग सिनी बहाना बनाबें लागलै। एगो कहलकै, ‘हम्मं तँ अखनिये एगो खेत खरीदलो छियै आरु हमरा जरुरी छै कि हम्मं अखनी जाय कॅ ओकरा देखियै। ई लेली हम्मं नै जाय सकभौं।’ 19 दोसरो कहलकै, ‘हम्मं अखनिये पाँच जोड़ा बैल खरीदलो छियै, आरु खेत में जोती कॅ ओकरा सिनी कॅ जाँचै वास्तं हम्मं जाय रहलो छियै। ई लेली हम्मं नै जाय सकभौं, हमरा माफ करिहो।’ 20 फेनू तेसरो कहलकै, ‘हमरो नया-नयी शादी होलो छै, यहै लेली हम्मं नै आबे सकभौं।’ 21 नौकर वापस आबी कॅ सभ्भे बात आपनो मालिक सँ कहलकै। ई सुनी मालिक खूबबे गोसाय गेलै आरु कहलकै, ‘जल्दी सँ जो आरु नगर के रास्ता, चौक-चौराहा सब में जाय कॅ गरीब-कंगाल, लंगड़ा-लूल्हा आरु अंधा-बहरा सिनी कॅ बोलाय लान।’ 22 थोड़े समय के बाद नौकर आबी कॅ कहलकै, ‘मालिक, आपने जैसे करै लेली कहलियै, हम्मं वैसनें करलियै, लेकिन एकरो बादो बहुते लोगो वास्तं काफी जग्घो खालिये छै।’ 23 तबे मालिक आपनो नौकर कॅ कहलकै, ‘रास्ता पगडंडी पर बाहर के तरफ जो आरु गाँव-देहात के लोग सिनी कॅ हाथ पकड़ी कॅ बोलाय लान, ताकि हमरो घर भरी जाय। 24 हम्मं तोरा सिनी कॅ कहै छियौ, कि जेकरा सिनी कॅ हम्मं

पैहने नौता देले छेलियै, ओकरा में सँ एक्को-गो हमरो ई भोज में सँ कुच्छो चाखै नै पैते।”

### चेला बनै के कीमत

**25** आबे एगो बड़का भीड़ यीशु के साथ-साथ जाय रहलो छेलै। तबे हुनी ओकरा सिनी के तरफ घुमी कँ कहलकै, <sup>26</sup>“जे लोग हमरो पास आबै छै आरु आपनो माय-बाप, घरवाली, धिया-पुता आरु भाय-बहिन, यहाँ तलक कि आपनो प्राणो कँ अप्रिय नै बुझै छै, ऊ हमरो चेला नै बने सकतै। <sup>27</sup> तोरा सिनी कँ दुख उठाबै लेली आरु आपनो प्राणो दै लेली तैयार रहना चाहियो, नै तँ तोंय सिनी हमरो चेला नै होय सकै छै।”

**28** “मानी ले कि तोरा सिनी में कोय बड़का इमारत बनाबै लेली चाहतै, तँ की वें पैहने बैठी कँ हिसाब नै करतै कि एकरा में केतना खर्चा लागतै, एकरा पूरा करै वास्तें हमरो पास पैसा छै कि नै? <sup>29</sup> कैहनेकि जदि ऊ काम सुरु करतै आरु नींव राखला के बाद इमारत पूरा नै करे सकतै, तँ जेतना लोग देखतै, वें सिनी ई कही कँ ओकरो हँसी उड़ाबें लागतै, कि <sup>30</sup> ‘ई आदमी इमारत बनैबो सुरु तँ करलकै, लेकिन ओकरा पूरा नै करे सकलै!’”

**31** “या मानी ले कि कोनो राजा दोसरो राजा सँ युद्ध करै लेली जाय रहलो छै। तँ की वें पैहने बैठी कँ बढियाँ सँ विचार नै करी लेतै, कि जे राजा बीस हजार सैनिक ले कँ हमरा पर आक्रमण करै लेली आबी रहलो छै, ओकरो मुकाबला हम्में दस हजार सैनिक ले कँ करे सकबै या नै? <sup>32</sup> जखनी ओकरा लागतै कि मुकाबला नै करे सकबै, तँ ऊ राजा के दूरे रहतें आपनो दूत सिनी भेजी कँ मेल-मिलाप के समझौता करै लेली विनती करतै। <sup>33</sup> ई तरहें, तोरा सिनी में सँ जे कोय आपनो सभ्भे कुच्छ त्यागी नै दैतै, वें हमरो चेला नै बने सकै छै।”

### नमक के उदाहरण

**34** “नमक तँ बढ़ियाँ चीज छेकै, लेकिन जदि ओकरो स्वाद खतम होय जाय, तँ कोन चीज सँ फेनू ओकरा नूनगर बनैलो जाय सकै छै? <sup>35</sup> ऊ नै तँ माटी लेली आरु नै ही खाद लेली काम में आबे सकै छै। ओकरा लोग फेकी दै छै। जेकरा सुनै लेली कान छौ, ऊ सुनी ले।”

### पापी सिनी वास्तें परमेश्वर पिता के प्रेम

**15** यीशु के बात सुनै लेली तहसीलदारो सिनी आरु पापी लोग सिनी भी अयलो करै छेलै। <sup>2</sup> ई देखी कँ फरिसी सिनी आरु धर्म-गुरु सिनी हुनका पर दोष लगैतें हुवें कहे लागलै, “ई तँ पापी लोग सिनी सँ मिलै-जुलै छै, आरु ओकरा सिनी के संग खैतो-पीतो छै।”

**3** तबे यीशु ओकरा सिनी कँ एगो सिखाबै वाला खिस्सा कहलकै। <sup>4</sup> “मानी ले कि तोरा सिनी में सँ केकरो पास सौ गो भेड़ छै आरु ओकरा में सँ एगो हराय जाय, तँ की वें आपनो निनानवे-गो भेड़ कँ बैहियार में छोड़ी कँ हरैलो भेड़ कँ तब तलक नै खोजतै, जखनी तलक कि ऊ भेड़ मिली नै जैतै? <sup>5</sup> आरु जखनी मिली जैतै, तँ ऊ केतना खुश होय कँ भेड़ कँ आपनो कंधा पर उठाय कँ वापस ले जैतै। <sup>6</sup> तबे आपनो दोस्त आरु पड़ोसिया सिनी कँ कहतै ‘आबे हमरा संग में खुशी मनाबें, कैहनेकि हमरो हरैलो भेड़ मिली गेलै।’ <sup>7</sup> यहे तरहें मानी ले कि एगो पापी आदमी छै। जखनी ऊ पापी आपनो बुरा चाल-चलन सँ हृदय-परिवर्तन करी लै छै, तँ स्वर्ग में परमेश्वर आरु स्वर्गदूत सिनी ओकरो वास्तें खुशी मनाबै छै। दोसरो तरफ निनानवे-गो धर्मी लोग छै, जे कि हृदय-परिवर्तन करै के जरूरी नै बुझै छै। स्वर्ग में जेतना खुशी हृदय-परिवर्तन करै वाला ऊ पापी वास्तें होय छै, ओतना खुशी ऊ निनानवे-गो धर्मी वास्तें नै होय छै।

### हरैलो सिक्का के खिस्सा

8 मानी ले कि एगो औरत छेलै। ओकरो पास दस-गो चाँदी के सिक्का छेलै। ऊ दस सिक्का में सँ एगो सिक्का हराय गेलै। तँ की वें दिया जलाय कँ समुच्चे घर में झाड़ू-बोहारु करी कँ, मोन लगाय कँ तब तलक नै खोजतै जखनी तलक कि ऊ सिक्का ओकरा नै मिली जैतै? 9 आरु जखनी ऊ सिक्का ओकरा मिली जैतै, तँ वें आपनो सहेली आरु पड़ोसिया सिनी कँ बोलाय कँ कहतै, ‘आबे हमरो संग खुशी मनाबें, कैहनेकि हमरो जे सिक्का हराय गेलो छेलै, ऊ मिली गेलै।’ 10 हममें तोरा सँ सच-सच कहै छियौ, कि यहे तरहें जखनी एक्को-गो पापी आपनो हृदय-परिवर्तन करी कँ आपनो बुरा चाल-चलन छोड़ी दै छै, तँ स्वर्गदूत सिनी स्वर्ग में बहुते खुशी मनाबै छै।”



हरैलो सिक्का (15:8)

### हरैलो बेटा के खिस्सा

11 यहे बात कँ आगु समझावै लेली यीशु ओकरा सिनी कँ ई खिस्सा कहलकै, “एगो आदमी कँ दूगो बेटा छेलै। 12 छोटका बेटा आपनो बाबूजी सँ कहलकै, ‘बाबूजी, सम्पत्ति में सँ हमरो हिस्सा हमरा बाँटी दियै।’ बाबूजी राजी होय गेलै आरु आपनो सम्पत्ति के बँटवारा दोनो बेटा में करी देलकै।”

**13** “थोड़े दिन के बाद छोटका बेटा आपनो हिस्सा के धन-सम्पत्ति ले कँ परदेश चल्लो गेलै। आरु वैन्टां जाय कँ भोग-विलाश में सभ्भे सम्पत्ति उड़ाय देलकै। **14** धीरे-धीरे ओकरो सभ्भे धन-संपत्ति खत्म होय गेलै। वहे समय ऊ देश में भयंकर अकाल पड़लै, आरु वें दाना-दाना लेली मोहताज होय गेलै। **15** तबे वें वहिन्टां एगो किसान लिगां गेलै आरु कहलकै कि ओकरा कोय काम पर राखी लै। ऊ किसान ओकरा आपनो खेत में सुअर कँ खाना खीलाबै के काम पर राखी लेलकै। **16** जखनी ऊ काम करी रहलो छेलै, तँ ऊ एतना भुखाय गेलो छेलै कि ओकरा सुअरो कँ दै वाला खाना खाय के मोन करै छेलै। लेकिन कोय ओकरा खाय लेली कुच्छो नै देलकै।”

**17** “जखनी ओकरो आँख खुललै, तँ वें आपने-आप सँ कहे लागलै, ‘हमरो घर में तँ नौकरो-चाकर कँ पेट भरै सँ बेसी खाना देलो जाय छै, यैन्टां हम्मं भूख सँ मरी रहलो छियै।’ **18** आबे हम्मं आपनो बाबूजी लिगां जैबै आरु हुनका सँ कहबै, ‘बाबूजी, हम्मं तँ ऊपरवाला के नजरी में आरु तोरहौ नजरी में पाप करलो छियै।’ **19** आबे तँ हम्मं तोरो बेटा कहलाबै के लायको नै छियै। हमरा आपनो एगो नौकरे जैसं राखी लियै। **20** ई सोची कँ वें उठलै आरु बाबूजी के पास लौटे लागलै। वें अखनी दुरे में छेलै, कि ओकरो बाबूजी ओकरा अयतें देखी कँ बड़ा तरस खैलकै। वें दौड़ी कँ ओकरा गला सँ लगैलकै आरु आपनो प्रेम परगट करलकै। **21** तबे बेटा कहलकै, ‘बाबूजी, हम्मं तँ ऊपर वाला के नजरी में आरु तोरहौ नजरी में पाप करलो छियै, आबे तँ हम्मं तोरो बेटा कहलाबै के लायको नै छियै।”

**22** “लेकिन ओकरो बाबूजी नौकर सिनी सँ कहलकै, ‘जल्दी सँ बढ़ियाँ सँ बढ़ियाँ कपड़ा निकाली कँ लान आरु एकरा पिन्हा। एकरो अंगुली में अंगुठी आरु गोड़ में चप्पल पिन्हा। **23** आरु मोटा-तगड़ा पोसलका जानवर लान आरु काट, ताकि हमरा सिनी खैयै आरु खुशी मनैयै, **24** कैन्हैकि हमरो ई बेटा मरी गेलो छेलै, फेनू जीबी गेलो छै, हराय गेलो छेलै, आबे मिली गेलै।’ तबे वें सिनी खुशी मनाबें लागलै।”

25 “वहे समय में ओकरो बड़का बेटा खेत में छेलै। जखनी वें लौटी कें घर के नजदीक पहुँचलै, तें ओकरा नाच-गान के आवाज सुनाय पड़लै। 26 वें एगो नौकर कें बोलैलकै आरु पुछलकै, ‘यैन्टां की होय रहलो छै?’ 27 नौकर कहलकै, ‘आपने के छोटका भाय सही-सलामत घर लौटी अयलो छै, वहे खुशी में आपने के बाबूजी बढ़ियाँ मोटा-तगड़ा पोसलका जानवर कटबैलको छै, ताकि हमरा सिनी साथ-साथ ई बात के खुशी मनाबियै।’ 28 ई सुनी कें ऊ गोसाय गेलै आरु घर जाय वास्तें नै चाहलकै। ओकरो बाबूजी बाहर आबी कें ओकरा प्रेम सँ मनाबें लागलै। 29 एकरा पर बड़का बेटा जबाब देलकै, ‘हम्मैं एतना साल सँ तोरो सेवा-टहल करी रहलो छियौं आरु कहीयो तोरो कोनो बात नै काटलिहौं, फेनू भी तोंय आय तलक हमरा एगो बकरी के बच्चा तक नै देल्हो, कि हम्मैं आपनो दोस्त सिनी के संग खुशी मनाबियै। 30 आरु आय जखनी तोरो छोटका बेटा अयल्हों, जे तोरो सम्पत्ति कें वेश्या सिनी पर उड़ाय देल्खों, तें तोंय ओकरा लेली बढ़ियाँ मोटा-तगड़ा पोसलका जानवर काटी कें सभ्भे के संग खुशी मनाय रहलो छो।’ 31 तबे बाबूजी बड़का बेटा कें दुलार सँ समझैतें हुवें कहलकै ‘बेटा तोंय तें सभ्भे दिन हमरा संग में रहै छैं, जे कुछु भी हमरो छेकै, सभ्भे तोरे छेकौ, 32 लेकिन आय तें तोरा खुशी मनाना चाहियो, कैहनेकि तोरो भाय जे मरी गेलो छेलौ, फेनू सँ जीबी गेलो छौ आरु जे हराय गेलो छेलौ, आबे मिली गेलो छौ।”

### चतुर मुंशी

**16** फेनू यीशु आपनो चेला सिनी कें ई खिस्सा कहलकै, “एगो मातबर आदमी छेलै। ओकरो एगो मुंशी छेलै, जे ओकरो धन-दौलत के हिसाब-किताब राखै छेलै। ऊ मुंशी के बारे में ओकरा पास ई शिकायत अयलै, ‘आपने के मुंशी आपने के सम्पत्ति फालतू में उड़ाय रहलो छै।’ 2 एकरा पर वें आपनो मुंशी कें बोलैलकै आरु पुछलकै, ‘हम्मैं तोरो बारे में ई की सुनी रहलो छियौ? तोंय आपनो

काम के हिसाब-किताब सौंपी दहें, कैहनेकि आबे तोंय मुंशी रहै के लायक नै छै।”

3 “तबे मुंशी मोने-मोन सोचे लागलै की ‘आबे हमरा की करना चाहियो? कैहनेकि मालिक हमरा सँ मुंशी के काम छिनी रहलो छै। माटी काटै वास्ते हमरो देहो में ताकत नै छै, आरु भीख माँगै में हमरा लाज लागै छै। 4 हाँ, आबे समझी गेलियै कि हमरा की करना छै, ताकि नौकरी छुटलो पर लोग सिनी आपनो घर में हमरो स्वागत करतें रहतै।”

5 “ई विचार करी कॅ वें आपनो मालिक के सभ्भे कर्जदार कॅ एक-एक करी कॅ बोलैलकै। पैहला सँ पुछलकै, ‘तोरा पर हमरो मालिक के केतना कर्जा छौ?’ 6 ऊ जबाब देलकै, ‘एक सौ मन तेल।’ तबे मुंशी कहलकै, ‘ले आपनो बही-खाता, जल्दी सँ एकरा में पचास मन लिखी दहें।’ 7 तबे दोसरो कर्जदार सँ पुछलकै, ‘तोरा पर केतना कर्जा छौ?’ वें जबाब देलकै, ‘एक सौ बोरा गहुंम।’ मुंशी कहलकै, ‘ले आपनो बही-खाता, एकरा में अस्सी बोरा लिखी दहें।’ 8 मालिक ऊ मुंशी के बड़ाई करलकै, ओकरो बैमानी वास्ते नै बल्कि ओकरो होशियारी वास्ते। फेनू यीशु आगु कहलकै कि ई संसार के लोग आपनो पीढ़ी के लोग सिनी के साथ विचार-व्यवहार में परमेश्वर के रोशनी में चलै वाला लोग सिनी सँ बेसी होशियार छै।”

9 “हम्में तोरा सिनी सँ कहै छियौ, कि आपनो धन-दौलत सँ दोसरा कॅ फायदा पहुँचैलो करें आरु आपनो लेली दोस्त बनाय ले, ताकि जखनी ऊ धन-दौलत समाप्त होय जैतौ, तँ स्वर्ग में तोरो स्वागत होतौ।”

**परमेश्वर आरु धन दोनो के सेवा एक्के साथ संभव नै**

10 “जे आदमी थोड़ो चीज में सच्चा छै, ऊ बहुत्तो चीज में सच्चा छै। जे आदमी थोड़ो चीज में बेईमान छै, ऊ बहुत्तो चीज में बेईमान छै। 11 यहै लेली जखनी तोंय ई संसार के धन-दौलत में विश्वास लायक नै होलहैं, तँ सच्चा धन, जे स्वर्ग में छै, ऊ दै कॅ तोरा पर विश्वास के

करतौ? <sup>12</sup>जखनी दोसरा के धन में तोंय विश्वास लायक नै होल्हैं, तँ जे तोरो आपनो धन होतियौ, ऊ तोरा कैहने देलो जैतो?

**13** कोय नौकर दूगो मालिक के सेवा नै करे सकै छै, कैहनेकि वें एगो सँ नफरत आरु दोसरा सँ प्रेम करतै या वें एगो सँ वफादरी करतै आरु दोसरा कँ नीचा नजरी सँ देखतै। यानि कि तोरा सिनी परमेश्वर आरु धन-दौलत दोनो के सेवा नै करे सकै छैं।”

**14** ई सभ्भे बात सुनी कँ फरिसी लोग सिनी, जे धन-दौलत सँ बहुते प्रेम करै छेलै, वें सिनी यीशु के मजाक उड़ाबें लागलै। <sup>15</sup>यीशु ओकरा सिनी सँ कहलकै, “तोरा सिनी चाहै छैं कि लोग सिनी तोरा सिनी कँ धर्मी कहौ। लेकिन परमेश्वर तोरा सिनी के मोन के बात जानै छौ। लोग सिनी के नजरी में जे बात आदर के लायक छै, परमेश्वर के नजरी में ऊ बात घृणित छै।”

### धर्म-नियम आरु परमेश्वर के राज्य

**16** बहुते समय सँ विधि-विधान के शास्त्र\* तोरा सिनी कँ जीवन के रास्ता देखलाबै छेलौ। लेकिन जखनी सँ यूहन्ना बपतिस्मा दै वाला अयलो छै, तखनी सँ दोसरो प्रचार करलो जाय रहलो छै। ई प्रचार परमेश्वर के राज्य के शुभ-संदेश छेकै आरु जखनी सँ ई शुभ-संदेश सुनैलो जाय रहलो छै, तखनी सँ सभ्भे कोय पूरा श्रद्धा-भक्ति के साथ परमेश्वर के राज्य में प्रवेश करै के कोशिश करी रहलो छै। <sup>17</sup>तैय्यो पर भी आकाश आरु धरती के नाश होना आसान छै, लेकिन विधि-विधान में लिखलो एक्को अक्षर नै मिटे सकै छै।

---

**16:16** मूल लेख में “विधि-विधान आरु परमेश्वर के भविष्यवक्ता सिनी के लेख”। यहूदी लोग सिनी आपनो पवित्र-शास्त्र कँ यहै कहै छेलै। मसीही विश्वासी ओकरा “पुराना-नियम” के नाम सँ जानै छै।

**18** “उदाहरण लेली जे भी आपनो घरवाली कँ तलाक दे कँ दोसरो सँ शादी करै छै, वें व्याभिचार करै छै। आरु जे कोय तलाक देलो महिला सँ शादी करै छै, वहूँ व्याभिचार करै छै।”

### अमीर आदमी आरु गरीब लाजर

**19** “एगो मातबर आदमी छेलै, जे मलमल आरु बहुते दामी कपड़ा पहनै छेलै आरु एशो-आराम सँ रहै छेलै। <sup>20</sup> ओकरो दरवाजा पर घाव सँ भरलो लाजर नाम के एगो गरीब आदमी कँ लानी कँ छोड़ी देलो जाय छेलै। <sup>21</sup> मातबर आदमी के टेबुल पर के जूठा खाना सँ ही वें आपनो पेट भरे चाहै छेलै। कुत्तो सिनी आबी कँ ओकरो धाव चाटलो करै छेलै।”

**22** “एक दिन गरीब लाजर मरी गेलै, तँ स्वर्गदूत ओकरा स्वर्ग में अब्राहम लिगां पहुँचाय देलकै। एक दिन मातबरो आदमी मरी गेलै। ओकरा माटी में गाड़ी देलो गेलै आरु ऊ सीधा नरक में गेलै। <sup>23</sup> नरक में तड़पतें हुवें ऊ आपनो आँख ऊपर उठैलकै, तँ लाजर कँ अब्राहम लिगां देखलकै। <sup>24</sup> ऊ सोर पाड़ी कँ अब्राहम सँ विनती करी कँ कहलकै, ‘बाबा अब्राहम! नरक के आग में हम्में तड़पी रहलो छियै! हमरा पर दया करी कँ लाजर कँ हमरो पास भेजी दियै, ताकि वें आपनो अंगुली पानी में डुबाय कँ हमरो जीभ पर दे कँ ठंढा करै।”

**25** “लेकिन अब्राहम जबाब देलकै, ‘हे बेटा! याद करें कि तोंय आपनो जीवन में बढ़ियाँ-बढ़ियाँ चीज भोगी चुकलहैं, लेकिन लाजर खराबे-खराब चीज पैलकै। आबे ओकरा यैन्टां सुख-शांति मिली रहलो छै आरु तोंय यैन्टां तड़पी रहलो छैं। <sup>26</sup> एकरो अलावे दोसरो बात ई छै, कि तोरो आरु हमरो बीच में बड़का गड्ढा छै, ताकि जदि कोय यैन्टां सँ तोरो पास जाय वास्तें चाहै, तँ नै जाय सकतै आरु नै कोय ऊ पार सँ ई पार आबे सकतै।”

27 “तबे ऊ अमीर आदमी जबाब देलकै, ‘हे पिता, जदि ऐसनो छै तँ हम्मं अपने सँ विनती करै छियै, कि लाजर कँ हमरो बाबूजी के घर भेजी दियै, <sup>28</sup>कैहनेकि हमरो पाँच भाय छै। वें जाय कँ ओकरा सिनी कँ पैहन्हें सँ चेताय देतै, कहीं ऐसनो नै हुवे कि ओकरहौ सिनी कँ कष्ट के ई जगघो में आबे पड़ै।”

29 “अब्राहम ओकरा सँ कहलकै, ‘परमेश्वर ओकरा सिनी कँ विधि-विधान के शास्त्र\* चेताबै लेली हीं देलको छै। तोरो भाय सिनी ओकरा में लिखलो बात कँ पढ़े सकै छौ।”

30 “ऊ जबाब देलकै, ‘नै हो पिता अब्राहम! ओतन्हें सँ नै होतै! वें सिनी विधि-विधान के शास्त्र के बात नै मानतै, लेकिन जदि कोय मरलो आदमी जिन्दा होय कँ ओकरा सिनी लिगां जैतै, तबे वें सिनी आपनो पाप सँ हृदय-परिवर्तन करतै।”

31 “लेकिन अब्राहम कहलकै, ‘जखनी वें सिनी विधि-विधान के शास्त्र में लिखलो बात कँ नै मानलकै, तँ कोय मरलो में सँ जिन्दा होय कँ जैतै, तैय्यो वें सिनी ओकरो बात पर विश्वास नै करतै।”

### पाप आरु छमा

**17** ओकरो बाद यीशु आपनो चेला सिनी कँ कहलकै, “ई होय नै सकै छै कि पाप सँ ठोकर नै लागे, लेकिन धिक्कार छै ऊ आदमी पर, जे दोसरा वास्तें पाप करै के कारन बनै छै। <sup>2</sup>जे कोय आदमी छोटा सँ छोटा लोग कँ भी पाप में गिराबै छै, ऊ आदमी के अंजाम बहुते बुरा होतै, एतना बुरा कि ओकरा सँ बढ़िया ई होतियै, कि ओकरो गला में बड़का पत्थर

---

16:29 मूल लेख में “विधि-विधान आरु परमेश्वर के भविष्यवक्ता सिनी के लेख”। यहूदी लोग सिनी आपनो पवित्र-शास्त्र कँ यहै कहै छेलै। मसीही विश्वासी ओकरा “पुराना-नियम” के नाम सँ जानै छै।

बान्हि कॅ ओकरा समुंदर में फेकी देलो जैतियै। <sup>3</sup>यहे लेली तोय सिनी सावधान रहें।”

“जदि तोरो भाय पाप करौ, तँ ओकरा समझाबैं। जदि वें आपनो पाप वास्ते पछताबौ, तँ ओकरा छमा करी दहें। <sup>4</sup>आरु जदि वें दिन में सात दाफी तोरो विरोध में गलती करौ आरु सातो दाफी तोरा पास आबी कॅ आपनो गलती मानी कॅ माफी माँगौ, तँ ओकरा माफ करी दहें।”

### विश्वास के शक्ति

<sup>5</sup> तबे मसीह दूत सिनी यीशु सँ कहलकै, “हमरा सिनी के विश्वास कॅ बढ़ाय दियै।” <sup>6</sup>हुनी जबाब देलकै, “जदि तोरो पास राई के दाना के बराबर कनियोटा विश्वास होतियौ, तँ तोय ई तूत के गाछी सँ कहतिहैं कि, उखड़ी कॅ समुंदर में रोपाय जो, तँ ऊ तोरो कहना मानी लेतियौ।”

<sup>7</sup> “तोरा सिनी में सँ ऐसनो मालिक के छौ, जेकरो नौकर जखनी खेतो में सँ हल जोती या बहियार में सँ भेड़ चराय कॅ आबै छौ, तँ तुरंत ओकरा सँ कहै छैं, ‘हो बाबू, आबें खाना खाय वास्ते बैठें?’ <sup>8</sup>ऐसें नै कहै छैं, बल्कि ई कहै छैं, ‘हमरो खाना तैयार करें, आरु जखनी तलक हम्मं खाय-पीबी नै ले छियौ, तब तक कमर कसी कॅ हमरो सेवा करें, तेकरो बाद तहूँ खाय-पीबी लिहैं’। <sup>9</sup>जखनी नौकर मालिक के कहै अनुसार काम करै छै, तँ की मालिक ऊ नौकर कॅ एहसान मानै छै? <sup>10</sup>यहे तरहें तोरो सिनी, जखनी ऊ काम करी चुकभैं, जेकरो आदेश तोरा सिनी कॅ देलो गेलो छेलौ, तबे ई कहियैं, ‘हमरा सिनी तँ मामूली नौकर छियै, हमरा सिनी तँ खाली आपनो काम पूरा करलियै।’ ”

### दसगो कोढ़ी के रोगी

<sup>11</sup> यीशु यरुशलम जाय वक्ती सामरिया आरु गलील क्षेत्र के सीमा होय कॅ जाय रहलो छेलै। <sup>12</sup>हुनी एगो गाँव में प्रवेश करलकै। वैंटां दस

गो कोढ़ी के रोगी दूर में खड़ा छेलै। <sup>13</sup> वें सिनी दुरहै सँ जोर सँ चिल्ललैले, “हे मालिक यीशु! हमरा सिनी पर दया करियै!”

**14** यीशु ओकरा सिनी कँ देखी कँ कहलकै, “पुरोहित सिनी के यैन्टां जो आरु अपना कँ ओकरा सिनी कँ देखाय दहें!” वें सिनी जाइये रहलो छेलै, कि रास्ताहे में वें सिनी ठीक होय गेलै।

**15** तबे ओकरा सिनी में सँ एगो जखनी देखलकै कि वें ठीक होय गेलौ छै, तँ वें जोर-जोर सँ परमेश्वर के जय-जयकार करतें हुवें लौटी अयलै, <sup>16</sup> आरु यीशु के गोड़ पर गिरी कँ हुनका धन्यवाद देलकै। ऊ यहूदी जाति के नै, बल्कि सामरी जाति के छेलै।

**17** तबे यीशु कहलकै, “की दसो-गो ठीक नै होलै? आरु नौ-गो आदमी कैन्टां छै? <sup>18</sup> की ई आदमी कँ छोड़ी आरु कोय्यो ऐसनो नै छेलै, जे घूमी कँ परमेश्वर के धन्यवाद करतियै?” <sup>19</sup> तबे हुनी ओकरा कहलकै, “आबे उठी कँ जो। तोरो विश्वास तोरा ठीक करी देलकौ।”

### परमेश्वर के राज्य के आगमन

**20** एक दाफी फरिसी लोग सिनी के ई पुछला पर कि परमेश्वर के राज्य कखनी अयतै, यीशु जबाब देलकै, “परमेश्वर के राज्य ऊ तरहें नै आबे सकै छै, जे आँखी सँ देखलो जाय। <sup>21</sup> कोय्यो ऐसनो कहै वाला नै होतै कि ‘देखें, यैन्टां छै,’ या ‘वैन्टां छै,’ कहनेकि, परमेश्वर के राज्य अखनी यैन्टां तोरा सिनी के बीचो में ही छौ।”

**22** तबे हुनी आपनो चेला सिनी सँ कहलकै, “ऊ समय आबी रहलो छै, जखनी तोरा सिनी कँ हमरो\* युग के एक्को दिन देखै कँ बड़ा इच्छा होतौ, लेकिन देखै नै सकभैं। <sup>23</sup> लोग तोरा सिनी कँ कहतौ, ‘यैन्टां छै!’ या ‘वैन्टां छै!’ लेकिन नै जइहैं! ओकरा सिनी के पीछु नै दौड़िहैं! <sup>24</sup> जे तरहें बिजली चमकी कँ आकाश के एक छोर सँ दोसरो छोर तक इंजोत

---

**17:22** मूल में ‘हमरो’ के जग्घो पर लिखलो छै- “मनुष्य-पुत्र के”।

करी दै छै, वहे तरहें हम्मै\* भी परगट होबै, ऊ दिन जखनी हम्मैं लौटी कॅ अयबै।<sup>25</sup> लेकिन ओकरा सँ पैहने ई जरूरी छै कि ऊ बड्डी दुख उठाबै आरु ई पीढ़ी के लोग सिनी सँ अस्वीकार करलो जाय।”

**26** “मनुष्य-पुत्र जखनी दुबारा लौटी कॅ अयतै, तँ हालत वैसने होतै, जैसनो हालत पुरनका समय में रहैवाला धर्मी आदमी नूह के समय में छेलै।<sup>27</sup> जे दिन नूह आपनो बड़का जहाज में चढ़ी गेलै, ऊ दिन तलक बाकी लोग सिनी खाय-पीबै में आरु विवाह करै-कराबै में मस्त रहलै आरु तखनियें जल-प्रलय होलै आरु सभ्भे कोय नाश होय गेलै।”

**28** “वहे तरहें बहुत्ते साल पैहने लूत के समय में भी होलै। लोग सिनी खैतें-पीतें रहलै, चीज वस्तु बेचैतें-कीनैतें रहलै, बीया बुनतें आरु घर बनैतें रहलै।<sup>29</sup> लेकिन जे दिन लूत सदोम नगर सँ बाहर निकललै, वहे दिन आकाश सँ आग आरु गंधक के बरसा होलै आरु सभ्भे कोय नाश होय गेलै।”

**30** “जे दिन मनुष्य-पुत्र फेनू प्रकट होतै, ऊ दिन ठीक वहे तरहें होतै।<sup>31</sup> ऊ दिन जदि कोय छत पर हुवें आरु ओकरो चीज-वस्तु घरो में, तँ वें ओकरा लै वास्तें नै उतरें। वहे तरहें जे कोय खेत में हुवें, तँ ऊ घूमी कॅ नै आबें।<sup>32</sup> लूत के घरवाली कॅ याद करें।<sup>33</sup> जे कोय्यो आपनो जान बचाबै के कोशिश करतै, वें ओकरा गमैतै, आरु जे कोय आपनो जान गमैतै, वें ओकरा बचाय लेतै।<sup>34</sup> हम्मैं तोरा सिनी सँ कहै छियौ, कि वहे रात दूगो लोग, जे एकहै बिछौना पर सुतलो रहतै, ओकरा में सँ एगो ले लेलो जैतै आरु दोसरा कॅ छोड़ी देलो जैतै।<sup>35</sup> दूगो महिला एक्के साथे जाँता पीसी रहलो होतै, ओकरा में सँ एकटा ले लेलो जैतै आरु दोसरा कॅ छोड़ी देलो जैतै।<sup>36</sup> दू लोग खेत में रहतै, एगो ले लेलो जैतै आरु दोसरा कॅ छोड़ी देलो जैतै।\*”

37 चेला सिनी पुछलकै, “हे गुरु, ई कैन्टां होतै?” हुनी जबाब देलकै, “जैन्टां लहाश पड़लो रहतै, वहिन्टां गिद्ध सिनी जुटतै।”

### विधवा आरु दुष्ट न्यायधीश

**18** तबे यीशु आपनो चेला सिनी कॅ ई बुझाबै लेली कि बिना निराश होलो आरु बिना हिम्मत हारलो लगातार प्रार्थना करतें रहना चाहियो, यहे बात पर एगो सिखाबैवाला खिस्सा कहलकै, <sup>2</sup>“कोनो नगर में एगो न्यायाधीश छेलै, जे नै परमेश्वर के डर मानै छेलै आरु नै ही कोनो आदमी के परवाह करै छेलै। <sup>3</sup>वहे नगर में एगो विधवा छेलै, जे ओकरो पास आबी-आबी कॅ बारंबार कहै छेलै कि, ‘हमरो फैसला करी दिवै आरु हमरो साथ में जे अपराध करी रहलो छै, ओकरा सँ हमरा बचाबियै।’

4 कुछ दिन तलक तँ विधवा कॅ वें नै सुनलकै लेकिन अन्त में वें सोचै लागलै कि, ‘हमें तँ नै परमेश्वर सँ डरै छियै आरु नै कोनो आदमी के परवाह करै छियै। <sup>5</sup>लेकिन ई विधवा हमरा एतना तंग करी देलको छै, यहे लेली हममें एकरो फैसला जरुर करी देबै। नै तँ ई बार-बार आबी कॅ हमरो नाक में दम करी देतै!’ ”

6 तबे यीशु कहलकै, “की सुनलहैं? ऊ दुष्ट न्यायाधीश की कहलकै? <sup>7</sup>अंत में ऊ दुष्ट न्यायाधीशो ओकरा लेली सही न्याय करी देलकै। परमेश्वर के चुनलो लोग सिनी भी हुनका सँ रात-दिन विनती करतें रहै छै। तँ की परमेश्वर ओकरा सिनी के सही न्याय नै करतै? की ओकरा सिनी के न्याय करै में देरी करतै? <sup>8</sup>हमें तोरा सिनी सँ कहै छियौ कि परमेश्वर ओकरो सिनी के न्याय जल्दी करतै। लेकिन जखनी मनुष्य-पुत्र\* अयतै, तँ हुनी धरती पर ऐसनो विश्वास केकरो पास पैतै?”

18:8 बहुते दाफी प्रभु यीशु अपने-आप कॅ ‘मनुष्य-पुत्र’ कहलको छै।

### परमेश्वर के नजरी में धर्मी के छै?

9 वैन्टां कुछु ऐसनो लोग सिनी जमा होय गेलो छेलै, जेकरा सिनी कॅ आपने-आप कॅ धर्मी हुवै पर पूरा भरोसा छेलै, लेकिन वें सिनी दोसरो लोग सिनी कॅ नीचा नजर सँ देखै छेलै। यीशु ओकरा सिनी सँ एगो सिखाबै वाला खिस्सा कहलकै, <sup>10</sup>“दूगो आदमी मंदिर में प्रार्थना करै लेली गेलै। ओकरा में सँ एगो फरिसी छेलै आरु दोसरो तहसीलदार। <sup>11</sup> फरिसी खड़ा होय कॅ आपनो बारे में प्रार्थना करै लागलै, ‘हे परमेश्वर, हम्मं आपने कॅ धन्यवाद दै छियै, जे हम्मं दोसरो लोगो के जैसनो ठकैवाला, गलत काम करैवाला, या कि व्याभिचार करैवाला नै छियै, आरु नै ही ई तहसीलदार के जैसनो छियै। <sup>12</sup> हम्मं सप्ताह में दू दिन उपवास करै छियै, आरु जे कुछु हमरा कमाई सँ मिलै छै, ओकरा में सँ दसमा भाग\* आपने कॅ दै छियै।”

13 “लेकिन तहसीलदार दूरहै सँ खड़ा होय कॅ स्वर्ग के तरफ आपनो आँख उठाबै के साहसो नै करे सकलै, लेकिन छाती पीटी-पीटी कॅ कहे लागलै, ‘हे परमेश्वर, हम्मं पापी छियै, हमरा पर दया करियै।”

14 “हम्मं तोरा सिनी कॅ कहै छियौ, कि यहै चुंगी वसूलैवाला तहसीलदार परमेश्वर के नजरी में धर्मी ठहरी कॅ आपनो घर गेलै, लेकिन ऊ फरिसी नै। जे कोय्यो आपने-आप कॅ बड़ो बुझै छै, ओकरा छोटो करलो जैतै, आरु जे कोय्यो आपने-आप कॅ छोटो बुझै छै, ओकरा बड़ो करलो जैतै।”

### बाल-बच्चा पर यीशु के आशीर्वाद

15 लोग सिनी आपनो बालो-बच्चा कॅ यीशु लिगां लानै छेलै, ताकि हुनी ओकरा सिनी पर हाथ राखी कॅ आशीर्वाद दै। चेला सिनी ई देखी

---

18:12 परमेश्वर के नियम के अनुसार हरेक विश्वासी कॅ आपनो कमाई के दसमा भाग परमेश्वर के भवन में लाना जरुरी छै।

कॅ लोग सिनी कॅ डाँटि लागलै। <sup>16</sup> लेकिन यीशु बाल-बच्चा सिनी कॅ आपनो पास बोलैलकै, आरु चेला सिनी कॅ कहलकै, “बाल-बच्चा सिनी कॅ हमरो पास आबै लऽ दहें, ओकरा सिनी कॅ मना नै करहैं, कैहनेकि परमेश्वर के राज्य वैसनं सिनी लेली छेकै, जे बच्चा सिनी के जैसे सच्चा हृदय सँ विश्वास करै छै।

**17** हममें तोरा सिनी सँ सच कहै छियौ, कि जे कोय्यो परमेश्वर के राज्य कॅ एगो बच्चा जैसनो स्वीकार नै करतै, वें ओकरा में कैहियौ प्रवेश नै करे सकतै।”

### मातबर आदमी आरु अनंत जीवन

**18** फेनू एगो बड़का हाकिम यीशु सँ पुछलकै, “हे उत्तम गुरु! अनन्त जीवन पाबै वास्तें हममें की करियै?”

**19** यीशु ओकरा सँ कहलकै, “तोंय हमरा उत्तम कैहने कहै छैं? परमेश्वर के छोड़ी कॅ कोय्यो उत्तम नै छै। <sup>20</sup> धर्म-नियम में देलो गेलो आदेश कॅ तँ तोंय जानै छैं: ‘व्याभिचार नै करें, हत्या नै करें, चोरी नै करें, झूठी गवाही नै दहें, आपनो माय-बाप के आदर करें।’”

**21** वें जबाब देलकै, “ई सभ्भे आदेश के पालन तँ हममें बचपनहैं सँ करै छियै।”

**22** ई सुनी कॅ यीशु ओकरा कहलकै, “एगो बातो के कमी तोरा में अखनियों छौ। तोंय आपनो सभ्भे कुछु बेची कॅ गरीब सिनी में बाँटी दहें, तँ तोरा स्वर्ग में धन मिलतौ। आरु आबी कॅ हमरो पीछु होय जो।”

**23** ई बात सुनी कॅ ऊ आदमी बड़्डी उदास होलै, कैहनेकि वें बड़्डी मातबर छेलै। <sup>24</sup> यीशु ओकरा तरफ देखी कॅ कहलकै, “मातबर सिनी के लेली परमेश्वर के राज्य में प्रवेश करना केतना कठिन छै! <sup>25</sup> कोनो मातबर आदमी वास्तें परमेश्वर के राज्य में प्रवेश करै के तुलना में ऊँट वास्तें सुईया के छेद सँ निकली जाना आसान छै।”

26 एकरा पर सुनै वाला लोग सिनी पुछलकै, “तबे मुक्ति केकरा मिलै सकै छै?”

27 यीशु जबाब देलकै, “जे बात मनुष्य लेली असंभव छै, ऊ परमेश्वर लेली संभव छै।”

28 एकरा पर पतरस हुनका सँ कहलकै, “देखियै गुरुजी, हम्मैं सिनी तँ सभ्भे कुछु छोड़ी कँ आपने के पीछु अयलो छियै।”

29 यीशु ओकरा सिनी कँ कहलकै, “हम्मैं तोरा सिनी कँ सच्चे कहै छियौ कि, जे कोय्यो परमेश्वर के राज्य वास्तें आपनो घर, घरवाली, भाय, माय-बाप आरु बाल-बच्चा कँ छोड़ी दै छै, <sup>30</sup> ओकरा यहै जीवन में कई गुणा बेसी वापस मिलै छै, आरु आबै वाला समय में अनन्त जीवन सेहो।”

### यीशु द्वारा फेनू आपनो मौत के भविष्यवाणी

31 फेनू यीशु बारहो चेला कँ एक बगल में ले जाय कँ कहलकै, “सुनें, हमरा सिनी यरुशलेम जाय रहलो छियै। आरु परमेश्वर के भविष्यवक्ता के द्वारा मनुष्य-पुत्र के बारे में जे कुछु लिखलो गेलो छै, ऊ सभ्भे पूरा होतै। <sup>32</sup> कहनेकि ऊ गैर-यहूदी जाति के लोग सिनी के हाथो में सौंपलो जैतै, लोग सिनी ओकरो हँसी उड़ैतै, अपमान करतै, ओकरा पर थुकतै, <sup>33</sup> आरु कोड़ा सँ मारै के बाद ओकरा जान सँ मारी देलो जैतै, लेकिन तेसरो दिन ऊ फेनू सँ जीबी उठतै।”

34 लेकिन ओकरो चेला सिनी ई सभ्भे बात में सँ कोनो बात नै समझे सकलै। यहै लेली हुनको कहलो सभ्भे बात ओकरा सिनी वास्तें एक रहस्य बनलो रहलै आरु समझै में नै अयलै कि हुनको कहै के माने की छेलै।

### अंधा भिखारी कँ आँख के दान

35 ऐसनो होलै कि जखनी यीशु यरीहो नगर लिंगां पहुँचलै, तँ एगो अंधा आदमी रास्ता के किनारा में बैठी कँ भीख माँगै छेलै। <sup>36</sup> जखनी

ऊ लोग सिनी के भीड़ के चलै के आवाज सुनलकै, तँ पुछे लागलै कि ई सब की होय रहलो छै। 37 वें सिनी ओकरा कहलकै, “नासरत नगर के रहै वाला यीशु यहै होय कँ जाय रहलो छै।”

38 तबे ऊ सोर पाड़ी कँ कहै लागलै, “हे यीशु, दाऊद के संतान, हमरा पर दया करियै!”

39 रास्ता में आगु-आगु जाय रहलो लोग सिनी ओकरा डाँटी कँ चुप रहै वास्तें कही रहलो छेलै, लेकिन ऊ आरु जोर-जोर सँ हल्ला करी कँ कहै लागलै, “हे दाऊद के संतान, हमरा पर दया करियै!” 40 यीशु वैन्टां ठहरी गेलै आरु ओकरा आपनो पास में लानै लेली कहलकै। जखनी ऊ अंधा आदमी हुनको पास अयलै, तँ हुनी पुछलकै, 41 “तोंय की चाहै छै, हम्मं तोरा लेली की करियौ?”

वें जबाब देलकै, “हे स्वामी, हम्मं देखै लेली चाहै छियै।”

42 तबे यीशु ओकरा कहलकै, “तोंय आबे देखे सकै छै! जो तोरो विश्वास तोरा ठीक करी देलकौ।” 43 आरु तखनिये ऊ देखे लागलै आरु परमेश्वर के जय-जयकार करते हुवें यीशु के पीछु जाय लागलै। जखनी लोग सिनी ई देखलकै, तँ ऊहो सिनी परमेश्वर के गुणगाण करे लागलै।

### जकई नाम के आदमी लेली लबका जीवन

**19** यीशु यरीहो नाम के एगो नगर में प्रवेश करी कँ जाय रहलो छेलै। 2 वैन्टां एगो आदमी छेलै, जेकरो नाम जक्कई छेलै। वें चुंगी वसूलै वाला सिनी के हाकिम छेलै, आरु बहुते मातबर छेलै। 3 वें यीशु कँ देखै के जतन करी रहलो छेलै, लेकिन भीड़ के कारने वें देखे नै सकलै, कैहनेकि वें छोटा कद के आदमी छेलै। 4 यहै वास्ते जखनी वें ई जानलकै, कि यीशु यहै होय कँ जाय वाला छै, तँ वें दौड़ी कँ आगु गेलै आरु एगो गुल्लर के गाछी पर चढ़ी गेलै।

5 जखनी यीशु ऊ जग्घो पर पहुँची गेलै, तबे ऊपर देखी कँ हुनी ओकरा सँ कहलकै, “हे जक्कई, जल्दी सँ नीचा उतरी जो, कैहनेकि आय हमरा

तोरे यैन्टां रहना छै।”<sup>6</sup> तबे जकई जल्दी सँ नीचा उतरी गेलै आरु यीशु कॅ बहुत्ते खुशी-खुशी आपनो यैन्टां ले जाय कॅ स्वागत करलकै।

7 ई देखी कॅ सभ्भे कुड़कुड़ाय कॅ कहे लागलै, “हुनी ऐसनो पापी यैन्टां मेहमान बनीं कॅ कैसँ गेलै!”

8 लेकिन जकई खड़ा होय कॅ यीशु कॅ कहलकै, “हे स्वामी, हम्मँ आपनो आधो संपत्ति गरीब सिनी कॅ दे देबै, आरु जदि हम्मँ केकरो सँ बैमानी करी कॅ कुछु लेलो होबै, तँ हम्मँ ओकरा चार गुणा वापस करी देबै।”

9 यीशु कहलकै, “आय ई घर में उद्धार अयलो छै, कैहनेकि यहो आदमी ई साबित करी देलकै कि वें अब्राहम के संतान छेकै।<sup>10</sup> मनुष्य-पुत्र\* तँ हरैलो सिनी कॅ खोजै लेली आरु ओकरा सिनी कॅ उद्धार करै लेली अयलो छै।”

### धन-संपत्ति के जबाबदेही वाला उदाहरण

11 लोग सिनी यीशु के कहलो बात सुनी रहलो छेलै। यीशु यरुशलेम के नजदीक पहुँची गेलो छेलै आरु लोग सब ई बुझी रहलो छेलै, कि परमेश्वर के राज्य तुरंते परगट होय वाला छै। यहे लेली यीशु ओकरा सिनी कॅ ई सिखाबैवाला खिस्सा कहलकै,<sup>12</sup> “एगो राज-घराना के आदमी दूर परदेश गेलै, जैन्टां सँ ऊ राज-अधिकार पाबी कॅ लौटी आबै।<sup>13</sup> जाय सँ पैहने वें आपनो नोकर सिनी में सँ दस-गो नौकर कॅ बोलाय कॅ ओकरा सिनी कॅ दस-गो सोना के सिक्का देलकै आरु कहलकै, ‘जखनी तलक हम्मँ लौटी कॅ नै आबै छियौ, तखनी तलक एकरा सँ लेन-देन करिहैं।’”

14 “लेकिन ऊ देश के लोग सिनी ओकरा सँ घृणा करै छेलै, आरु ओकरो पीछु आपनो बीच्चो में सँ एगो संवदिया द्वारा ई समाद भेजलकै, कि ‘हमरा सिनी नै चाहै छियै, कि ई आदमी हमरा सिनी पर राज करै।’”

---

19:10 प्रभु यीशु बहुत्ते दाफी अपने-आप कॅ ‘मनुष्य-पुत्र’ कहलको छै।

15 “ऐसनो होलै कि कुछ समय बाद वें राजा बनी कॅ लौटलै। तबे वें ओकरा सिनी कॅ आपनो पास बोलैलकै, जेकरा सिनी कॅ वें सोना के सिक्का दै कॅ गेलो छेलै। वें जानै लेली चाहलकै कि ओकरा सँ वें सिनी केतना कमैलकै-धमैलकै।”

16 “पैहलो नौकर आबी कॅ कहलकै, ‘मालिक आपने के देलो रुपया सँ हम्मं दस गुणा कमैलियै।’”

17 “मालिक जबाब देलकै, ‘चाबस! तोंय बहुत्ते बढिया नौकर छैं! कैहनेकि तोंय छोटो बातो में विश्वासयोग्य रहलैं, यहे लेली तोरा दस गो नगरो पर अधिकार देलो जाय छौ।’”

18 “तबे दोसरो नौकर आबी कॅ कहलकै, ‘मालिक आपने के देलो रुपया सँ हम्मं पाँच गुणा कमैलियै।’”

19 “तबे मालिक ओकरा जबाब देलकै, ‘जो, तोरहौ पाँच नगरो पर अधिकार देलो जाय छौ।’”

20 “तबे एगो आरु नौकर आबी कॅ कहलकै, ‘मालिक, ई आपनो रुपया लियै। हम्मं एकरा कपड़ा में बान्हि कॅ राखलो छेलियै।<sup>21</sup> कैहनेकि हम्मं आपने सँ डरै छेलियै, जानै छेलियै कि आपने कठोर आदमी छिकै। जैन्टां नै लगैलो छियै, ओकरो सँ निकाली लै छियै आरु जैन्टां अपने नै बुनलो छियै, वैन्टां सँ काटी लै छियै।’”

22 “मालिक ओकरा जबाब देलकै, ‘रे दुष्ट नौकर! हम्मं तोरे कहलो बातो के अनुसार तोरा दोषी ठहरैबौ! जखनी कि तोंय जानै छेलैं कि हम्मं कठोर आदमी छियै, जैन्टां लगैलो नै छियै, वैन्टां सँ वसूलै छियै, आरु जैन्टां बुनलो नै छियै, वैन्टां सँ काटै छियै,<sup>23</sup> तँ तोंय हमरो रुपया कॅ सूदी पर कैहने नै लगाय देलहैं, ताकि हम्मं आबी कॅ ओकरा सूद सहित वसूली लेतियै?’”

24 “तबे मालिक आपनो पास में खड़ा लोग सिनी सँ कहलकै, ‘एकरा सँ ऊ सोना के सिक्का वापस ले, आरु ओकरा दै दहें, जेकरा दस-गो छै।’”

25 “वें सिनी कहलकै, ‘मालिक, ओकरो पास में तँ पैहने सँ दस-गो छै!’”

26 “हम्मं तोरा सिनी सँ कहै छियौ, कि जेकरा पास छै, ओकरा आरु ज्यादा देलो जैतै, लेकिन जेकरा पास में कुच्छु नै छै, ओकरा सँ ऊहो ले लेलो जैतै, जे ओकरो पास में छै।<sup>27</sup> यहे लेली हमरो ऊ दुश्मन सिनी कँ, जे सिनी नै चाहै छेलै कि हम्मं ओकरा सिनी पर राज करियै, ओकरा सिनी कँ लानी कँ हमरो सामना में मारी दहें।”

### यरुशलेम में यीशु के विजय प्रवेश

28 ई सभ्भे बात कहै के बाद यीशु यरुशलेम के तरफ आगु बढ़तें गेलै।<sup>29</sup> बढ़तें-बढ़तें यीशु जैतून नाम के पहाड़ पर बेतफगे आरु बेतनिया गाँव लिगां पहुँचलै। वैन्टां सँ हुनी दूगो चेला कँ ई कही आगु भेजलकै,<sup>30</sup> “सामने वाला ऊ गाँव में जो आरु जखनिये ऊ गाँव में घुसभैं, सुरुवे में एगो गदही के बच्चा बान्हलो मिलतौ, जेकरा पर कहियो कोय सवारी नै करलको छै। ओकरा खोली कँ ले आन।<sup>31</sup> जदि कोय्यो तोरा पुछौ, कि ‘एकरा कैहने खोली रहलो छै?’ तँ ओकरा कहियै, कि ‘प्रभु कँ एकरो जरुरी छै।”

32 ऊ चेला सिनी, जेकरा भेजलो गेलो छेलै, जैसनो यीशु कहलको छेलै, वैन्टां ठीक वैसनं पैलकै।<sup>33</sup> जैसं ही ऊ दोनो चेला गदही के बच्चा कँ खोली रहलो छेलै, तँ ओकरो मालिक पुछै लागलै, “तोरा सिनी ई गदही के बच्चा कैहने खोली रहलो छै?”

34 ऊ दोनो जबाब देलकै, “प्रभु कँ एकरो जरुरी छै।”

35 तबे वें सिनी गदही के बच्चा कँ यीशु लिगां लानलकै, आरु ओकरो पीठ पर आपनो कपड़ा राखी कँ हुनका बैठाय देलकै।<sup>36</sup> हुनी जैसं-जैसं आगु बढ़तें जाय छेलै, तैसं-तैसं लोग सिनी हुनको स्वागत में सड़क पर आपनो कपड़ा बिछैले जाय छेलै।

37 जखनी हुनी ऊ जग्घो पर पहुँचलै, जैन्टां सँ जैतून पहाड़ी के ढलान नीचा के तरफ सुरु होय छेलै, तँ चेला सिनी के भीड़ बहुत्ते आनंद के

साथ ऊ सभ्भे चमत्कार लेली, जे वें सिनी देखलको छेलै, ओकरा लेली उच्चो अवाज सँ परमेश्वर के जय-जयकार करे लागलै,

**38** “धन्य छै ऊ राजा, जे प्रभु के नाम सँ आबै छै!

स्वर्ग में शान्ति, आरु आकाश में प्रभु के महिमा हुवे!”

**39** तबे भीड़ में जमा कुछु फरिसी लोग सिनी यीशु सँ कहे लागलै, “हे गुरु, आपनो चेला सिनी कँ चुप रहै लेली कहियौ!”

**40** यीशु जबाब देलकै, “हम्में तोरा सिनी सँ कहै छियौ, कि जदि ई सिनी चुप होय जैतै आरु परमेश्वर के जय-जयकार नै करतै, तँ पत्थरो चिल्लाय उठतै।”

**41** जखनी यीशु यरुशलेम नगर के नजदीक पहुँचलै, तँ हुनी ऊ सभ्भे लोग सिनी कँ याद करलकै, जे सिनी हुनका तिरष्कार करी देलको छेलै, आरु ऊ नगर कँ देखी कँ हुनको आँखी सँ लोर गिरे गेलै। **42** हुनी कहलकै, “हम्में चाहै छेलियै कि तोय जानतिहैं कि कैसें तोरा शान्ति मिलतियौ, लेकिन नै जानलहैं! लेकिन आबे बहुते देरी होय चुकलौ आरु ई सभ्भे बात तोरो आँखी सँ छुपी गेलौ। **43** कैहनेकि तोरा सिनी पर ऐसनो दिन अयतौ, जखनी तोरो दुश्मन चारो तरफ सँ मोर्चा बान्हि कँ तोरा सिनी कँ घेरी लेतौ आरु दबैतौ। **44** वें सिनी तोरा आरु तोरो बाल-बच्चा सिनी कँ माटी में मिलाय देतौ, आरु पत्थर पर पत्थर टिकलो नै रहतै, कैहनेकि परमेश्वर जखनी तोरा सिनी पर कृपा दृष्टि करलकौ, ऊ समय कँ तोय सिनी नै पहचाने सकलहैं।”

### यीशु यरुशलेम के मंदिर में

**45** तबे यीशु मंदिर में गेलै आरु ई देखलकै कि कुछ लोग सिनी मंदिर के हाता में बलि करै वास्तें जानवर सब बेची रहलो छेलै। ई देखी कँ हुनी गुस्सा सँ भरी गेलै आरु ओकरा सिनी कँ ई कही कँ वैनटां सँ निकाले लागलै, **46** “धर्म-शास्त्र में लिखलो छै, ‘हमरो घर प्रार्थना के घर होतै,’ लेकिन तोय सिनी ओकरा ‘चोर आरु लुटेरा सिनी के अड्डा’ बनाय देलहैं।”

47 मंदिर में यीशु नित्तम दिन उपदेश दै छेलै। वैन्ठां महा-पुरोहित आरु धर्म-गुरु सिनी, आरु यहूदी लोग सिनी के नेता सिनी हुनका जान सँ मारी दै के मौका खोजी रहलो छेलै। 48 लेकिन वें सिनी कुच्छु नै करे सकलै, कैहनेकि लोग सिनी हुनको बातो कँ बड्डी ध्यान सँ सुनै छेलै।

### यीशु के अधिकार पर सवाल

**20** एक दिन ऐसनो होलै कि जखनी मंदिर में यीशु लोग सिनी कँ प्रवचन दे रहलो छेलै आरु सभ्भे कँ शुभ-संदेश सुनाय रहलो छेलै, तबे महा-पुरोहित आरु धर्म-गुरु सिनी आरु बुजुर्ग-अगुवा लोग सिनी हुनको पास आबी कँ कहलकै, <sup>2</sup>“हमरा सिनी कँ बतैयै कि आपने ई सभ्भे काम कोन अधिकार सँ करै छियै? आरु ई अधिकार आपने कँ के देलकै?” <sup>3</sup>हुनी जबाब देलकै, “हम्हूँ तोरा सिनी सँ एगो बात पुछै छियौ। <sup>4</sup>बपतिस्मा दै वाला यूहन्ना के बारे में तोरा सिनी तँ जानै छौ, कि वें परमेश्वर के एगो भविष्यवक्ता छेलै। तोंय सिनी हमरा ई बताबो कि बपतिस्मा दै के अधिकार यूहन्ना कँ परमेश्वर सँ मिललो छेलै या कि आदमी के तरफ सँ?” <sup>5</sup>ई बात सुनी कँ वें सिनी आपना में सोच-विचार करे लागलै, कि जदि हमरा सिनी कहबै जे स्वर्ग सँ, तँ हुनी कहतै कि तबे तोरा सिनी ओकरो बातो पर कैहने नै विश्वास करलहैं? <sup>6</sup>आरु जदि ई कहबै कि आदमी सँ, तँ लोग सिनी हमरा सिनी पर पत्थरबाजी करे लागतै, कैहनेकि ओकरा सिनी कँ पूरा विश्वास छै, जे यूहन्ना परमेश्वर के एगो भविष्यवक्ता छेलै। <sup>7</sup>यहे लेली वें सिनी जबाब देलकै, “हमरा सिनी नै जानै छियै कि केकरो तरफ सँ मिललो छेलै।” <sup>8</sup>तबे यीशु कहलकै, “तँ हम्हूँ तोरा सिनी कँ नै बतैबौ, कि हम्मं कोन अधिकार सँ ई काम करै छियै।”

### मालिक आरु बटेदार सिनी के उदाहरण

9 तबे हुनी लोग सिनी कँ एगो सिखाबैवाला खिस्सा कहलकै, “एक आदमी अंगूर के खेत लगलकै। आरु ऊ खेत किसान सिनी कँ बटैया

पर दे कँ कुछ साल लेली परदेश चल्लो गेलै। <sup>10</sup> जखनी फसल के समय अयलै, तँ मालिक आपनो हिस्सा लानै वास्ते बटेदार सिनी लिगां एगो नौकर कँ भेजलकै। वें सिनी ओकरा मारी-पीटी कँ खाली हाथ वापस भेजी देलकै। <sup>11</sup> मालिक ने फेनू दोसरो नौकर कँ भेजलकै, लेकिन ओकरो वें सिनी मारी-पीटी कँ आरु बेज्जती करी कँ खाली हाथ भेजी देलकै। <sup>12</sup> फेनू मालिक ने तेसरो नौकर कँ भेजलकै, लेकिन ओकरो वें सिनी घायल करी कँ भगाय देलकै। <sup>13</sup> तबे मालिक कहलकै, ‘हम्मं की करियै? आबे हम्मं आपनो प्यारा बेटा के ओकरा सिनी लिगां भेजबै, शायद एकरा देखी कँ वें सिनी एकरो आदर करै।’ <sup>14</sup> लेकिन बटेदार सिनी हुनको बेटा कँ अयतें देखी कँ आपना में विचार करे लागलै, कि ई तँ आपनो बाप के वारिस छेकै। एकरा मारी दै छियै, ताकि ई संपत्ति हमरा सिनी के होय जाय! <sup>15</sup> आरु वें सिनी ओकरा बगान सँ बाहर ले जाय कँ जान सँ मारी देलकै।”

“यहे लेली मालिक ओकरा सिनी के साथ आबे की करतै? <sup>16</sup> हम्मं तोरा सिनी सँ कहै छियौ, कि मालिक अयतै आरु ओकरा सिनी कँ मारी देतै, आरु बगान दोसरो किसान सिनी कँ दे देतै।” जखनी यीशु ई खिस्सा कही चुकलै, तँ सुनैवाला लोग सिनी कहलकै, “ऊपरवाला करे कि ऐसनो बात कहियो नै हुवे!” <sup>17</sup> यीशु ओकरा सिनी के तरफ देखी कँ कहलकै, “तबे धर्म-शास्त्र में लिखलो ई सभ्भे बात के माने की छेकै,

‘जे पत्थर कँ राजमिस्त्री सिनी बेकार ठहरैलकै,

वहे पत्थर मकान के मुख्य कोना के पत्थर होय गेलै।’

**18** जे कोय ऊ पत्थर सँ टकरैतै, ऊ चकनाचूर होय जैतै, आरु जेकरा पर ऊ पत्थर गिरतै, ओकरा पिसी देतै।”

**19** वहे समय में धर्म-गुरु सिनी आरु महा-पुरोहित सिनी समझी गेलो छेलै, कि हुनी ओकरे सिनी के बारे में ई खिस्सा कही रहलो छेलै, कि वहे सिनी ऊ दुष्ट बटेदार सिनी के जैसनो छेलै। यहे लेली वें सिनी यीशु कँ तुरंत पकड़ै वास्ते चाहै छेलै, लेकिन वें सिनी वहाँकरो लोग सिनी सँ डरै छेलै।

### यीशु के फंसाबै वास्तें यहूदी सिनी के चाल

**20** धर्म-गुरु सिनी आरु महा-पुरोहित सिनी मौका के तलाश में लागलो छेलै। वें सिनी हुनका पास ऐसनो भेदिया सिनी कॅ भेजलकै, जे सिनी अपने-आप कॅ ईमानदार हुवै के ढोंग करै छेलै। ताकि यीशुवे के कहलो कोनो बातो में हुनका फँसैलो जाय, आरु पकड़ी कॅ हुनका रोमी राज्यपाल के हाथो में सौंपलो जाय।<sup>21</sup> तबे भेदिया सिनी हुनका सँ पुछलकै, “गुरु, हमरा सिनी जानै छियै कि आपने ठीक बोलै छियै आरु ठीक सिखैतो छियै, आरु केकरो मुँह देखलो बात नै करै छियै, बल्कि परमेश्वर के रास्ता के सच्चाई बताबै छियै।<sup>22</sup> अच्छा तँ हमरा सिनी कॅ ई कहियै, कि धर्म-नियम के मोताबिक हमरा सिनी लेली रोमी सम्राट कैसर कॅ चुंगी देना उचित छै की नै?”

**23** लेकिन यीशु ओकरा सिनी के चालाकी जानी कॅ कहलकै,<sup>24</sup> “हमरा एगो सिक्का देखाबें आरु बताबें कि एकरा पर केकरो फोटो छै आरु केकरो नाम लिखलो छै?”<sup>25</sup> वें सिनी कहलकै, “सम्राट कैसर के।” तबे यीशु ओकरा सिनी कॅ कहलकै, “तँ जे कुछ कैसर के छेकै, ऊ कैसर कॅ दहें आरु जे कुछ परमेश्वर के छेकै, ऊ परमेश्वर कॅ दहें।”

**26** वें सिनी बाकी लोग सिनी के सामना में हुनका कोनो बातो में नै पकड़े सकलै। बल्कि हुनको जबाब सुनी कॅ वें सिनी चकित होय कॅ चूप होय गेलै।

### जीबि उठै के सवाल

**27** तबे सद्दूकी पंथ कॅ मानै वाला कुछ लोग सिनी यीशु लिंगां अयलै। सद्दूकी पंथ वाला लोग सिनी ई नै मानै छेलै, कि मरै के बाद लोग फेनू सँ जिलैलो जैतै। वें सिनी आबी कॅ यीशु सँ पुछलकै,<sup>28</sup> “गुरु, बहुत्ते साल पैहने परमेश्वर के भविष्यवक्ता मूसा हमरा सिनी के पवित्र-शास्त्र में लिखलकै, कि जदि केकरो भाय पत्नी के रहतें हुवें बिना बाल-बच्चा

के मरी जाय, तँ ओकरो भाय ऊ औरत सँ शादी करी कँ अपनो भाय वास्तें बाल-बच्चा पैदा करे। <sup>29</sup> ऐसनो होलै कि सात भाय छेलै। जेकरा में बड़का भाय शादी करलकै आरु बिना बाल-बच्चा के मरी गेलै। <sup>30</sup> तबे दोसरो भाय वहे महिला सँ शादी करलकै आरु वहूँ बिना बाल-बच्चा के मरी गेलै। <sup>31</sup> फेनू तेसरो भाय के वैसनं होलै, यहे तरहें सातो भाय बिना बाल-बच्चा के मरी गेलै। <sup>32</sup> अन्त में ऊ औरतो मरी गेलै। <sup>33</sup> आबे अपने बताबियै कि ऊ समय में जखनी मरलो सिनी कँ जियैलो जैतै, तँ ई औरत केकरो पत्नी होतै? कैहनेकि ओकरा सँ तँ सातो शादी करलको छेलै।”

**34** यीशु जबाब देलकै, “शादी-विवाह तँ ईहे जुग के लोग सिनी वास्तें छै। <sup>35-36</sup> लेकिन एक नया जुग आबै वाला छै। ई जुग के कुछ लोग सिनी कँ आपनो मौत के बाद नया जीवन में उठैलो जैतै आरु वहे सिनी नया जुग में प्रवेश करतै। परमेश्वरे के शक्ति सँ ओकरा सिनी कँ दुबारा जीलैलो जैतै, यहे लेली वें सिनी परमेश्वर के संतान होतै। ऊ जुग में लोग सिनी के जीवन स्वर्गदूत सिनी के जीवन के जैसनो होतै। कैहनेकि वें सिनी शादी-विवाह नै करतै आरु नै केकरो मौत होतै। <sup>37</sup> तोरा सिनी कहै छैं, कि मरलो सिनी कँ नै जिलैलो जैतै, लेकिन परमेश्वर के भविष्यवक्ता मूसा आरु जलते हुवे झाड़ी वाला घटना याद करें, जे पवित्र-शास्त्र में देलो गेलो छै। ऊ कहानी ई बात कँ साबित करै छै, कि एक दिन मरलो सिनी कँ जीलैलो जैतै। कैहनेकि ऊ कहानी में मूसा नें परमेश्वर कँ ‘अब्राहम के परमेश्वर, ईसहाक के परमेश्वर आरु याकूब के परमेश्वर’ कहलको छै। <sup>38</sup> मरलो सिनी के तँ कोनो परमेश्वर नै होय छै, हुनी तँ जिन्दे सिनी के परमेश्वर छेकै। कैहनेकि परमेश्वर के नजरी में वें सिनी जिन्दे छै।”

**39** तबे धर्म-गुरु सिनी में सँ कोय-कोय कहलकै, “हे गुरु आपने बहुते बढ़ियाँ कहलियै।” <sup>40</sup> ऐकरो बाद केकरहौ हुनका सँ आरु कोनो बात पुछै के साहस नै होलै।

### विरोधी सिनी लेली यीशु के सवाल

41 तबे यीशु कहलकै, “तोरा सिनी जानै छैं कि यहूदी लोग सिनी मुक्तिदाता मसीहा के आबै के बाट जोही रहलो छै। वें सिनी मसीहा कें ‘दाऊद के संतान’ कहै छै। 42 जबे कि दाऊद नें भजन-संग्रह के किताबो में खुद्दे लिखलको छै:

‘परमेश्वर नें हमरो स्वामी सँ कहलकै,  
हमरो दाहिना बगल में बैठियै,

43 जखनी तलक कि हम्में आपने के दुश्मन सिनी कें अपने के अधीन नै करी दियै।’

44 जखनी दाऊद हुनका खुद्दे ‘स्वामी’ कहै छै, तें फेनू हुनी दाऊद के संतान कैसें होलै?”

45 जखनी लोग सिनी हुनको बात सुनी रहलो छेलै, तबे हुनी आपनो चेला सिनी कें कहलकै, 46 “धर्म-गुरु सिनी सँ सचेत रहें, जेकरा सिनी कें लंबा-लंबा कपड़ा पैहनी कें घुमना-फिरना, हाट-बाजार में लोग सिनी के आदर पाना, धर्म सभा-भवन में ऊँच्यो आसन पर बैठना आरु भोज-भात में मुख्य आसन पाना अच्छा लागै छै। 47 वें सिनी विधवा सिनी के घर-द्वार हड़पी लै छै, आरु लोग सिनी कें दिखाबै वास्तें लंबा-लंबा प्रार्थना करै छै। एसनो लोग सिनी कें बहुत्ते दंड मिलतै।”

### गरीब विधवा के दान

**21** फेनू यीशु नजर उठाय कें देखलकै कि मातबर लोग सिनी मंदिर के दान-पेटी में आपनो-आपनो दान दे रहलो छेलै। 2 हुनी एगो गरीब विधवो कें ताँबा के दूगो सिक्का दान-पेटी में देतें हुवें देखलकै। 3 ई देखी कें हुनी कहलकै, “हम्में तोरा सिनी कें सच कहै छियौ, कि ई गरीब विधवा ऊ सभ्भे सँ बढ़ी कें दान देलकै। 4 कैहनेकि वें सिनी तें आपनो बढ़ती धन में सँ दान देलकै, लेकिन ई

आपनो गरीबी में सँ आपनो पूरा जीविका के जे कुच्छु छेलै, सभ्भे दे देलकै।”

### अन्त समय के भविष्यवाणी

5 एक दाफी जखनी कुछ लोग सिनी चर्चा करी रहलो छेलै, कि मंदिर केतना सुंदर-सुंदर पत्थर सँ बनैलो गेलो छै आरु ओकरो दीवाल परमेश्वर के दान करलो चीज सब सँ केतना खुबसूरती सँ सजैलो गेलो छै, तबे एकरा पर यीशु कहलकै, 6 “ई सभ्भे चीज जे यैन्टां देखै छैं, ऐसनो समय अयतै कि यैन्टां एक्को पत्थर पर पत्थर टिकलो नै रहतै, जेकरा ढाहलो नै जैतै।” 7 वें सिनी हुनका सँ पुछलकै, “गुरु ई सभ्भे बात कहिया हौतै? आरु ऊ समय के कोन चिह्न होतै, जेकरा सँ बूझें सकियै कि ई बात सब हुवे वाला छै?”

8 हुनी जबाब देलकै, “होशियार रहें, ताकि भरमैलो नै जो। कहनेकि बहुते लोग सिनी हमरो नाम ले कँ अयतो आरु खूद के बारे में कहतौ, ‘हम्मं मसीहा छियै’ आरु यहो कहतौ कि ‘समय नजदीक आबी गेलो छै।’ तोंय ओकरा सिनी के पीछु नै चल्लो जिहैं! 9 जखनी बड़्डी लड़ाई आरु आंदोलन सब के खबर सुनभैं, तँ नै डरिहैं। ई सब तँ पैहने होना जरुरी छै, लेकिन ऊ समय के अंत तुरंते नै होतै।”

10 हुनी आगु कहलकै, “एक जाति दोसरो जाति सँ लड़ाई करतै, आरु एक राज्य दोसरो राज्य पर चढ़ाई करतै। 11 भयंकर भूकंप होतै, जगह-जगह अकाल आरु बहुते जग्घो में महामारी होतै। आकाश में भयंकर घटना सब होतै आरु बड़ो-बड़ो चिह्न सब दिखाई पड़तै।”

12 “लेकिन ई सब बात हुवै सँ पैहने तोरा सिनी वास्तें बहुते सताव के समय होतौ। हमरा मानै के कारनें तोरा सिनी कँ दोसरो लोग सिनी पकड़तौ आरु तोरा सिनी कँ सतैतौ। फैसला करै लेली तोरा सिनी कँ घसीटी कँ सभा-भवन में ले जैतो, जेल में बंद करी देतौ, राजा आरु हाकिम सिनी के सामना में ले जैतो। 13 लेकिन तोरा सिनी वास्तें ई

गवाही दै के मौका होतौ। <sup>14</sup>यहे लेली आपनो मोन में पैहनहैं सँ ई बातो के चिन्ता नै करिहैं कि आपनो बचाव में की कहभैं। <sup>15</sup>कैहनेकि तोरा सिनी कँ हम्मं ऐसनो शब्द आरु ऐसनो बुद्धि देबौ, कि कोय विरोधी तोरो सामना नै करे सकतौ आरु नै ही तोरो कहलो कोनो बातो कँ काटे सकतौ। <sup>16</sup>माय-बाप, भाय, कुटुंब-परिवार आरु संगी-साथी तोरा सिनी कँ धोखा सँ पकड़बाय देतौ, आरु तोरा सिनी में सँ केतना कँ मरबाय्यो देतौ। <sup>17</sup>हमरो नाम के कारनं लोग सिनी तोरा सँ घृणा करतौ, <sup>18</sup>लेकिन तोरा सिनी के माथा के एगो बालो बाँका नै होतौ! <sup>19</sup>विश्वास के साथ धीरज धरै के कारनं तोरा सिनी जीवन पैभें।”

**20** “आरु जखनी यरुशलेम कँ सेना सँ घेरैलो देखभैं, तँ ई जानी लिहैं कि ओकरो नाश होना नजदीक आबी गेलै। <sup>21</sup>ऊ समय में जे कोय यहूदिया क्षेत्र में हुवे, वें सिनी पहाड़ पर भागी जाय। आरु जे सिनी यरुशलेम शहर के भीतर हुवे, वें सिनी बाहर निकली जाय, आरु जे सिनी गाँव-देहात में हुवे, वें सिनी शहर के भीतर नै जाय। <sup>22</sup>कैहनेकि ई बदला लै के दिन होतै, जखनी परमेश्वर के पवित्र-शास्त्र में लिखलो सभ्भे बात पूरा होतै। <sup>23</sup>वहे समय में ऊ देश पर भयंकर संकट पड़तै आरु वैन्टां रहैवाला यहूदी लोग सिनी पर परमेश्वर के प्रकोप पड़तै। जे महिला गर्भवती होतै आरु जे दुध पिलैतें होतै, ओकरा सिनी लेली केतना दर्दनाक समय होतै! <sup>24</sup>वें सिनी तलवार सँ मारलो जैतै, आरु बंदी बनाय कँ सभ्भे देश में भेजलो जैतै। आरु जखनी तलक कि गैर यहूदी लोग सिनी के देलो गेलो समय पूरा नै होतै, तबे तलक गैर-यहूदी लोग सिनी सँ यरुशलेम नगर के लतमर्दन होतें रहतै।”

### मनुष्य-पुत्र फेनू अयतै

**25** “सूरज, चाँद आरु तारा सिनी में अद्भुत चिन्ह सब दिखाई देतै। धरती पर सभ्भे जाति के लोग सिनी समुद्र के लहर देखी आरु ओकरो गर्जन सुनी कँ धबराय जैतै। <sup>26</sup>धरती पर जे सब बात घटै

वाला छै, ओकरो डर-भय सँ लोग सिनी बेहोश होय जैतै, कहनेकि आकाश के शक्ति सब कँ हिलैलो जैतै।<sup>27</sup> ओकरो बाद लोग सिनी मनुष्य-पुत्र\* कँ सामञ्ज्य आरु अपार महिमा के साथ बादलो पर अयतें देखतै।<sup>28</sup> ई सभ्भे बात जखनी हुवे लागतौ, तँ सीधा खड़ा होय कँ आपनो सिर कँ ऊपर उठाबिहैं, कहनेकि तोरा सब के छुटकारा नजदीक होतौ।”

**29** तबे हुनी ओकरा सिनी कँ एगो सिखाबैवाला खिस्सा कहलकै, “अंजीर के गाछी या दोसरो कोनो गाछी के देखें।<sup>30</sup> जखनी ओकरा में लबका पत्ता आबे लागै छै, तँ ई देखी कँ तोंय सिनी खुदबखुद जानी जाय छैं कि गर्मी के मौसम निकट आबी गेलो छै।<sup>31</sup> वहे तरहें जखनी तोंय सिनी ऊ सभ्भे घटना जेकरो बारे में हम्में तोरा सिनी कँ बतैलियौ, जखनी ऊ सभ्भे घटना कँ होतें हुवें देखभैं, तँ बुझी जैईहैं कि परमेश्वर के राज्य नजदीक छै।”

**32** “हम्में तोरा सिनी कँ सच कहै छियौ कि जखनी तलक ई सब नै होय जैतौ, तखनी तलक ई पीढ़ी के अन्त नै होतौ।<sup>33</sup> आकाश आरु धरती टली जैतै, लेकिन हमरो कहलो वचन अटल रहतै।”

### सचेत रहें

**34** “यहे लेली सचेत रहें! कहीं तोरा सिनी के मोन नशा में मातलो आरु जीवन के चिन्ता-फिकिर में ओझरैलो नै रहौ, आरु ऊ दिन जखनी परमेश्वर के न्याय परगट होतै, ऊ दिन तोरा सिनी पर अनचोके आबी कँ फंदा के समान पकड़ी नै लौ।<sup>35</sup> कहनेकि धरती पर रहै वाला सभ्भे लोग ऊ दिन कँ अनुभव करतै।<sup>36</sup> यहे लेली सचेत होय कँ प्रार्थना करतें रहें, ताकि जे घटना सब हुवे वाला छै, ओकरा सँ बचे सकें आरु मनुष्य-पुत्र के सामने खड़ा हुवे लायक बने सकें।”

37 यीशु दिन में तँ मंदिर में प्रवचन दै छेलै, लेकिन हुनी रात जैतून पहाड़ पर जाय कँ बीताबै छेलै। 38 लोग सिनी हुनको उपदेश सुनै वास्तें नित्तम दिन भोरे-भोर मंदिर में आबी जाय छेलै।

### यहूदा के विश्वासघाती योजना

**22** “बिना फुलैलो पतला रोटी खाय वाला परब” जेकरा फसह के परब\* कहलो जाय छेलै, ऊ नजदीक आबी गेलो छेलै। 2 महा-पुरोहित आरु धर्म-गुरु सिनी ई बातो के ताक में छेलै, कि कैसें यीशु कँ फंसाय कँ मारी देलो जाय, लेकिन वें सिनी वहाँकरो लोगो सिनी सँ डरै छेलै। 3 तबे यहूदा इस्करियोती, जे यीशु के बारह चेला सिनी में सँ एगो चेला छेलै, ओकरो मोन में शैतान समाय गेलै। 4 तबे वें जाय कँ महा-पुरोहित सिनी आरु मंदिर के सिपाही सिनी के सरदार के साथ बात करलकै, कि वें यीशु कँ कैसें ओकरा सिनी के हाथो में पकड़बाय देतै। 5 ई सुनी कँ वें सिनी बहुत्ते खुश होलै आरु ई काम करै वास्तें ओकरा रुपया दै के वादा करलकै। 6 यहूदो ई बातो पर राजी होय गेलै, आरु मौका खोजे लागलै, ताकि जे समय लोग सिनी के भीड़ नै होतै, तखनी वें यीशु कँ ओकरा सिनी के हाथो में पकड़बाय देतियै।

### चेला सिनी के संग यीशु के अंतिम भोज

7 जखनी अखमीरी रोटी के परब आबी गेलै, जे परब में यहूदी लोग सिनी कँ मेमना के बलिदान चढ़ाना जरुरी छेलै। 8 तबे यीशु पतरस आरु यूहन्ना कँ ई कही कँ आगु भेजलकै, “जो अपना सिनी लेली फसह परब वाला भोज के तैयारी करें।” 9 वें सिनी हुनका सँ पुछलकै,

---

22:1 फसह के परब में एक भोज मनैलो जाय छेलै, जेकरा में यहूदी लोग सिनी परमेश्वर कँ यहै लेली धन्यवाद दै छेलै, कि गुलामी में रहै के दिनों में परमेश्वर ओकरा सब के पहलौठा बेटा सिनी के जान बचैलको छेलै।

“आपने कैन्टां चाहै छियै कि हमरा सिनी आपने लेली भोज के तैयारी करियै?” <sup>10</sup>यीशु कहलकै, “नगर में घुसतहैं तोरा सिनी कॅ एगो आदमी घैला में पानी ले कॅ जैतें हुवें मिलतौ आरु वें जे घरों में घुसतौ, तहूँ सिनी ओकरो पीछु-पीछु चल्लो जईहैं।” <sup>11</sup>आरु ऊ घरों के मालिको सँ कहिहैं ‘गुरुजी अपने सँ ई पुछै वास्ते भेजलको छै, कि ऊ मेहमान वाला कमरा कैन्टां छै, जैन्टां हुनी आपनो चेला सिनी के संग फसह परब के भोज खैते?’ <sup>12</sup>तबे वें तोरा सिनी कॅ ऊपरका तल्ला पर सजलो-सजैलो एगो बड़का कमरा देखाय देतौ, जेकरा में सभ्भे कुछ तैयार रहतौ। वहिन्टां तोंय सिनी अपना सिनी लेली फसह परब वाला भोज तैयार करिहैं।” <sup>13</sup>आरु वें सिनी जखनी वैन्टां गेलै, तँ जैसनो यीशु ओकरा सिनी कॅ कहलको छेलै, ठीक वैसनें मिललै। तबे वें सिनी वहिन्टियें फसह परब वाला भोज के तैयारी करलकै।

**14** जखनी भोज के समय होलै, तँ यीशु आपनो बारहो दूत के संग भोजन करै लेली बैठी गेलै। <sup>15</sup>हुनी ओकरा सिनी कॅ कहलकै, “हमरा बहुते ईच्छा छेलै, कि दुख उठाबै सँ पैहनें हम्में तोरा सिनी के संग ई फसह परब वाला भोज खैयै।” <sup>16</sup>कहनेकि हम्में तोरा सिनी सँ कहै छियौ, कि जखनी तलक ई भोज के मकसद परमेश्वर के राज्य में पूरा नै होतै, तब तलक हम्में एकरा दुबारा नै खैबै।”



अंतिम भोज (22:13)

17 फेनू यीशु अंगूर के रस सँ भरलो कटोरा लेलकै आरु धन्यवाद करै के बाद चेला सिनी सँ कहलकै, “ई कटोरा ले कँ अपना में बाँटी ले।<sup>18</sup> हममें तोरा सिनी कँ कहै छियौ, कि जखनी तलक परमेश्वर के राज्य आबी नै जाय छै, अखनी के बाद हममें अंगूर के रस दुबारा नै पीबै।”

19 ओकरो बाद हुनी रोटी लेलकै आरु परमेश्वर कँ धन्यवाद देलकै आरु रोटी तोड़ी कँ चेला सिनी कँ देलकै आरु कहलकै, “ई हमरो देह छेकै, जे तोरा सिनी लेली देलो जाय रहलो छौ। हमरो याद में ऐसनें करलो करिहैं।”

20 यहे तरहें हुनी भोजन के बाद कटोरा लेलकै आरु कहलकै, “ई कटोरा हमरो लहू छेकै, जे तोरा सिनी लेली बहैलो जाय छौ, जे कि परमेश्वर आरु मनुष्य के बीच में नया संबंध बनाबै के करार छेकै।<sup>21</sup> लेकिन देखें, हमरा धोखा सँ पकड़ाबौ वाला यहिन्टां हमरो संग भोजन करै लेली बैठलो छै!<sup>22</sup> मनुष्य-पुत्र, जे हममें छियै, ओकरा लेली तँ परमेश्वर के योजना मोताबिक जाना निश्चित छै, लेकिन हाय छै ऊ आदमी पर जेकरा द्वारा ऊ पकड़ैलौ जैतै।”<sup>23</sup> ई सुनी कँ चेला सिनी आपस में पुछे लागलै कि ऊ के होय सकै छै, जे ऐसनो काम करतै?

### चेला सिनी में विवाद

24 ओकरो बाद चेला सिनी के बीच में ई बातो पर विवाद उठी गेलै, कि हमरा सिनी में सबसे बड़ा केकरा मानलो जाय।<sup>25</sup> तबे यीशु कहलकै, “ई दुनियाँ में संसारिक राज्य सब के राजा सिनी परजा सिनी पर आपनो हुकुमत चलाबै छै आरु परजा पर हुकुम चलाबैवाला सिनी खुद कँ लोग सिनी के ‘उपकारी’ भी कहलाबै छै।<sup>26</sup> लेकिन तोरा सिनी के बीच में ई तरहें नै होना चाहियो। बल्कि, जे तोरा सिनी में सबसे बड़ा छै, ऊ सबसे छोटा आरु सबसे नम्र बनें, आरु जे प्रधान छै, ऊ दास के जैसनो बनें।<sup>27</sup> बड़ा के छेकै? ऊ जे भोजन करै वास्तें बैठलो छै, या ऊ जे सेवा करी रहलो छै? ओकरा सिनी में भोजन करै लेली जे बैठलो

छै, वहे बड़ा छै। लेकिन येन्टां वैसनो बात नै छै, कैहनेकि हम्मं तोरा सिनी के बीच में सेवके के रूप में छियौ।”

**28** “तोरा सिनी ऊ छैं, जे हमरो परीक्षा में लगातार हमरो संग रहलहैं। **29** आरु जे तरहें हमरो पिता हमरा राज्य देलको छै, वहे तरहें हम्मूँ तोरा सिनी कॅ राज्य दै छियौ, **30** तोंय सिनी हमरो राज्य में हमरो संग में खैभैं-पीभैं, आरु सिंहासन पर बैठी कॅ इसराएल के बारहो वंश के न्याय करभैं।”

### सिमोन पतरस के बारे में यीशु के भविष्यवाणी

**31** तबे यीशु सिमोन पतरस सँ कहलकै, “सिमोन, हे सिमोन! शैतान तोरा सिनी कॅ गेहुँ के जैसनो फटकी कॅ अलग करै लेली आज़ा माँगी लेलको छै। **32** लेकिन हम्मं पिता परमेश्वर सँ तोरा लेली प्रार्थना करले छियौ, कि तोरो विश्वास खतम नै हुवौ। जखनी तोंय हमरो तरफ दुबारा लौटी कॅ अयभैं, तँ आपनो भाईयो सिनी कॅ विश्वास में मजबूत रहै में मदद करिहैं।”

**33** लेकिन पतरस जबाब देलकै, “हे गुरु! हम्मं आपने के साथ जेल जाय लेली आरु मरैयो लेली तैयार छियै!”

**34** यीशु कहलकै, “हे पतरस, हम्मं तोरा सँ कहै छियौ, कि आय मुर्गा के बाँग दै सँ पैहने तीन दाफी तोंय ई कही कॅ हमरो इनकार करभैं कि तोंय हमरा जानबो नै करै छैं।”

**35** तबे हुनी ओकरा सिनी कॅ कहलकै, “हम्मं जखनी तोरा सिनी कॅ बटुआ, झोला आरु जुत्ता के बिना भेजलो रहियौ, तँ की ऊ वक्ती कोनो चीजो के कमी होलो रहौ?”

वें सिनी जबाब देलकै, “नै, कोनो चीजो के नै।”

**36** तबे यीशु कहलकै, “लेकिन आबे जदि तोरो बटुआ या झोला छै, तँ ओकरा आपनो संग में लै ले। आरु जेकरा पास में तलवार नै छै, ऊ आपनो कपड़ा बेची कॅ एगो खरीदी ले। **37** कैहनेकि हमरा बारे में परमेश्वर के पवित्र-शास्त्र में ई बात लिखलो छै, ‘ऊ अपराधी सिनी में

गिनलो गेलै।’ परमेश्वर के भविष्यवक्ता सिनी हमरा बारे में जे कुच्छु लिखलको छै, ओकरो पूरा होना निश्चित छै। हाँ, हमरा बारे में लिखलो गेलो बात पूरा हुवे पर छै।”

**38** चेला सिनी हुनका कहलकै, “हे गुरु, देखियै, यैन्टां दूगो तलवार छै।” हुनी जबाब देलकै, “बस, बहुत्ते छै।”

### जैतून पहाड़ पर यीशु के प्रार्थना

**39** तबे यीशु ऊ नगर सँ बाहर निकली कँ जैतून नाम के पहाड़ पर गेलै, जैन्टां हुनी बराबर गेलो करै छेलै। चेलो सिनी हुनको संग में छेलै। **40** जखनी हुनी वैनटां पहुँचलै, तबे हुनी चेला सिनी कँ कहलकै, “प्रार्थना करतें रहें, ताकि तोंय सिनी परीक्षा में नै पड़ें।” **41** तबे हुनी चेला सिनी सँ कुछ दूर हटी कँ घुटना टेकी कँ ई तरहें प्रार्थना करे लागलै, **42** “हे पिता, जदि आपने चाहै छियै तँ ई दुख के कटोरा हमरो पास सँ हटाय दियै। तैय्यो हमरो नै बल्कि आपने के ईच्छा पूरा हुवे।” **43** ई दुख के घड़ी में हुनका साहस दै लेली तखनियें एगो स्वर्गदूत परगट होलै। **44** हुनी बड़्डी व्याकुल होय कँ प्रार्थना करे लागलै आरु प्रार्थना में एतना लीन होय गेलै कि हुनको शरीर सँ खून के जैसनो पसीना बूंद-बूंद होय कँ जमीन पर गिरे लागलै।\*

**45** जखनी हुनी प्रार्थना सँ उठी कँ चेला सिनी लिगां अयलै, तँ चेला सिनी कँ उदासी कँ चलतें सुतलो पैलकै। **46** यीशु ओकरा सिनी सँ पुछलकै, “तोंय सिनी कैहने सुतलो छैं? उठें आरु प्रार्थना करें, ताकि तोंय सिनी परीक्षा में नै पड़ें।”

### यीशु बंदी बनैलो गेलै

**47** यीशु ई सभ्भे बात बोलिये रहलो छेलै, कि लोग सिनी के बड़का भीड़ वैनटां पहुँची गेलै। हुनको बारह चेला में सँ एगो चेला जेकरो नाम

यहूदा छेलै, ऊ भीड़ के आगु-आगु चल्लो आबै छेलै। आरु यहूदा यीशु कॅ चुम्मा लै वास्तें हुनको पास अयलै, <sup>48</sup> लेकिन यीशु ओकरा कहलकै, “हे यहूदा, की तोंय मनुष्य-पुत्र कॅ चुम्मा ले कॅ धोखा सँ पकड़ाय रहलो छै?”

**49** ई जानी कॅ कि वैनंठां की होय वाला छै, चेला सिनी यीशु सँ पुछलकै, “हे गुरु, की हमरा सिनी तलवार चलाबियै?” <sup>50</sup> वहे चेला सिनी में सँ एगो नें महा-पुरोहित के एगो नौकर पर तलवार चलाय कॅ ओकरो दाहिना कान काटी देलकै।

**51** लेकिन यीशु कहलकै, “बस! बहुत होय गेलै, रुकी जो।” आरु हुनी ऊ आदमी के कान छुबी कॅ ठीक करी देलकै।

**52** तबे जे महा-पुरोहित आरु मंदिर के सिपाही सिनी के सरदार आरु बूढ़-पुरान लोग, जे सिनी यीशु कॅ पकड़ै वास्तें अयलो छेलै, ओकरा सिनी कॅ यीशु कहलकै, “की तोरा सिनी हमरा डाकू समझी कॅ लाठी आरु तलवार ले कॅ पकड़ै लेली अयलो छै? <sup>53</sup> जखनी हममें तोरा सिनी के साथ नित्तम दिना मंदिर में छेलियौ, तखनी तँ तोंय सिनी हमरा नै पकड़लहैं। लेकिन ई समय तोरा सिनी के छेकौ, कैहनेकि अखनी अंधकार के बोलबाला छै।”

### पतरस द्वारा यीशु के इंकार

**54** तबे वें सिनी यीशु कॅ बंदी बनाय कॅ वैनंठां सँ महा-पुरोहित के घर पर गेलै। आरु पतरसो थोड़ो दूरी बनाय कॅ ओकरा सिनी के पीछाँ करते हुवें वैनंठां अयलै। <sup>55</sup> जखनी कुछ लोग सिनी अंगना के बीच में घूरा लगाय कॅ आग तापै लेली बैठलो छेलै, तँ पतरसो वैनंठां आबी कॅ बैठी गेलै। <sup>56</sup> तबे बड्डी ध्यान सँ वहाँकरो एगो नौकरानी घूरा के रोशनी में पतरस के देखलकै आरु ओकरा तरफ देखतें हुवें कहलकै, “ई आदमीयों तँ यीशु के साथे छेलै।”

**57** लेकिन पतरस इंकार करते हुवें कहलकै, “हे-हे बहीन, हममें तँ यीशु कॅ पहचानबो नै करै छियै।”

58 थोड़ा समय के बाद फेनू एगो दोसरो आदमी पतरस क देखी क कहलकै, “तहूँ तँ ओकरे सिनी में सँ एक छै।”

पतरस जबाब देलकै, “नै हो भाय, हममें नै छेकियै।”

59 करीब एक घंटा के बाद फेनू एगो आदमी ओकरा देखी क जोर दे क कहे लागलै, “ईहो आदमी निश्चिते यीशु के संग में छेलै, कैहनेकि ईहो तँ गलीले क्षेत्र के रहैवाला छेकै।”

60 लेकिन पतरस जबाब देलकै, “हो भाय, हमरा कुच्छो समझ में नै आबी रहलो छै कि तोंय की कही रहलो छो।” पतरस ई कहियै रहलो छेलै कि वहे वक्ती मुर्गा बांग देलकै। 61 तबे यीशु पतरस के तरफ घुमी क देखलकै। तखनिये पतरस क हुनको कहलो बात याद पड़ी गेलै, जे कि हुनी ओकरा सँ कहलको छेलै, “आय मुर्गा के बाँग दै सँ पैहने तोंय तीन दाफी हमरो इंकार करभै।” 62 तबे पतरस वहे जगघो सँ बाहर निकली क कल्पी-कल्पी क कानै लागलै।

### यीशु के अपमान

63 ऊ सिपाही सिनी जे यीशु क पकड़ी क राखलको छेलै, वें सिनी हुनको मजाक उड़ैतें हुवें मारे-पीटे लागलै। 64 हुनको आँखी पर पट्टी बाँधी क आरु मुँह पर थप्पड़ मारी क पुछलकै, “भविष्यवाणी करी क ई कहें कि तोरा के मारलकौ?” 65 एकरो अलावे आरु बहुते बात सब कही क हुनको अपमान करलकै।

### धर्म-महासभा के सामने यीशु

66 आरु बिहान होला पर बूढ़-पुरान लोग सिनी, महा-पुरोहित सिनी आरु धर्म-गुरु सिनी महासभा में जमा होलै, आरु यीशु क ओकरा सिनी के सामना में लानलो गेलै। 67 वें सिनी पुछे लागलै, “जदि आपने मुक्तिदाता-मसीह छियै, तँ हमरा सिनी क खुल्लम-खुल्ला कही दियै।”

तबे यीशु जबाब देलकै, “जदि हम्मं तोरा सिनी कॅ कहबौ, तैय्यो तोय सिनी विश्वास नै करभैं।<sup>68</sup> आरु जदि तोरा सिनी सँ कुच्छो पुछबौ, तँ तोय सिनी जबाबो नै देभैं।<sup>69</sup> लेकिन ई घटना के बाद सँ मनुष्य-पुत्र\* सर्वशक्तिमान परमेश्वर के दाहिना बगल में बैठलो रहतै।”

70 एकरा पर सभ्भे कोय एक्के साथे कहलकै, “तँ की आपनें परमेश्वर के पुत्र छेकियै?” हुनी जबाब देलकै, “तोरा सिनी खुद्दे कही रहलो छैं, कि हम्मं वहे छियै। हाँ, तोय सिनी ठीक कहलहैं।”

71 ई सुनी कॅ वें सिनी गोसाय कॅ कहलकै, “ओकरो मुँह के बोलिये साबित करी रहलो छै कि वें दोषी छै, आबे हमरा सिनी कॅ आरु गवाही के कोय जरुरत नै छै।”

राज्यपाल पिलातुस आरु राजा हेरोदेस द्वारा पूछ-ताछ

**23** तबे पूरा महा-सभा उठलै आरु यीशु कॅ रोमी राज्यपाल पिलातुस लिगां ले गेलै।<sup>2</sup> वें सिनी यीशु पर ई दोष लगलकै, “ई आदमी हमरो लोग सिनी कॅ बहकाबै छै, कि रोमी सरकार कॅ चुंगी नै दहें। एकरो अलावे ई अपने-आप कॅ मसीहा यानि राजा हुवैयो के दावा करै छै।”

3 पिलातुस ई बात पर यीशु सँ पुछलकै, “की आपने हीं यहूदी लोग सिनी के राजा छियै?”

हुनी जबाब देलकै, “आपनें खुद्दे ई बात कही रहलो छियै।”

4 तबे पिलातुस, महा-पुरोहित सिनी आरु लोगो सिनी के भीड़ तरफ मुड़ी कॅ कहलकै, “हम्मं एकरा में कोनो गलती नै पाबै छियै।”

5 लेकिन वें सिनी आरु जोर दे कॅ कहलकै, “ई आदमी पूरा यहूदिया में, गलील क्षेत्र सँ ले करी कॅ यरुशलेम तक जैन्ठों जाय छै, आपनो शिक्षा सँ लोग सिनी कॅ उकसाबै छै।”

22:69 बहुते दाफी प्रभु यीशु अपने-आप कॅ ‘मनुष्य-पुत्र’ कहलको छै।

6 ई सुनी कॅ पिलातुस पुछलकै, “की ई आदमी गलील क्षेत्र के रहै वाला छेकै?” 7 लोग सिनी पिलातुस कॅ बतैलकै कि यीशु गलील क्षेत्र के रहैवाला छियै। गलील क्षेत्र राजा हेरोदेस के शासन के भीतर आबै छेलै, यहै लेली पिलातुस नें यीशु कॅ हेरोदेस लिगां भेजी देलकै। फसह के परब हुवे के कारनं राजा हेरोदेसो ऊ समय यरुशलमेमें में छेलै।

8 हेरोदेस यीशु कॅ देखी कॅ बहुते खुश होलै, कैहनेकि वें बहुते दिन सँ हुनका देखै वास्तें चाहै छेलै आरु हुनका बारे में बहुते कुछ सुनलको छेलै। वें यीशु कॅ कोनो चमत्कार करतें हुवें देखै लऽ चाहै छेलै। 9 वें यीशु सँ बहुते देर तलक सवाल पुछतें रहलै, तय्यो यीशु ओकरा कोनो जबाब नै देलकै। 10 तबे महा-पुरोहित आरु धर्म-गुरु सिनी वैन्ठां खड़ा होय कॅ जोर-जोर सँ चिल्लैतें हुवें यीशु पर तरह-तरह के दोष लगाबें लागलै। 11 तबे हेरोदेस आरु ओकरो सैनिक सिनी यीशु के अपमान करलकै आरु हुनको मजाक उड़ाबें लागलै। आरु अंत में हुनका राजसी पोशाक पिन्हाय कॅ पिलातुस लिगां वापस भेजी देलकै। 12 पैहनेयें सँ हेरोदेस आरु पिलातुस एक-दोसरा के दुश्मन छेलै, लेकिन वहै दिन सँ वें दोनो एक-दोसरा के दोस्त बनी गेलै।

### यीशु कॅ मौत के सजा

13 तबे पिलातुस ने महा-पुरोहित सिनी, अधिकारी सिनी आरु लोग सिनी कॅ बोलाय कॅ कहलकै, 14 “तोंय सिनी ई आदमी के ऊपर ई दोष लगाय कॅ हमरो पास लानलहैं कि वें जनता कॅ उकसाय रहलो छै। हम्में तोरा सिनी के सामना में एकरा जाँच करलियै, आरु जे बात के दोष तोंय सिनी एकरा पर लगैलहैं, ऊ बात में हम्में एकरा दोषी नै पैलियै। 15 आरु हेरोदेसो एकरा दोषी नै पैलकै, तँ एकरा हमरो पास वापस भेजी देलकै। ई बात साफ छै, कि ई कोनो वैसनो काम नै करलको छै, जे कि एकरा मौत के सजा देलो जाय। 16 यहै लेली

हम्में एकरा पिटवाय कॅ छोड़ी दै छियै।” 17 वहाँकरो प्रथा के अनुसार फसह परब के मौका पर कोनो एगो कैदी कॅ छोड़ना जरूरी छेलै।\*


18 लेकिन वें सिनी एक साथ मिली कॅ जोर-जोर सँ चिल्लाय कॅ कहलकै, “एकरा मारी देलो जाय! आरु हमरा सिनी लेली बरब्बा कॅ छोड़ी देलो जाय!” 19 बरब्बा वहाँकरो एगो कैदी छेलै, जेकरा नगर में विद्रोह कॅ बढ़ावा दै के कारनें आरु हत्या के जुर्म में जेल में डाली देलो गेलो छेलै।

20 पिलातुस के इच्छा छेलै, कि यीशु कॅ छोड़ी देलो जाय। यह लेली वें लोग सिनी कॅ फेनू सँ समझाबै के कोशिश करलकै। 21 लेकिन वें सिनी मिली कॅ नारा लगाबें लागलै, “ओकरा क्रूस पर चढ़ाबें, ओकरा क्रूस पर चढ़ाबें!”

22 फेनू तेसरो दाफी पिलातुस ओकरा सिनी कॅ कहलकै, “कैहने? ई आदमी की जुर्म करलको छै? हम्में तँ एकरा में कोनो तरह के दोष नै पैलियै, जेकरा कारनें एकरा मौत के सजा देलो जाय। यह वास्तें हम्में एकरा पिटवाय कॅ छोड़ी देबै।”

23 लेकिन वें सिनी चिल्लाय-चिल्लाय कॅ पिलातुस सँ माँग करलकै, “यीशु कॅ क्रूस पर चढ़ैलो जाय।”

एक्के साथ चिल्लाबे के कारनें वें सिनी कामयाब होय गेलै। 24 तबे पिलातुस ओकरा सिनी के माँग पूरा करै लेली फैसला सुनैलकै। 25 आरु लोग सिनी के माँग के अनुसार बरब्बा कॅ छोड़ी देलकै, जे विद्रोह आरु हत्या के जुर्म में जेल में बन्द छेलै, आरु यीशु कॅ



क्रूस (23:21)

ओकरा सिनी के इच्छा पर छोड़ी देलकै, कि वें सिनी जे चाहे हुनका संग करे।

### क्रूस

26 वें सिनी जखनी यीशु कें ले जाय रहलो छेलै, तँ कुरेन नगर के रहैवाला सिमोन नाम के एगो आदमी, जे गाँव सँ शहर के तरफ आबी रहलो छेलै, ओकरा पकड़ी कें ओकरो ऊपर यीशु के क्रूस लादी देलकै, ताकि वें क्रूस ले कें यीशु के पीछु-पीछु चलै।<sup>27</sup> यीशु के पीछु बड़का भीड़ जाय रहलो छेलै। ऊ भीड़ में बहुते महिलो सिनी छेलै, जे सिनी हुनका लेली छाती पिटी-पिटी कें शोक-विलाप करी रहलो छेलै।<sup>28</sup> यीशु घुमी कें ओकरा सिनी कें कहलकै, “हे यरुशलेम के बेटी सिनी! हमरा लेली नै कानें, बल्कि अपना लेली आरु आपनो बाल-बच्चा सिनी लेली कानें।<sup>29</sup> कैहनेकि एक ऐसनो भयंकर समय अयतै, जखनी लोग सिनी कहतै, ‘केतना धन्य छै ऊ स्त्री, जे बाँझ छै आरु ऊ कोख जे बच्चा कें जनम नै देलकै आरु ऊ स्त्री जे कभियो दुध नै पिलैलकै।’<sup>30</sup> तबे वें सिनी पहाड़ो कें कहतै, कि ‘हमरा सिनी पर गिरी जो!’ आरु पहाड़ो सँ कहतै, कि ‘हमरा सिनी कें झाँपी ले!’<sup>31</sup> जखनी गाछ हरा-भरा छै, तबे वें सिनी ई तरहें करै छै, जखनी गाछ सुखी जैतै, तखनी की करतै?”

32 दूगो आरु आदमी, जे अपराधी छेलै, ऊहो दोनो कें हुनको साथे मौत के सजा दै लेली ले जाय रहलो छेलै।<sup>33</sup> जखनी वें सिनी “खोपड़ी” नाम के एगो जग्घो पर पहुँचलै, तँ वैन्टां सिपाही सिनी यीशु के हाथ-पैर में काँटी ठोकी कें क्रूस पर चढ़ाय देलकै आरु वहे तरहें ऊ दोनो अपराधियो कें क्रूस पर चढ़ाय देलकै, एगो कें यीशु के दायाँ तरफ आरु दोसरा कें बायाँ तरफ।<sup>34</sup> तबे यीशु कहलकै, “हे पिता, एकरा सिनी कें छमा करी दियै, कैहनेकि ई सिनी नै जानै छै कि ई सिनी की करी रहलो छै।” तबे सैनिक सिनी हुनको कपड़ा कें आपस में बाँटवारा करै लेली पासा फेकी कें फैसला करे लागलै।

**35** वैनटां जमा लोग सिनी खड़ा होय कॅ ई सभ्भे देखी रहलो छेलै। यहूदी अधिकारियो सिनी यीशु के मजाक उड़ाबै लागलै। वें सिनी कहलकै, “ई दोसरो लोग सिनी कॅ बचैलकै, लेकिन जदि ई सच्चे में मसीहा छिकै, जदि ई सच्चे में परमेश्वर के भेजलो छिकै, तँ ई अपने-आप कॅ बचाय कॅ देखलाबै!”

**36** सैनिको सिनी यीशु लिगां आबी कॅ हुनको मजाक उड़ैलकै आरु हुनको मुँह में अंगूर के खट्टा रस पियै लेली जबरदस्ती देलकै आरु कहलकै, <sup>37</sup>“जदि तोंय यहूदी सिनी के राजा छेकै, तँ अपने-आप कॅ बचाय ले!”

**38** आरु यीशु के ऊपर क्रूस पर एगो तख्ती टांगी देलो गेलो छेलै, जेकरा पर लिखलो छेलै, “ई यहूदी सिनी के राजा छेकै।”

**39** यीशु के बगल में टाँगलो गेलो एगो अपराधी हुनको मजाक उड़ैतें हुवें कहलकै, “अच्छा! तोंय मसीहा छै? तँ अपने-आप कॅ बचाय ले आरु हमरो सिनी कॅ बचाय ले!”


**40** लेकिन दोसरो अपराधी ओकरा डाँटतें हुवें कहलकै, “मौत के एक्के जैसनो सजा मिललो पर की तोंय परमेश्वर सँ नै डरै छै? <sup>41</sup> अपना दोनो कॅ तँ ठीक्के सजा मिललो छै आरु अपना सिनी तँ आपनो करनी के फल भोगी रहलो छियै, लेकिन हुनी तँ कोनो तरह के आपराध नै करलको छै!”

**42** तबे वें यीशु कॅ कहलकै, “हे यीशु, आपनं जखनी आपनो राज्य में अयबै, तँ दया करी कॅ हमरा याद करबै।”

**43** यीशु जबाब देलकै, “हम्में तोरा सच कहै छियौ, कि आय्ये तोंय हमरो साथ स्वर्गलोक में होबै।”

### यीशु के मौत

**44-45** तखनी दुपहरिया के करीब बारह बजी रहलो छेलै। आरु तखनियें सुरज के रोशनी गुम होय गेलै आरु चारो तरफ अन्हार-कुप्प होय



गेलै। करीब तीन बजे तलक अंधेरा ही अंधरा छैलो रहलै। तखनिये यरुशलेम मंदिर में जे पर्दा छेलै, ऊ बीचो-बीच दू भाग में भांगी गेलै। 46 आरु यीशु उच्चो आवाज सँ कहलकै, “हे पिता, हम्मं आपनो आत्मा अपने के हाथो में सौंपी रहलो छियै।” ई कही कँ हुनी आपनो प्राण त्यागी देलकै।

47 रोमी सेना के कप्तान ई सब देखलकै, तँ परमेश्वर के जय-जयकार करतें हुवें कहलकै, “सच्चे में ई आदमी निर्दोष छेलै।”

48 ई घटना कँ देखै लेली जमा लोग सिनी के भीड़ जखनी ई सभ्भे होतें हुवें देखलकै, तँ वें सिनी छाती पीटतें हुवें लौटे लागलै। 49 लेकिन हुनको चिन्हलो-जानलो लोग सिनी दूरहै सँ खड़ा होय कँ ई सभ्भे देखी रहलो छेलै, ऊ लोग सिनी में गलील क्षेत्र सँ अयलो महिलो सिनी छेलै।

### कब्र में यीशु के लहाश

50-51 वैन्टां युसुफ नाम के एगो आदमी छेलै, जे यहूदा क्षेत्र के अरमतिया नाम के जग्घो के रहैवाला छेलै। वें एगो सज्जन आरु धर्मी आदमी छेलै, जे परमेश्वर के राज्य के आबै के इंतजार में छेलै। वें यहूदी महासभा के सदस्य छेलै, लेकिन यीशु के बारे में महासभा के जे फैसला आरु कारवाई होलै, ओकरा सँ वें बिल्कुल्ले सहमत नै छेलै। 52 यहै युसुफ पिलातुस लिगां जाय करी कँ यीशु के लहाश माँगी लेलकै। 53 आरु क्रूस पर सँ यीशु के लहाश उतारी कँ हुनका मलमल के कपड़ा में लपेटी दैलकै। वहाँकरो कब्र चट्टान खोदी कँ खोह के जैसनो बनैलो जाय छेलै। वैसन्है एगो कब्र में युसुफ नें यीशु के लहाश राखी देलकै, जे कब्र में एकरा सँ पैहने कोय लहाश नै राखलो गेलो छेलै। 54 ई शुक्रवार

के दिन के समय छेलै, जे दिन आराम के दिन के तैयारी करलो जाय छेलै। यहूदी लोग सिनी के आराम के दिन, जे शुक्रवार सुर्यास्त सँ शनिवार सुर्यास्त तलक होय छेलै, सुरु होय पर रहै।

55 जखनी यीशु के लहाश कँ ले जाय रहलो छेलै, तँ ऊ महिला सिनी जे यीशु के साथ गलील क्षेत्र सँ अयलो छेलै, वें सिनी ओकरो पीछु-पीछु गेलै। वें सिनी जाय कँ देखलकै, कि कैसें यीशु के लहाश कँ कब्बर में राखलो गेलै। 56 तबे ऊ महिला सिनी घर लौटी कँ अयलै आरु यीशु के लहाश में लगाबै लेली गमकौवा तेल आरु मसाला तैयार करलकै। लेकिन तब तलक यहूदी लोग सिनी के आराम के दिन सुरु होय गेलो छेलै आरु धर्म-नियम के आज्ञा मोताबिक ऊहो सिनी आराम करलकै।

यीशु जिन्दा होय गेलै!

**24** ऐतवार के दिन खुब्बे बिहाने में जनानी सिनी आपनो तैयार करलो गमकौवा मसाला सब ले कँ कब्बर पर अयलै। 2 तँ वें सिनी देखलकै कि कब्बर के मुँह पर जे पत्थर राखलो गेलो छेलै, ऊ हटलो छै। 3 लेकिन जखनी वें सिनी कब्र के भीतर गेलै, तँ देखलकै कि प्रभु यीशु के लहाश वैंटां नै छेलै। 4 एकरा पर वें सिनी दुविधा में पड़ी गेलै जे ई की होय गेलै? तखनिये वें सिनी देखलकै कि चमकौवा कपड़ा पहिरलो दूगो आदमी ओकरा सिनी के बगल में परगट होलै। 5 जखनी महिला सिनी डर सँ माथा झुकाय कँ नजर नीचा करी कँ देखे लागलै, तँ ऊ दोनो ओकरा सिनी कँ कहलकै, “तोरा सिनी जिन्दा आदमी कँ मरलो आदमी सिनी के बीझो में कैहनें खोजी रहलो छें?” 6 हुनी यैंटां नै छै, हुनी जिन्दा होय गेलो छै! याद करें कि हुनी गलील में रहै वक्ती तोरा सिनी सँ की कहलको छेलो। 7 हुनी कहलको छेलै, कि “ई जरुरी छै, कि मनुष्य-पुत्र, जे हुनी छियै, ओकरा पापी लोग सिनी के हाथो में सौंपलो जैतै, क्रूस पर चढ़ैलो जैतै आरु तेसरो दिन फेनू सँ जीबी उठतै।” 8 तबे यीशु के कहलो बात ओकरा सिनी कँ याद आबी गेलै।

9 कब्र पर सँ घुमी कँ अयला पर ऊ जननी सिनी ई सभ्भे बात ग्यारहो चेला सिनी कँ आरु बाकी लोग सिनी कँ कही सुनैलकै। 10 मगदला नामक जग्घो के रहैवाली मरियम, योअन्ना, याकुब के माय मरियम आरु दोसरो महिला सिनी मसीह-दूत सिनी कँ ई सभ्भे बात बतैलकै। 11 लेकिन मसीह-दूत सिनी कँ ई सभ्भे बात बेमतलब वाला खिस्सा जैसनो लागलै आरु वें सिनी विश्वास नै करलकै। 12 तैय्यो पर भी पतरस उठी कँ दौड़तें हुवें कब्बर पर गेलै। जखनी वें झुकी कँ भीतर देखलकै, तँ खाली मलमल कपड़ा वाला पट्टी वैनंठां पड़लो देखलकै। ई वहे पट्टी छेलै, जे यीशु के लहाश पर लपेटलो गेलो छेलै। ई घटना पर अचंभित होय कँ ई सभ्भे बातो पर विचार करतें हुवें वें घर वापस लौटी गेलै।

13 वहे दिना यीशु के चेला में सँ दूगो चेला इम्माउस नाम के गाँव जाय रहलो छेलै, जे यरुशलेम नगर सँ लगभग चार कोस के दूरी पर छेलै। 14 वें दोनो रास्ता में ऊ सभ्भे घटना के चर्चा करतें हुवें जाय रहलो छेलै, जे घटना घटलो छेलै। 15 जखनी वें दोनो गप्प-शप्प आरु सलाह-विचार करियै रहलो छेलै, तँ यीशु खुद्दे ओकरो पास आबी कँ साथे-साथ चले लागलै। 16 लेकिन परमेश्वर ऐसनो करी देले छेलै कि वें दोनो यीशु कँ पहचाने नै सकलै।

17 हुनी ऊ दोनो सँ पुछलकै, “तोरा सिनी चलतें-चलतें अपना में की वाद-विवाद करी रहलो छै?”

ऊ दोनो रुकी गेलै। ओकरा सिनी के मुँह मलीन छेलै। 18 ऊ दोनो में सँ जेकरो नाम क्लियोपास छेलै, ऊ यीशु सँ कहलकै, “यरुशलेम में आपनहँ एगो ऐसनो आदमी होबै, जेकरा मालुम नै छै, कि हाले में की घटना यैनंठां घटलो छै!”

19 यीशु कहलकै, “कोन घटना?” ऊ दोनो जबाब देलकै, “नासरत के रहैवाला यीशु के बारे में। हुनी जे सब कहलकै आरु जे आश्चर्यजनक चमत्कार सब करलकै, ओकरा सँ ई साबित होलै, कि हुनी परमेश्वर के एगो शक्तिशाली भविष्यवक्ता छेलै। परमेश्वर आरु मनुष्य दोनो के

नजरी में हुनको वचन आरु हुनको काम सामर्थी छेलै। <sup>20</sup> महा-पुरोहित सिनी आरु हमरो सिनी के महासभा के अधिकारी सिनी हुनका पकड़वाय कें सौंपी देलकै, ताकि हुनका मौत के सजा देलो जाय आरु वें सिनी यीशु कें क्रूश पर चढ़वाय देलकै। <sup>21</sup> लेकिन हमरा सिनी कें तें आशा छेलै, कि हुनी इसराएल के छुटकारा दिलैतै। ई सभ्भे बात के अलावे एगो बात आरु छै, कि ई सभ्भे घटना के होलो तीन दिन बीती चुकलै, <sup>22</sup> आरु आय हमरा सिनी के समाज के कुछ जननी सिनी हमरा सिनी कें चकित करी देलकै। आय वें सिनी भोरे-भोर कब्बर पर गेलै <sup>23</sup> लेकिन हुनको लहाश ओकरा सिनी कें नै मिललै! तें वें सिनी आबी कें हमरा सिनी कें कहलकै कि ओकरा सिनी कें स्वर्गदूत के दर्शन होलै, जे कहलकै कि हुनी तें जिन्दे छै। <sup>24</sup> तबे हमरा सिनी में सँ कुछ साथी सिनी कब्बर पर गेलै आरु जैसनो कि महिला सिनी कहलको छेलै, ठीक वैसनें पैलकै, लेकिन यीशु कें वें सिनी नै देखलकै।”

**25** यीशु ऊ दोनो सँ कहलकै, “अरे, बुद्धि-हीन सिनी! परमेश्वर के भविष्यवक्ता सिनी के कहलो बात पर विश्वास करै में मंदबुद्धि सिनी! <sup>26</sup> की ई जरुरी नै छेलै, कि मसीहा ई सभ्भे कष्ट सहला के बादे आपनो स्वर्गिक महिमा में प्रवेश करतियै?” <sup>27</sup> तबे यीशु ऊ दोनो कें पूरे पवित्र-शास्त्र में आपनो बारे में लिखलो सभ्भे बातो के माने समझैलकै। हुनी परमेश्वर के भविष्यवक्ता मूसा के कहानी सँ सुरु करी कें आरु दोसरो भविष्यवक्ता सिनी के कहानी के बारे में ओकरा सिनी कें बतैलकै आरु हुनको बारे में जे भी बात लिखलो गेलो छेलै, ओकरो माने ओकरा सिनी कें समझैलकै।

**28** ऐतने में वें सिनी ऊ गाँव लिगां पहुँची गेलै, जेन्टां ओकरा सिनी कें जाना छेलै। लेकिन यीशु ई तरहें देखैलकै जैसैं कि हुनी आगु जाय वास्तें चाहै छेलै। <sup>29</sup> ऊ दोनो हुनका रोकतें हुवें कहलकै, “आय हमरा सिनी के साथ रहियै, कहनेकि देखियै साँझ पड़ै वाला छै, दिन ढली रहलो छै।” तबे यीशु ओकरा सिनी के साथ रहै लेली घर के भीतर गेलै।

**30** यीशु जखनी ओकरा सिनी के संग खाना खाय वास्तें बैठलै, तँ हुनी रोटी लेलकै आरु परमेश्वर कँ धन्यवाद दै कँ रोटी तोड़ी कँ ओकरा सिनी कँ दै लागलै। **31** तबे ओकरा सिनी के आँख खुली गेलै आरु वें सिनी हुनका पहचानी गेलै। ओकरो बाद तुरंते यीशु ओकरा सिनी के नजरी सँ बिलाय गेलै। **32** तबे वें सिनी एक-दोसरा सँ कहे लागलै, “रास्ता में चलै वक्ती जखनी हुनी आपना सिनी सँ बातचीत करलकै आरु धर्मशास्त्र में लिखलो बातो के माने समझलकै, तखनी आपना सिनी के हृदय आनंद सँ कैसें धक-धक करे लागलो छेलै!”

**33** ऊ दोनो तुरंते उठी कँ यरुशलेम लौटी गेलै। वैनटां ओकरा सिनी ग्यारहो चेला आरु बाकी संगी-साथी सिनी कँ एक्के जग्घो में जमा पैलकै। **34** चेला सिनी कही रहलो छेलै, कि “सच्चे में प्रभु जीबी उठलो छै! हुनी सिमोन कँ दर्शन देलको छै।” **35** तखनिये ईहो दोनो ओकरा सिनी कँ रास्ता में होलो बातो के बारे में कही सुनैलकै, आरु कहलकै कि जखनी यीशु रोटी कँ तोड़लकै, तबे वें सिनी हुनका पहचानी लेलकै।

### चेला सिनी कँ यीशु के दर्शन

**36** वें सिनी ई सभ्भे बात सुनाय्ये रहलो छेलै, कि यीशु ओकरा सिनी के बीचो में खुद्दे परगट होय गेलै आरु कहलकै, “तोरा सिनी कँ शान्ति मिलौ।”

**37** लेकिन ई देखी कँ वें सिनी घबराय गेलै आरु डरी गेलै। वें सिनी समझलकै जैसें कोनो भूत कँ देखी रहलो छेलै। **38** ओकरो सिनी सँ यीशु कहलकै, “तोरा सिनी कैहने घबराय रहलो छै? तोरा सिनी के मोन में शंका कैहने उठै छौ? **39** हमरो हाथ आरु हमरो गोड़ कँ देखें। हम्मं वही छेकियै! हमरा छुबी कँ देखें! भूत कँ तँ हाड़-माँस नै होय छै, जैसनो तांय सिनी हमरो देखी रहलो छै।”

40 ई कही कॅ हुनी ओकरा सिनी कॅ आपनो हाथ-पैर देखैलकै। 41 यीशु कॅ जिन्दा देखी कॅ वें सिनी खुशी सँ एतना अचंभित होय गेलै कि विश्वास नै करे सकलै। तबे यीशु पुछलकै, “की तोरा सिनी लिगां खाय लेली कुच्छो छौ?” 42 वें सिनी हुनका तरलो मछली देलकै। 43 तबे हुनी ऊ ले कॅ ओकरा सिनी के सामने में खैलकै।

44 यीशु कहलकै, “जखनी हम्मं तोरा सिनी के संग छेलियौ, तखनी हम्मं तोरा सिनी कॅ ई कहलो छेलियौ, कि परमेश्वर के पवित्र-शास्त्र में\* हमरो बारे में जे कुछु लिखलो छै, ऊ सभ्भे बात कॅ पूरा होना निश्चिते छै।”

45 तबे हुनी परमेश्वर के पवित्र-शास्त्र के बात समझै लेली ओकरा सिनी के बुद्धि खोली देलकै। 46 हुनी ओकरा सिनी कॅ कहलकै, “धर्म-शास्त्र में ऐसनो लिखलो गेलो छै, कि मसीहा दुख उठैतै आरु तेसरो दिन मरलो में सँ जीबी उठतै, 47 आरु हुनको नाम में यरुशलैम सँ ले करी कॅ पूरा दुनियाँ में सभ्भे जाति के लोगो के लेली पाप सँ मुँह मोड़ी कॅ हृदय-परिवर्तन करै के आरु पाप सँ छमा पाबै के प्रचार करलो जैतै। 48 तोंय सिनी ई सभ्भे बातो के गवाह ठहरभैं। 49 आरु देखें, हम्मं तोरा सिनी पर परमेश्वर के आत्मा भेजबौ, जेकरो वादा हमरो पिता करलको छेलै। आरु जखनी तलक तोरा सिनी पर हुनको सामर्थ नै उतरौ, तब तलक तोंय सिनी यहै शहर में रुकलो रहियैं।”

### यीशु स्वर्ग में उठैलो गेलै

50 तबे यीशु ऊ चेला सिनी कॅ बेतनिया नाम के गाँव तलक ले गेलै, आरु आपनो हाथ उठाय कॅ ओकरा सिनी कॅ आशीर्वाद देलकै। 51 आरु

---

24:44 मूल में, “परमेश्वर के पवित्र-शास्त्र” के जग्घो पर लिखलो छै- “मूसा के विधि-विधान, प्रभु के दोसरो भविष्यवक्ता सिनी के लेख आरु भजन-संग्रह के किताब”। यहूदी लोग सिनी परमेश्वर के पवित्र-शास्त्र कॅ यहै कही कॅ बताबै छेलै।

आशीर्वाद देते हैं हुनका ओकरा सिनी के बीचो सँ स्वर्ग में उठाय लेलो गेलै। 52 चेला सिनी हुनको आराधना करलकै आरु बहुते आनंद के साथ यरुशलेम लौटी गेलै। 53 वें सिनी परमेश्वर के गुनगाण करते हुवें आपनो पूरा समय मंदिर में बीताबें लागलै।



यीशु स्वर्ग में उठाय लेलो गेलै (24:51)

## शब्द-परिचय

**अब्राहम** यहूदी लोग सिनी के मूल पुरखापति। जे प्रभु यीशु के जनम के लगभग 2000 साल पैहने जिन्दा छेलै। परमेश्वर अब्राहम सँ वादा करलको छेलै कि हुनी ओकरा आरु ओकरो वंशज कें आशीर्वाद देतै आरु ओकरो सिनी के द्वारा संसार के सभ्भे लोगो के आशीर्वाद देतै। परमेश्वर के एकलौता बेटा प्रभु यीशु मसीह धरती पर के सभ्भे लोगो लेली मुक्तिदाता बनी कें अब्राहमे के वंश में जनम लेलकै।

**आदम** दुनियाँ के पहला आदमी जेकरा परमेश्वर धरती के माटी सँ आपनो जैसनो बनैलकै आरु ओकरा नथुनो में आपनो मुँह सँ जीवन के साँस फुँकलकै। आदम कें बनैला के बाद परमेश्वर ने ओकरो संग रहै लेली एगो औरत कें ओकरो साथी के रूप में बनैलकै। परमेश्वर जखनी ओकरा सिनी कें बनैलकै, तबे ऊ दोनो में कोनो तरह के पाप नै छेलै, लेकिन बाद में परमेश्वर के आज्ञा कें तोड़ी कें ऊ दोनो पापी बनी गेलै। ओकरो परिणाम ई होलै कि ऊ दोनो सँ जन्म लै वाला पूरे मानव जाति पापी बनी गेलै। यहे लेली प्रभु यीशु मसीहा ई संसार में परमेश्वर के आत्मा के सामर्थ सँ एगो कुमारी कन्या सँ जन्म लेलकै, ताकि पूरा मानव-जाति कें पाप सँ मुक्ति मिलै सकै।

**इसराएल** अबराहम के पोता आरु इसहाक के बेटा “याकूब” छेलै। परमेश्वर याकूब कॅ दोसरो नाम “इसराएल” देलको छेलै। वहे नाम पर ओकरो पूरा वंशज “इसराएली” कहलैले आरु वहे नाम पर ऊ देश के नाम “इसराएल” राखलो गेलै, जे देश परमेश्वर ओकरा सिनी कॅ देलकै। पैहने ऊ देश के नाम “कनान” छेलै। यीशु के समय में इसराएली लोग सिनी कॅ “यहूदी” कहलो जाय छेलै।

**एलियाह** परमेश्वर के एगो महान भविष्यवक्ता जे प्रभु यीशु मसीहा के जन्म के करीब 800 साल पैहने रहै।

**कूस** रोम शासन में सबसे घृणित अपराधी कॅ मौत के सजा दै लेली सबसे कष्टदायक तरीका के रुप में कूस के इस्तेमाल करलो जाय छेलै। दूगो लकड़ी कॅ जोड़ी कॅ ओकरा पर अपराधी कॅ सुताय कॅ ओकरो हाथ-गोड़ में काँटी ठोकी देलो जाय छेलै आरु रस्सी सँ बाँधी देलो जाय छेलै। ओकरो बाद जोड़लो लकड़ी कॅ यानी कूस कॅ गड़्ढा खोदी कॅ ओकरे में सीधा खड़ा करी देलो जाय छेलै। रोमन अधिकारी सिनी अपराधी कॅ मरै तलक कूस पर लटकतें हुवें छोड़ी दै छेलै।

**खतना** यहूदी समाज के लोग सिनी वास्तें एगो धार्मिक विधि छेलै। ई विधि में जनम के आठमा दिन पर नवजात बच्चा के जनन-अंग के अगला भाग के चमड़ी कॅ काटै के परंपरा छेलै। खतना के विधि पुरनका यहूदी समाज में ई बात कॅ देखलाबै छेलै कि ऊ लोग अब्राहम के वंशज छेलै।

**खमीर** रोटी कॅ फुलाबै लेली एगो चीज, जेकरा नया आटा के साथ पानी में मिलाय कॅ सानलो जाय छेलै, जेकरा सँ रोटी फुली जाय छेलै। थोड़े खमीर मिलैला सँ बहुते सानलो आटा के रोटी फुली जाय रहै।

**दाऊद** इसराएल देश के सबसे बड़का राजा, जे प्रभु यीशु के जनम के करीब 1000 साल पैहने छेलै। ऊ परमेश्वर के बहुते बड़ा

भक्त छेलै आरु परमेश्वर के जय-जयकार करतें हुवें बहुत्ते भजन लिखलको छेलै, जेकरो बाइबिल में “भजन-संहिता” के किताब में देलो गेलो छै। मुक्तिदाता प्रभु यीशु मसीहा के जनम राजा दाऊद के वंश में होलै, यह लेली यीशु कें “दाऊद के बेटा” पुकारलो जाय छेलै।

**दुष्टात्मा** शैतान के आदेश मानैवाला दूत सिनी। दुष्टात्मा वैसनो दूत सिनी छेलै, जेकरा शैतान के पक्ष में रहै के कारनें ओकरो साथहै स्वर्ग सँ निकाली देलो गेलो छेलै। शैतान के दूत के रूप में काम करतें हुवें ई दुष्टात्मा सिनी लोग सिनी के भीतर समाय जाय छै आरु ओकरा सिनी कें अपनो वश में करी लै छै। वश में करला के बाद ओकरा सँ तरह-तरह के काम, जैसे कि शरीर कें तोड़-मरोड़, जोर-जोर सँ चिल्लाना, मुँह सँ झाग निकलना आरु भी बहुत्ते तरह के कष्टदायक काम कराबै छै।

**धर्मी** मूल रूप सँ युनानी भाषा के शब्द “डिकाइओस” जेकरो असली मतलब छै- सीधा। परमेश्वर ऊ लोग सिनी कें धर्मी ठहराबै छै, जे सिनी परमेश्वर के आज्ञा के पालन करै छै, हुनका पर पूरा विश्वास करै छै, आरु आपनो जीवन परमेश्वर के भय आरु भक्ति में बीताबै छै।

**नया करार** दोसरो हिन्दी संस्करण में एकरा “वाचा” कहलो गेलो छै। ओकरो मतलब छै- दू या दू सँ ज्यादा आदमी या समुह के बीचो में होलो समझौता, जेकरा तोड़लो नै जाय सकै छै। बाइबिल के नया-नियम में दू तरह के करार के बारे में बतैलो गेलो छै- विधि-विधान पर आधारित पुरनका करार आरु प्रभु यीशु मसीह द्वारा बनैलो गेलो नया करार। विधि-विधान पर आधारित पुरनका करार के सभ्भे आदेश कें पूरा करना कोय आदमी लेली संभव नै छेलै। प्रभु यीशु मसीह ने विधि-विधान पर आधारित पुरनका नियम के सभ्भे आज्ञा कें पूरा तरहें पालन करलकै आरु आपनो बलिदान के द्वारा

परमेश्वर आरु मनुष्य के बीचो में एगो नया करार बनैलकै। ई नया करार के मोताबिक, जे कोय्यो हुनको बलिदान पर विश्वास करै छै, वें सिनी पिता-परमेश्वर के द्वारा स्वीकार करलो जाय छै।

**परमेश्वर के आत्मा** परमेश्वर के पवित्र-शास्त्र के मोताबिक परमेश्वर एगो त्रियक परमेश्वर छै, जेकरो मतलब छै कि एक होला पर भी परमेश्वर तीन छै आरु तीन होला पर भी एक छै। वहे त्रियक परमेश्वर में छै-पिता, पुत्र यानि यीशु मसीह आरु परमेश्वर के आत्मा यानि पवित्र-आत्मा। जे कोय्यो परमेश्वर के पुत्र यीशु मसीह पर विश्वास करै छै, ओकरो भीतर में रहै लेली पिता परमेश्वर आपनो आत्मा दै छै। परमेश्वर के आत्मा के काम छेकै- विश्वास करैवाला कें सत्य आरु धार्मिकता के रास्ता पर अगुवाई करबो।

**परमेश्वर के पवित्र-शास्त्र** परमेश्वर के आत्मा के अगुवाई में लिखलो गेलो शास्त्र। एकरा “बाइबिल” कहलो जाय छै। परमेश्वर के पवित्र शास्त्र के दू भाग छै- जे भाग प्रभु यीशु के जन्म के पैहने लिखलो गेलै ओकरा “पुरनका नियम” आरु जे भाग प्रभु यीशु के समय के बाद लिखलो गेलै, ओकरा “नया नियम” कहलो जाय छै। खास करी कें जखनी “नया-नियम” में “परमेश्वर के पवित्र-शास्त्र” के चर्चा होलो छै, तँ ओकरो मतलब “पुरनका-नियम” सँ छै। (लूका 24:27)

**परमेश्वर के राज्य** परमेश्वर के राज्य के मतलब कोनो जगधो या कोनो राजनीतिक राज्य नै छै। एकरो मतलब छै, परमेश्वर आरु मनुष्य के बीचो में एगो नया संबंध, जेकरा में परमेश्वर एगो सर्वशक्तिमान राजा कें रूप में होतै आरु मनुष्य खुद कें हुनको हाथ में सौंपी कें हुनको इच्छा के मोताबिक जीवन बीतैतै। प्रभु यीशु पर विश्वास करला सँ मनुष्य के हृदय में परमेश्वर के साथ एक नया संबंध के सुरुआत होय छै।

**परमेश्वर के भविष्यवक्ता** परमेश्वर सँ संदेश पाबी कें लोग सिनी तक पहुँचाबै वाला आदमी। परमेश्वर खुद आपनो भविष्यवक्ता

कँ आपनो संदेश लोग सिनी तक पहुँचाबै लेली कहलकै। प्रभु यीशु के आबै सँ पैहने परमेश्वर आपनो भविष्यवक्ता के द्वारा मसीह के जनम, हुनकर काम, मृत्यु, दुबारा जीबी उठबो आरु हुनको राज्य कँ बारे में आरु संसार के अंत समय में हुनको दुबारा आबै कँ बारे में बहुते बात बतैलको छेलै।

**फरिसी** यहूदी समाज के एगो प्रतिष्ठित धार्मिक पंथ के लोग सिनी। परमेश्वर के भविष्यवक्ता मूसा के देलो विधि-विधान के साथ-साथ ओकरा सँ जुड़लो परंपरा सिनी के पालन वें सिनी काफी कड़ाई सँ करै छेलै। वें सिनी आपनौ तरफ सँ बहुते नियम-कानून बनाय कँ विधि-विधान में जोड़ी देलको छेलै। लूका रचित शुभ-संदेश कँ पढ़तें हुवें पाठक लोग सिनी खुद्दे ई बात कँ देखे सकै छै, कि ज्यों-ज्यों समय बीतलो गेलै, त्यों-त्यों ज्यादातर फरिसी लोग सिनी यीशु के विरोधी होलो गेलै आरु अंत में हुनका जान सँ मारै लेली योजना बनैलकै।

**फसह परब या अखमीरी रोटीवाला परब** यहूदी लोग सिनी के एगो परब। मिस्र देश के गुलामी सँ बाहर निकलै के यादगारी में परमेश्वर के आज्ञा मोताबिक ई परब मनैलो जाय छेलै। गुलामी सँ निकलै के समय में यहूदी लोग सिनी के पुरखा लोग सिनी जल्दीबाजी में छेलै। खमीरवाला रोटी बनाबै में समय लागै छेलै, यहे लेली ओकरा सिनी कँ बिना खमीरवाला रोटी खाय पड़लो छेलै। आगु चली कँ यहूदी सिनी वहे पुरनका घटना कँ याद करतें हुवें ई परब में मेमना के बलि चढ़ाबै छेलै आरु बिना खमीरवाला रोटी के साथ कडुवा साग-पात खाय छेलै। ऐसनो करी कँ वें सिनी ई बात कँ याद करै छेलै कि कैसे गुलामी के समय में एक दाफी ओकरा सिनी के पुरखा सिनी मेमना के बलि करी कँ ओकरो लहू कँ घर के दरवाजा पर छिड़की देलको छेलै, ताकि ओकरा सिनी के पहलौठा कँ परमेश्वर के कोप सँ बचैलो जाय।

**बपतिस्मा** बपतिस्मा एगो विधि छेकै, जे पानी सँ करलो जाय छै। मूल रूप सँ ई युनानी भाषा के शब्द छियै, जेकरो मतलब होय छै – “डुबैबो या पानी में डालबो”। ई विधि करै के मकसद शुद्ध करबो होय छेलै। ई विधि ऊ लोग सिनी लेली करलो जाय छै, जे आपनो पाप कँ मानतें हुवें प्रायश्चित करी कँ आपनो मन प्रभु यीशु मसीह के तरफ करै छै। जे लोग सिनी प्रभु यीशु मसीह पर विश्वास करी कँ हुनका आपनो मुक्तिदाता स्वीकार करै छै, ओकरा सिनी लेली एक संकेत के रूप में बपतिस्मा लेना चाहियो, एकरो आज्ञा खुद प्रभु यीशु आपनो चेला सिनी कँ देलको छेलै।

**मंदिर** पूरे इसराइल में एक्के मंदिर छेलै, जेकरा में कोय मुर्ति नै छेलै। यहै ऊ मंदिर छेलै जैन्टां पुरोहित सिनी यहूदी लोग सिनी के देलो चढ़ावा चढ़ाबै छेलै। वहिन्टां धर्म-गुरु सिनी लोग सिनी कँ परमेश्वर के संदेश दै छेलै। हरेक साल तीन विशेष परब पर यहूदी लोग सिनी येरुशलेम के मंदिर में जमा हुवै छेलै।

**मनुष्य के पुत्र** प्रभु यीशु मसीह नें बहुते दाफी अपना-आप कँ “मनुष्य-पुत्र” कहलको छै। हुनी ई बात कँ बार-बार स्पष्ट करलको छै कि मनुष्य-पुत्र हरैलो लोग सिनी कँ खोजै लेली आरु ओकरा सिनी कँ मुक्ति दै लेली ई संसार में अयलो छै। साथहै हुनी ईहो बात कहलकै कि “मनुष्य-पुत्र” लेली ई जरुरी छै कि ऊ क्रूस पर लटकैलो जैतै, पूरा मानव-जाति के पाप लेली कीमत के रूप में बलिदान होय जैतै आरु यहो कि आबैवाला समय में हुनिये सभ्भे लोगो के न्याय करतै।

**मसीह** ई शब्द इबरानी भाषा के शब्द “मसिआख” सँ लेलो गेलो छै, जेकरा युनानी भाषा में “ख्रिस्ट” कहलो जाय छै। ई शब्द के मतलब छेकै “तिलक करलो गेलो” या “कोनो खास काम लेली चुनलो गेलो।” यीशु के जनम के बहुते पैहने परमेश्वर आपनो भविष्यवक्ता के द्वारा आपनो लोग सिनी सँ बार-बार वादा

करलको छेलै कि हुनी एगो मुक्तिदाता कॅ संसार में भेजतै, जे सभ्भे लोगो के पाप मिटाय कॅ मुक्ति दै लेली बलिदान होय जैतै आरु परमेश्वर के राज्य के स्थापना करतै। आबैवाला मुक्तिदाता कॅ ही “मसीह” कहलो जाय छेलै।

**मसीह-दूत** मसीह-दूत कॅ कहीं-कहीं प्रेरित या प्रचारक भी कहलो गेलो छै। यीशु आपनो चेला सिनी में सँ बारह-गो चेला सिनी कॅ खास करी कॅ आपनो दूत के रूप में चुनलकै। ई सिनी मसीह-दूत हुनको संग में रहै छेलै आरु यीशु ओकरा सिनी कॅ परमेश्वर के शुभ-संदेश के प्रचार करै लेली आरु दुष्टात्मा कॅ निकालै लेली अलग-अलग जग्घो में भेजलकै।

**मूसा** यहूदी लोग सिनी के एगो महान अगुवा जे परमेश्वर के एगो भविष्यवक्ता छेलै आरु प्रभु यीशु के जनम के लगभग 1400 साल पैहने जिन्दा छेलै। मूसा के अगुवाई में परमेश्वर इसराएल के लोग सिनी कॅ मिस्र देश में 430 साल तक गुलाम रहै के बाद आजाद करी कॅ बाहर निकाल्लकै। आपनो लोग सिनी लेली परमेश्वर दस आज्ञा पत्थर पर लिखी कॅ मूसा के देलकै। परमेश्वर एकरो अलावे भी बहुते आज्ञा देलकै, जेकरा बाद में मूसा नें लिखी कॅ आपनो लोग सिनी कॅ देलकै, जे “मूसा के विधि-विधान” कहलाबै छै।

**यहूदी** अब्राहम के वंश के लोग सिनी, जे याकूब सँ पैदा होलो छेलै। यहूदी लोग सिनी कॅ “इसराएल” कहलो गेलै।

**यहूदी धर्म सभा-भवन** हिन्दी संस्करण में एकरा “आराधनालय” कहलो गेलो छै। यहूदी जाति के लोग सिनी के सभा-भवन, जेकरा में वें सिनी मुख्य रूप सँ परमेश्वर के आराधना-स्तुति करै छेलै। यहूदी लोग सिनी के हरेक नगर आरु बस्ती में एक-एक सभा-भवन रहै छेलै। विशेष रूप सँ यहूदी लोग सिनी के आराम के दिन पर ऊ लोग सिनी वैन्टां जमा होय छेलै आरु परमेश्वर के पवित्र-शास्त्र कॅ सुनै छेलै, ओकरो पाठ करै छेलै आरु प्रार्थना-स्तुति करै छेलै।

कहीं-कहीं यहूदी धर्म सभा-भवन के केवल “धर्म सभा भवन” या “सभा-भवन” भी कहलो गेलो छै।

**यहूदी सिनी के आराम के दिन** हिन्दी संस्करण में एकरा “सबत के दिन” कहलो गेलो छै। परमेश्वर के पवित्र-शास्त्र मोताबिक परमेश्वर पूरा दुनियाँ के 6 दिन में सृष्टि करलकै आरु हुनी सातवाँ दिन आराम करलकै। परमेश्वर के भविष्यवक्ता मूसा के समय में परमेश्वर यहूदी लोग सिनी के ई आज्ञा देलकै, कि वें सिनी 6 दिन तँ काम-धंधा करै लेकिन सातवाँ दिन वें सिनी आराम करै। ई आराम के दिन, शुक्रवार के सुर्यास्त सँ शनिवार के सुर्यास्त तक के बीच के समय होय छेलै। बहुते साल के बाद यहूदी धर्म के एगो पंथ जेकरा “फरिसी” कहलो जाय छेलै, ऊ पंथ के लोग सिनी आरु दोसरो धर्म-शास्त्री सिनी यहे आराम के दिन के बारे में तरह-तरह के नियम-कानून बनाय देलकै।

**शैतान** परमेश्वर के सबसे बड़ा दुश्मन। सुरु में ऊ परमेश्वर के एगो प्रधान स्वर्गदूत छेलै, जे परमेश्वर के संग-संग रहै छेलै। लेकिन बाद में ऊ घमंडी बनी के परमेश्वर से हीं डाह करै लागलै। यहे लेली स्वर्ग सँ बाहर करी देलकै आरु ओकरो संग में ऊ स्वर्गदूत सिनी के भी जे ओकरो तरफ छेलै। शैतान के काम छियै, कि लोग सिनी के धोखा में डाली के आरु पाप में फँसाय के परमेश्वर सँ दूर करी दियै। साथहै वें परमेश्वर के सामना में लोग सिनी पर सदा ही दोष लगैतें रहै छै।

**सदूकी** यहूदी समाज के एगो प्रमुख धार्मिक पंथ के लोग सिनी। ई लोग सिनी समाज के उच्च वर्ग के छेलै। ज्यादातर सदूकी लोग सिनी पुरोहित के परिवार के आरु शासक-वर्ग के परिवार के छेलै। ई सिनी पुरखा सँ बनैलो परंपरा-रिवाज के नै मानै छेलै, लेकिन केवल परमेश्वर के भविष्यवक्ता मूसा सँ देलो गेलो विधि-विधान के हीं कड़ाई सँ पालन करै छेलै। मौत सँ जीबी उठै वाला बात पर आरु स्वर्ग-दूत सिनी पर भी वें सिनी यकीन नै करै छेलै।

**सदोम** परमेश्वर के नजरी में बहुते पापी नगर, जेकरा परमेश्वर आग बरसाय के नाश करी देलकै।

**हारुण** परमेश्वर के सबसे पहिलका महा-पुरोहित। वें परमेश्वर के भविष्यवक्ता मूसा के सगा भाई छेलै।